

812584

Annel Baehr

Johann
Baehr





Kein Hüsing.

Bon-

Strig Reuter.



Greifswald und Leipzig.

C. A. Koch's Verlagsbuchhandlung, Th. Kunise.

1858.

Digitized by the Internet Archive
in 2014

RBR
Jahz
1923

1.

Dei Noth.

Dei Rogg set't an, dei Weiten bläuft,
Jehannsdag is't, dei Sünn, dei gläuft,
Rein Regen föllt, dei Wind, dei schwiggt,
Doa rögt sich nich en Blatt an 'n Boom,
Un up den Duurn an 'n Weg, doa liggt
Von 'n Heuaust her en dichten Stohm¹).
Piel²) steckt herun dei Sünnenstrahl
Und bülgt³) sich äwe dei Felder wiet
Un flimmert und flaskert up un dal,
As wenn dei Glauth ut den Aben⁴) tüht⁵).
Dei Käwe singt sien drömg⁶) Lied,
Un mäud un sachting⁷) summt dei Imm⁸)
Un wäuhlt in Kleeweblaumen 'rüm;

1) Stohm = Staub. 2) piel = pfeilgrade. 3) bülgen = wellen. 4) Aben = Osen. 5) tüht = zieht. 6) drömg = träumerisch. 7) sachting ist das Diminutiv von sacht = langsam, leise. Der plattdeutsche Dialect bildet auch von Adverbien und Imperativen Diminutive. 8) Imm = Biene.

Heuspringe singt so trag un matt,
 Krüpt¹⁾ deipe²⁾ in dat Gras herin;
 Dei Bottevagel³⁾ söcht dei Sünn
 Un plät't⁴⁾ sich up dat Kliebenblatt⁵⁾;
 Dei blaage Weepstart⁶⁾ drögt tau Nest —
 Hei is nah Faurehahlen⁷⁾ west —
 Un nicht un kicht sich ängstlich üm,
 Ob Ein em of gewoehr woll ward,
 Un schlüpft un krüppt un hüppt herüm
 Un schwippt un wippt mit sienem Start⁸⁾
 Un böhrt⁹⁾ dat Köppken in dei Höch,
 Ob sich bei Mann viellicht of rögt¹⁰⁾;
 Dei still doa achtr 'e Steinmuur liggt,
 Den einen Arm up sien Gesicht,
 As wenn Ein ruhig schlafen will.
 Hei rögt sich nich, hei liggt so still,
 As wier hei dod, un Weepstart flüggt
 Ganz driest heran
 Un kicht den Mann

1) Krüpt von Krüpen = kriechen. 2) deipe = tiefer. 3) Bottevagel = Schmetterling. 4) plätten = glatt ausbreiten. 5) Klieben = Kletten. 6) Weepstart = Bachstelze. 7) Faure = Futter. 8) Start = Schwanz. 9) böhren = heben. 10) rögen = röhren.

Mit siene klauken Dogen an
 Un schlüppt behen'n nah siene Lütten¹⁾
 Un piept ehr liesing in dei Uhren,
 Doa leeg en Mann bi 'n Weepelduurn²⁾,
 Sei sünn of jo recht stilling sitten. — —
 Un Allns is werre still, dat lett³⁾,
 As wier begraben all dat Leben;
 Un 't is so bang, as wenn dei Heben⁴⁾
 In stille Hitt en Weere brött⁵⁾;
 Un ganz von siern, doa is 't, as wenn
 Dat süszte äwer 't Feld doahen.
 Dei Mann süszt of, sien Arm, dei glitt
 Herunne von dat Angesicht,
 Hei grippt tau Sied un fött⁶⁾ un ritt,
 Wat hei von Gras tau hollen frigt,
 Un richt't sich mit en Ruck in En'n⁷⁾
 Un starrt ümher un folgt⁸⁾ dei Hän'n
 So furlos⁹⁾ äwer 't bruun Gesicht,

1) lütt = klein. 2) Weepelduurn = Rosendorn. 3) lett von
 laten = lassen, aussehn. 4) Heben = Himmel. 5) brött
 von bräuden = brüten. 6) fött von faten = fassen. 7) in
 En'n, wörtlich = in's Ende d. h. in die Höhe. 8) folgen
 = falten. 9) furlos, eigentlich: bei dem keine Fur an-
 schlägt; hier = ratlos.

As wenn hei nich mihr seihen müggt,
 Up Gras un Blaum un Kuurn un Feld;
 Un was doch noch so jung un stark
 Un güng doch ierst 'rin in dei Welt,
 Dei Knaaken¹⁾ vull von junges Mark,
 Dei Schullern breit, dei Bost²⁾ so hoch,
 So maakt för Arbeit un Gefohr,
 So frisch dei Back, so blaag dat Dog,
 So roth dei Mund, so kruus dat Hohr,
 Dei Stiern so hell, so keck dei Blick,
 So maakt för Leiw un Lust un Glück.
 Ach, äwerst in sien sizig Wesen
 Is nicks von Glück un Lust tau lesen;
 Kicht äwe³⁾ Ein in 't bange Dog
 Un führt, dat 't ut sien Angesicht
 So tru un iehrlich 'rute lücht,
 Un fäuhlt dat Hart, wo em dat schleg,
 Denn markt hei woll, denn weit hei wiß⁴⁾),
 Dat vähl von Leiw dei Ned doa is.
 Un kicht hei 'n Bäten⁵⁾ in dei Fiern
 Un führt dei junge, witte Diern,

1) Knaaken = Knochen. 2) Bost = Brust. 3) äwe, auch äwerst = aber. 4) wiß = fest, sicher, gewiß. 5) Bäten = Bischen.

Dei langsam 'ranne wankt¹⁾ allein,
 So blaß un trūrig antauseihn,
 Denn weit hei of, wer 't dahn em hett,
 Wer 't Hart em hast'ge schlagen lett;
 Un führt hei sei so bleik un witt,
 Wo s' sachting geiht den Weg entlang,
 Denn weit hei, wat²⁾ sien Dog so bang,
 Worüm dat in sien Hart so ritt.
 Un neege kümmt dei bleike Magd
 Un ficht so truorig äwr 'e³⁾ Muur;
 Ehr Dog, dat führt so still verzagt,
 So thranenmäud in dei Natur,
 As wenn 't dei Welt vör Gott verklagt.
 Un as sei ängstlich üm sich ficht,
 Ob sei of Eine führt doa stahn,
 Un as s' sich achter 'n Düurnbusch bückt,
 Is 't grar so, as dei Bagel dahn,
 Doch nich so munte in den Blick,
 Un woll so schu, doch nich so quick.⁴⁾

1) wanken bedeutet im Plattdeutschen auch wandeln. 2) wat wird, wie hier, häufig für „worüm“ gebraucht. 3) „e“ steht als Abkürzung für den weiblichen Artikel und auch für „hei“ = er, wenn es dem Verbum folgt, z. B. „weit'e“ = weiß er. 4) quick = lebendig, lebhaft.

Sei schlickt sich liesing¹⁾ dicht heran
 Un steiht un süszt: „Schlöpst Du, Gehann?“
 Hei springt tau Höcht: „„Wat? — Schlapen? — Ich?
 Marieken, schlapen? — Gott erbarm! —
 Kumm, sett Die dal““. Un fött den Arm
 Un treckt sei sacht: „„Kumm, sett Di dal.““
 Un seggt dat sülw'ge²⁾ noch einmal,
 Bet dat sei sitt an siene Sied,
 Wo hei sei dichte an sich tüht.
 Sei leggt den Kopp woll up dat Knei
 Un weint so sachten vör sich hen,
 Ehr is so frank, ehr is so weih,
 Hei strakt³⁾ sei äwe denn un wenn:
 „„Laat sin, min Kind, laat doch man sin!
 Rath mal, wo hüt ik wesen bün,
 Ik bün hüt morgen früh upstahn⁴⁾
 Un bün all nah dat Amt hengahn
 Un hew bei Herrn bi 't Amt all⁵⁾ behren⁶⁾,
 Dat s' mi doch Hüsing⁷⁾ geben dehren““,
 „Wat sähren⁸⁾ s' denn?“ — „„Sei sähren —

1) liesing = leise. 2) sülw'ge = selbige. 3) straaken = streichen. 4) upstahn = aufgestanden. 5) all = schon. 6) behren = gebeten. 7) Hüsing = Wohnung und demnächst das Niederlassungs-Recht. 8) sähren = sagten.

Du weitst woll, wo dat denn so is —
 Sei sähren 't of nich för gewiß,
 Sei hahr'n all so vähl Arbeitslühr;
 Un wenn 'k ut't Ritterschaftlich¹⁾ wier,
 Denn süll ik leiverst doch tauseihn,
 Ob 'k doa nich unnekamen kunn,
 In't Fürstlich dürft Kein 'rinne teihn,
 Dei nich geburen wier doarin.""
 „Dat seggt mien Bahre of, Jehann.“
 „Wo? — Hest Du mit em redt? Weit hei Bescheid
 Mit Di?““ — „Oh, fohr mi nich so an!
 Ach nee, Jehann, hei weit
 Nicks von uns' Sün'n un von mien Schan'n.
 Ik hew noch schwegen²⁾ in mien Nöthen
 Un war of schwiegen. Nee, ik kann'n
 Dat Meß³⁾ nich in dat Hart 'rin stöten⁴⁾.“
 Hei drückt sei so vull Leiw an sich:
 „„Mien leiwe Diern, oh schell mi nich!
 Ik weit, ik bün en schlimmen Gast,
 Mien grötstes Unglück is mien Hast.

1) dat Ritterschaftlich un dat Fürstlich = der ritterschaftliche und fürstliche Landesantheil. 2) schwegen = geschwiegen.
 3) Meß = Messer. 4) stöten = stoßen.

Un hüt taumal; mi 's bös tau Mauth.
 Kumm her un wes mi werre gaut!
 Du fast man sehn, wi waren friegen¹⁾,
 Un up den Harwst²⁾ büst Du mien Fruu.""
 „Ach wenn wi nu kein Hüsing friegen!
 Gehann, kein Hüsing — keine Truu³⁾;
 Uns gift kein Preiste nich tausamen,
 Wenn Ein uns nich in Hüsing nahmen."
 „„Ih, wenn wi nahrens⁴⁾ unnekamen,
 Denn treck⁵⁾ wi in dei Stadt herin.""
 „Dat soll man of nich möglich sin."
 „„Je, Jochen is doch 'rinne treckt" "
 „Gehann, von Jochen will wi schwiegen,
 Mit den'n würr dunn dei Schan'n taudecht,
 Dat würr tauglick em überlegt,
 Den Rathsherrn sien oll Diern tau friegen.
 Ach Gott, icf red! — Icf hew kein Recht,
 Dat Mäten noch en Blaam⁶⁾ tau maaken."
 „„Ih, schwieg doch still von sonne Saaken,
 Hebb'n up en Harwst wi noch kein Dach,

1) friegen = freien. 2) Harwst = Herbst. 3) Truu = Trauung. 4) nahrens = nirgends. 5) trecken = ziehen. 6) Blaam = vom französischen blâme.

Denn treck wi furt mit Sack un Pack,
Denn treck w^o dei Kramersdörpe nah,
Denn gah wi nah Amerika.""
Sei faat^t em üm un keek em an:
„Wo giern güng ic^k mit Di, Jehann!
Mit Di, so wiet dei Heben blaag¹⁾!
Du weitst, Jehann, ic^k bün nich zaag²⁾;
Giern wull ic^k äwer 't Wate teihn,
Doch mienen Bahre tau velaaten,
So olt un frank un so allein,
Dat wier von all dei schlichtsten Dathen,
Dei ic^k em andauhn kunn³⁾), dei schlimmst.
Nee, wenn Du hier nich unnekümmst,
Denn bün 'k veluren,
Denn is 'k vebi
Mit Di un mi.
Un wenn mien armes Kind geburen
Hüt ore morrn,
Denn bün ic^k dat, wat Anne worrn,
Denn ward uns' Leiw uns sülwst⁴⁾ tau Gist
Denn wärd dat Leben,

1) blaag = blau. 2) zaag = verzagt, furchtsam. 3) kunn = könnte. 4) sülwst = selbst.

Wat uns tau leben äwrig blift,
 Dörch unse eigne Leiw vergeben¹⁾),
 Un as en lieberliches Voor
 Gelln wi denn in den ganzen Lan'n;
 Denn stigt dei Schan'n
 Von Johr tau Johr,
 Un wenn dat endlich kümmt tau'n Starben,
 Denn möten s' unse Kinne arben.
 Wenn 'k denn mi up mien Lage krümm,
 Denn büst Du nich üm mi herüm,
 Denn kickst Du mi so truu nich an,
 As Du dat sünft woll dehrst, Gehann;
 Un dei in Leiw so tau Di wier,
 Dei scheidt viellicht von Gottes Fer²⁾)
 In Fluch un Haß."

Sei leet em los un störr³⁾ em furt,
 As wier dit all ehr letztes Wurt;
 Hei reet so wild herüm in 't Gras
 Un gnirrschte mit dei Tähn tausamen,
 As wier 't so, as sei fähr, all kamen,
 Un sprüng tau Höcht un stünn in En'n

1) vergeben = vergiftet. 2) Fer = Erde 3) störr = stieß

Un stellt sich vör sien Mäten hen.
 Dat Dog is wild, dat Blaut, dat stiggt,
 Em gläugnichroth¹⁾ in dat Gesicht:
 „Diern,““ röpt²⁾ hei, „Diern, süll so dat kamen,
 Denn halt s' der Deuwel altausamen!
 Denn halt der Deuwel all dei Herrn!
 Ich leet mi schin'n, mit Fäuten perrn³⁾),
 Ich bün't jo anners nich gewen'nt⁴⁾),
 Doch wenn 't mit Di so mal eins en'nt,
 Denn fall en Dunner 'rinne schlahn;
 Dat ehr bei Dogen äwegahn!““
 Un 't Mäten springt nu of tau Höcht:
 „Oh, Gott, Gehann, wat hew icf seggt?
 Wat hew icf seggt, wat hew icf dahn?““
 Un fött em üm un drückt em 'ran:
 „Oh wes doch still, laat sin, Gehann!““
 Hei maakt sich los un schüfft⁵⁾ sei weg
 Un fött ehr Hän'n in sien tausam:
 „„Nu hür, Mariet, wat icf Di segg —
 Icf wull doa ierst man nich mit 'rut —
 Wenn 'k hier bi uns nich unnekam,

1) gläugnig = glühend. 2) röpt = ruft. 3) perrn = treten.

4) gewen'nt = gewohnt. 5) schüfft von schuben; schiebt.

Denn is dat mit dat Friegeut,
 Denn Amt un Stadt, dei häuden¹⁾ sīch.""
 „Ach, un uns' Herr, dei deiht dat nich.""
 „„Hei möt, heit möt; icf laat nich nah.
 Du kannst nich nah Amerika,
 Un Keine will uns Hüfung geben?
 Hier unne unsen eig'nēn Heben
 Kein Platz für uns, för mi un Di?
 Kein Platz in unsern Bahrelan'n?
 Dat wier 'ne niederträcht'ge Schan'n!
 Noah²⁾ nich, Mariel! — Icf bliew doabi:
 Hei möt, hei möt! — Icf gah hen flagen;
 Wie will'n mal dei Gerichten fragen.
 Uns' Herzog will nich, dat en Mann,
 Dei Arbeit mag un Arbeit kāni,
 Ut sienen Lan'n ward 'rute dräben;
 Hei hett Gesetze dräwe schräben³⁾.
 Dat weit'n dei Herrn of ganz genau;
 Wi sünd doa man tau dumm doatau.
 Hei fall un möt uns Hüfung geben!""
 —

1) häuden = hüten. 2) rohren = weinen; eigentlich laut weinen, daher es auch zuweilen für „schreien“ gebraucht wird. 3) dräben und schräben = getrieben und geschrieben.

Marieken lehnt sich an dei Muur
 Un keek em an in stille Truur.
 Sei was so bleik, sei was so blaß,
 Ehr Thranen föllen in 't gräune Gras,
 Sei folgt still vör sich hen dei Hän'n
 Un seggt tau em so lies' un sacht¹⁾:
 „Jehann, so hew ik 't mi nich dacht.
 Nu wull ik, dat wier bald tau En'n!
 Ach Gott, ik möt Die Dienen Globen,
 Dien letzte Hoffnung of noch roben.
 Uns' Herr, dei gift uns keine Stähd²⁾),
 Gif Acht, dei lacht bi Diene Bähd³⁾),
 Un wenn hei hürt, dat ik Dien Bruut,
 Denn jögt hei ut den Deinst Di 'rut.“
 „„Worüm denn dat? Wat süll dat heiten?““
 „Oh foehr nich up! — Du warst woll weiten,
 Hei hett up mi en Haß stets hatt,
 Hei hahr mit mienem Vahre wat,
 Un dat möt ik nu noch entgelln.““
 „„Ja 't is en Hund, en Minschenschinne!““

1) sacht, eigentlich = sanft und dann auch leise, still; ja es bedeutet zuweilen auch „wohl“ z. B. dat will ik sacht dauhn.

2) Stähd = Stätte, Stelle. 3) Bähd = Bitte.

Kümmt hei mal in mien Fust herinne,
 Denn war 'k em mal en Stück vertelln¹⁾!"""
 „Oh nich, Jehann! man keinen Larm!”
 Sei fött em üm un schleicht den Arm
 Em schmeichlich üm den breiden Nacken,
 Strickt em dat Hoa un straakt dei Backen:
 „Oh nich, Jehann, man keinen Striet!
 Den Herrn sien Hand, dei reift so wiet,
 Wen dei einmal vedarben will,
 Den'n kann uns' Hergott sülwst nich rerrn;²⁾
 En Minschenhart mit Fäuten perrn,
 Dat is för den'n ein Kinnespill.
 Jehann, oh häud Di vör den Herrn!”
 „„Wat will hei mi?”” — „Wat hei Di will?
 Besinn Di doch un redt nich so!”
 „„Nicks kann hei, wenn 'k mien Arbeit dauh;
 Un maakt hei mi Bedreitlichkeiten,
 Denn schmit icf em den Kram tau Fäuten
 Un kann mi annerswo vermeiden³⁾."""
 „Dat kannst Du dauhn, dat kannst Du. — Ja.
 Kannst sülwst hen nah Amerika,

1) vertelln = erzählen. 2) rerrn = retten. 3) vermeiden = vermeidhen.

Un süll doarüm mien Hart verbläuden¹⁾),
 Di steiht denn frie bei ganze Welt ;
 Ik un mien Kind , wie sitten hier ,
 Du schickst uns af un an mal Geld ,
 Bet 't Di taulezt denn mal insfällt ,
 Dat 't nu nahgradens naug²⁾) woll wier.
 Doch glücklich warst Du nümmemiehr ,
 Du schlöpft so ruhig nich as sünst ,
 Wenn Di mal drömt , dat ik un 't Kind
 Hier unne einen Herren sünd ,
 Bi den'n Du't nich uthollen künst ."
 Dat packt em an , dat schleicht den Kierl
 As Dunner 'runne von den Dwierl³⁾)
 Bet in bei Lehn⁴⁾). Hei höllt sei saat' ,
 Un ballt dei Fust , stampf mit den Faut :
 „„Denn gah't mi all mein Dag' nich gaut ,
 Marieken , wenn ik Di velaat !
 Wenn ik mi von Di scheiden kün ,
 Denn süll kein Mahn⁵⁾) un keine Sün ,
 Kein Stiern mi schienen all mein Daag ,

1) verbläuden = verbluten. 2)naug und genaug ; auch , genung = genug. 3) Dwierl = Wirbel. 4) Lehn = Zehen.
 5) Mahn = Mond.

Wenn ik Di mi ut den Sinn eins schlag,
 Will ik elend dörch dei Welt hen rönnen,
 Un in dei Höll will ik ewig brennen.
 Ik laat Di nich, ik laat Di nich!
 Hei mag mi martern fürchterlich,
 Hei mag mi schin'n¹⁾, hei mag mi perrn,
 Ik holl hier ut bi unsen Herrn.""
 „Un ik will nie nich werre klagan,
 Will Allens, Schimp un Schan'n vedragen,
 Un wenn ik noch wat Schlimmers wüsst.
 Ik will Di sin, wat Du mi büsst, —
 Oh Herrgott, hür mi hoch in 'n Heben! —
 Dien All'ns, Dien Hart, Dien ganzes Leben!"
 Fast holl'n sei heid sich in den Arm,
 Sei drücken heid sich truu un warm,
 Sei küssen sich vähl duusendmal,
 Dei Thranen fleiten still hendal.
 Ehr Hart, dat is so vull un wiet,
 As 't was in jene seel'ge Tied,
 As sei tauierst sich hebb'n vor Zohren
 Up ewig Truu un Leiw tauschworen.
 Un lang' un lang' stahn sei so doa.

1) schin'n = schinden.

Dei Sünn, dei strahlt so hell un floa,
 As wenn 't nich werre mäglich wier,
 Dat Wolken tögen äwr'e Der¹⁾);
 Dei Heben lacht so blaag un rein,
 As künne kein Falschheit mihr gescheihn.
 Dei lütte Vagel lett sien Jungen
 Un kümmt ganz dicht heranne sprungen
 Un nück mit't Köppken un wippt mit't Schwänzken
 Un maakt von Twieg²⁾ tau Twieg sien Dänzken
 Un singt luut in dei Welt herinne,
 Hei wüsst 't genau un wulst beschwören,
 Dat dei Nümmis³⁾ wat tau Leeden dehren,
 Un flüggt taurügg nah siene Kinne
 Un seggt tau ehr: „Ji lütte Brut,
 Nu piept un schriet Zug⁴⁾ lustig ut!
 Dei dauhn Zug nicks, dei buten⁵⁾ stahn,
 Dei bugen⁶⁾ of sich jezt ehr Nest.
 Un hahr 't för duusend Dahle gahn,

1) Der = Erde. 2) Twieg = Zweig. 3) Nümmis = Niemand.

4) Zug = Euch. 5) buten = außen, draußen. 6) bugen, eigentlich bauen = bauen. Des Hiatus wegen wird im Plattdeutschen öfters ein g eingeschoben, z. B. gruugen für gruuen, grauen; schriegen für schreien; friegen für freien; dreihgen für dreihen = drehen.

If hahr jo dunn nicks Schlimmes dahn,
As if von Mutte'n Brüjam west.
In jene schöne Frühjohrstied,
Wenn Leiw in 't Hart herinne tüht¹⁾),
Denn hett en naug an eigen Freud un Leid;
If weit Bescheid,
Wat Frieegen heit."

Un in dei arme Diern ehr Hart,
Is t' ok, as wenn drin sungen ward,
Bestummt doarin is Schan'n un Sün'n,
Dei Leiw, dei singt so leislich drin'n,
Von Hoffnung singt s' dat olle Leid,
Von Glück un Freud un Seeligkeit,
Von anne Tied un Betewarn²⁾),
Womit s' dei Minschen hett taum Nahren.
Sei seggt tau dat bedrag'ne Hart,
Dat, wenn dei Heben einmal lacht,
Denn kehm nie werre³⁾ düstre Nacht,
Kein Weere⁴⁾ tög heruppe schwart.
So sündt 't in 't Hart dei arme Diern,
Un 't arme Kind, dat glöwt so giern!

1) tüht = zieht. 2) Betewarn = Besserwerden. 3) werre = wieder. 4) Weere = Wetter.

Un as sei noch so seelig stünn¹⁾,
 Dunn geiht gen Abend dal²⁾) dei Sünn,
 Un Sünnenschien liggt in Gewäuhl
 Mit Schatten, dei an 'n Heben teihn;
 Dei Lust, dei is so sucht un schwäul,
 Un Weerewolken sünd tau seihn,
 Dei düste liggen ringsümher
 Un 'ruppe³⁾ trecken wiß⁴⁾ un schwer.
 Doch führt sei nich dei arme Diern,
 Sei hölt sich an den Sünnenstrahl,
 Dei ehr noch lacht tum lezten mal.
 Ach 't Minschenhart, dat glöw't so giern! — —
 „Nu kumm, Jehann, wi möten gahn.“
 „„Oh nee, Marieken, sett Di dal,
 Kumm, sett Di in dat Gras tau mi,
 As Du dat sünst so giern hest dahn.““
 Un treckt sei hastig an sich 'ran.
 Sei schüfft em t'rügg⁵⁾): „Laat sin, Jehann,
 Dei ollen Tieden sünd vebi⁶⁾);
 Gott weit, ob sei mal werre kamen.“

1) stünn = stand. 2) dal = nieder. 3) 'ruppe = heraus.
 4) wiß. Wenn „wiß“ von Bewegung gebraucht wird,
 könnte man es am besten mit „stetig,“ übersetzen. 5) t'
 rügg für tau'rügg = zurück. 6) vebi,vörbi = vorbei.

Un ritt sich los: „Jehann, adjü!
 Ik möt nah Huus, nah mienen Ollen.“
 Hei raapt¹⁾ sien Haut un Steck tausamen
 Un kriegt sei an dei Hand tau hollen²⁾:
 „„Na täuw³⁾, Marieken, ik kam mit.““
 „Nee, nee, Jehann, nu nich! Nu gah!
 Mi's 't gaut, wenn 'k nu alleine sitt,
 Kumm leiwerst⁴⁾ up den Abend nah.“
 „„Ik kam. Adjü!““ — Doa gahn sei hen;
 Hei rechtsch, sei linksch; un denn un wenn,
 Denn stahn sei still un kieken sich
 Einanne nah un winken sich,
 As wull'n sei segg'n: nu wier 't in Reih,
 Nu wier ehr Beiden nicks intwei⁵⁾;
 Nu wull'n s' ehr Schicksal woll erdragen,
 Nu wull'n sei 't mit dei Welt woll wagen.
 Ach, arme Kierl, ach, arme Diern!
 Kennt Ji dei Welt? — Ji wart Zug wunnern!
 Seiht Ji dat lüchten⁶⁾ in dei Fiern?
 Hürt Ji dat dump heräwe dumfern?

1) raappen = raffen. 2) hollen = halten. 3) täuben = warten.

4) leiwerst = lieber. 5) „mi is nicks intwei“ ist eine Redensart für „mir fehlt nichts.“ 6) lüchten = blitzen.

2.

Dei Grand.

Dei Sünn is gahn, dei Nacht bedeckt
 All äwerall dei wiede Welt;
 Dat Weere is heruppe treckt;
 Dei Wind foahrt stootwies äwert' Feld;
 Dei Blitz, dei schmitt sien fahles Licht,
 Männ'g Einen in dat bleif Gesicht
 Un maakt dei Nacht tau-hellig¹⁾ Dag,
 Un Dunner folgt em Schlag up Schlag,
 Dat rund un rings dat rulst un gnittert²⁾
 Un Balk un Wand un Finste schüttert. — —

Dei Herr geiht in den wieden Saal
 Mit groten Schritten up un dal;
 Hei fürcht sich nich, sien Hart is fast,

1) hellig = hell; eine ganz andere Bedeutung hat dies Wort in der Niedensart: „mi is hellig tau Mauth“, wo es matt bedeutet. 2) gnittern, eigentlich = knistern, wird jedoch immer von nahen, grellen Donnerschlägen gebraucht.

Un wenn hei trozig an dei Ruten¹⁾)
 Tauwielen leggt sien hart Gesicht,
 Denn is 't, as wenn en fahlen Glast
 Herut ut siene Dogen lücht,
 Bähl gift'ge, as dei Lüchtung²⁾) buten.
 Un wenn Ein hürt sien barsche Stimm,
 Denn klingt sei in dat Uhr so hart,
 As wenn dei Dunner ringsherüm
 Von ehr tum Besten hollen ward.
 Un up den Sopha hengestreckt,
 Recht leidig, schlapp un matt un bleif,
 Mit sieden Küssen taugedeckt,
 Liggt doa sien Fruu, recht warm un weif.
 Dat hüt 't Gewitter 'ruppe kehm,
 Dat was ehr eig'ntlich unbequem,
 Sei wull grar nah dei Behdstunn gahn,
 Dei sei in'n Dörp³⁾) hett ingericht;
 Dech bi so'n Weere geiht dat schlicht,
 Doa kunn 't Gewitter 'rinne schlahn,
 Un s' kunn sich of doabi verküllen⁴⁾);
 Denn sei is swack, siehr swack un kann nicks dauhn,

1) Ruten = Fensterscheiben. 2) dei Lüchtung = der Blitz.

3) Dörp = Dorf. 4) verküllen = erkälten.

Un wat s' noch deiht, dat deiht s' üm Gotteswillen;
 Is siehr mit Nerven¹⁾ un möt ümme rauhn,
 Sei 's fram, siehr fram, un in dat ganze Land
 Ward s' refent²⁾ tau dei düllsten Framen.
 As hüt 't Gewitter 'ruppe kamen,
 Dunn hahr s' dat Sang'bauf glied tau Hand
 Un hett sich einen Bußgesang utsöcht³⁾
 Un behd so halw luut vör sich hen
 Un wischt dei Oogen denn un wenn
 Un süfzt denn of wat Gefährlichs t'recht. —
 Doch wo 's ehr Kind? Ehr lütte Jung? —
 Oh dei, dei würr herute bröcht,
 Denn as dat an tau werrern fung,
 Un as dat Kind sei quält mit Fragen,
 Dunn kün'nt ehr Nerven nich verdragen,
 Un siene unvestänn'ge Reden,
 Dei stürten sei tau siehr in't Behden.
 Oh dei, dei is gaut upgehaben,
 Dei sitt bi 't Kinnemäten haben⁴⁾). —

Dei Herr geiht an dei Klingel 'ran

1) „siehr mit Etwas sin: Redensart für „an Etwas leiden.““

2) refent = gerechnet. 3) utsöcht = ausgesucht. 4) haben = oben.

Un sängt doa hastig an tau lürren¹⁾.
 Dei nieg Inspecter trett herin.
 „Dei Knechts, dei säl'n dei Pier²⁾ upschirren,
 Un nah dei Füerkübens seihn.“
 „„Is All parat; is All gescheihn;
 Blot Iehann Schütt, dei is nich doa,
 Dei is tau Dörp herinne gahn.““
 „Wo is dei Hund? Dei Mackewoah³⁾!
 Doa fall en Dunner 'rinne schlahn!“
 „„Ah Gott, ich bitt Dich, Balduin!
 Bei solchem Wetter so zu fluchen!
 Kann Gott Dich nicht nach Oben ziehn,
 Dann wird er Dich hier unten suchen
 Und wird Dir das Gewissen schärfen,
 Oh Gott! Bedenk doch meine Nerven!““
 „Ei, halt Dein Maul mit dem Gezeter!
 Ich sag's noch mal: da schlag' das Wetter in
 Hinein, wenn die Befehle nicht . . .“
 Hei seggt 't nich ut, doa schütt⁴⁾ en Licht
 In einen glüagnig breiden Strahl
 Ut schwarte Nacht von 'n Heben dal,

1) lürren = läuten. 2) Pier = Pferde. 3) Mackewoah =
 Mackerwaare, Mackerzeug. 4) schütt = schießt.

As wenn dei Sünn dal schaaten wier.
 Dei ganze Hof, dei steiht in Füer,
 Un Knall un Fall, dei pralst tausamen.
 Un redt mit em en dütlich Wurt;
 Dat was em an dat Mage¹⁾ kamen!
 Blaß pralst hei von dat Finste furt,
 Steiht still vör Schreck un höllt dei Hän'n
 Vör dat Gesicht. — Süll dat woll bren'n? —
 Em früst²⁾ un schüttelt dat as Feewe³⁾;
 Hei stört⁴⁾ herut; sien Hof ligt schwart,
 Doch von den Möllehof heräwe,
 Doa is 't, as wenn dat helle ward.
 Hell blückt⁵⁾ dat up. In lichte Hast,
 As wenn 'ne Katt löpt äwr 'e Fast⁶⁾
 Un springt behen'n von Fack tau Fack,
 So löpt dei Läuchen⁷⁾ äwer 't Dack
 Un licht sich dal
 Un stiggt tau Höcht
 In einen glänigreden Strahl.

1) dat Mage = das Magere. Die Redensart bedeutet: Eindruck machen. 2) früst = friert. 3) Feewe = Fieber.
 4) stört = stürzt. 5) upblücken = sich plötzlich entzünden.
 6) Fast = First. 7) Läuchen = Gluth.

Dei Stormwind segt
 Herin, un as 'ne gläugenige Fahn
 Bülgt sich dei Läuchchen dörch dei Lüchten¹⁾.
 Hoch sitt nu stolz dei rode Hahn
 Un schleicht vör Freuden mit dei Flüchten²⁾. —
 Up jedes Dack leggt sich en Füerschien,
 In jedes Finste blinkt 't, as wenn dat brennt,
 Un „Füer! Füer!“ hürt man schrien,
 Ein Jeder löpt, ein Jeder rönnt,
 As hahr hei ganz den Kopp veluren,
 Un will sien Bäten Armuth rerrn;
 Dunn schallt em plötzlich in dei Uhren
 Dei harte Stimm von sienem Herrn:
 „Hier her! Hier her! Hier All tau Hoop³⁾!“
 Un tägernd folgen s' All den Raup⁴⁾,
 Dei lett den Kuffert⁵⁾, dei dat Berr,
 Denn dei em röpt, dat is sien Herr,
 Bähl schreckliche, as Füersnoth.
 Dat Füer, dat kann sien Alln's vetehren
 Un schmitt em up dat friee Feld;
 Sien Herr kann't of, doch sien Gebot,

1) Lücht = Lust. 2) Flüchten = Flügel. 3) Hoop = Hau-
 fen. 4) Raup = Ruf. 5) Kuffert = Koffer.

Dat kann dei Heimath em verwehren
Un jagt em elend in dei Welt. — —

Un as s' dei Herr tausamen röp,
Dunn rummelt von den Hof 'ne Schlöp¹⁾,
Dei is dei annern wiet vöran,
Un up dei Mähren²⁾ sitt Gehann
Un jögt herinne in den Diek
Un springt mit beide Bein taugliet
In 't Wate 'rin un füllt un deiht
Un schwenkt³⁾ sich up dei Mähr herup
Un jögt doahen in vullen Glopp,
Wo 't Möllehuus in Flammen steiht.
„Hierher, Hallunk! Wo büst Du west?“ —
Dat is den Herrn sien harte Stimm. —
Hei röpt' un ritt dei Mähren 'rüm:
„Hier nah den Hof! Un laat dat Nest
Tum Deuwel in dei Grund 'rin schwälen⁴⁾!“
Gehann gehorcht all dei Befehlen,
Dunn stört' ut Huus dei Möllefruuw:

1) Schlöp = Schleife. Eine Schleife von Band heißt „Schleuf.“ 2) Mähr für Pferd, hat im Plattdeutschen nicht den verächtlichen Nebenbegriff, der im Hochdeutschen häufig damit verbunden wird. 3) schwenken = schwingen. 4) schwälen, eigentlich = glimmen.

„Mien Kind! Mien Kind! Oh, rerrt mien Kind!
 Doa baben in dei Gebelstuw.““
 Jehann herunne as en Wind,
 Den Kittel¹⁾ äwer 'n Kopp, stört't nah dei Döhr:
 Dei Herr, den Tägel²⁾ in dei Hand, springt vör
 Un schleicht in vulle Wuth nah em:
 „Hallunk! Hierher! Wo willst Du hen?“
 Hei hürt dat nich, hei acht't dat nich;
 Dei Mähren schnorken, schuen sich;
 Dei Herr hölt wiß, sei gahn in En'n³⁾
 Un rieten em dei Tägel ut dei Hän'n;
 Hei föllt, un 't ganz Gedriew⁴⁾
 Von Pier un Schlöp geiht äwer stenen Liew.
 „Tau Hülp! Tau Hülp! Holt an! Holt an!““
 Un ut dat Gebelste schriet Jehann:
 „„Nem Gotteswillen bringt 'ne Lerre⁵⁾!““
 Un hölt dat Kind un winkt un röpt,
 Un All'ns röpt mit un schriet un löpt,

1) Kittel wird in unserer Gegend nur für einen Leinwandrock gebraucht; ein solches Kleidungsstück von Luch heißt: Rock. 2) Tägel = Zügel. 3) in En'n gahn = sich bauen; es wird auch der Ausdruck „sich steideln,“ von „steil,“ dafür gebraucht. 4) Gedriew = Getreibe. 5) Lerre = Leiter.

Un Reine deiht, wat nügen kann,
Bet endlich dei oss Faureknecht¹),
Oll Daniel, ein 'ranne leggt.
„Nu kamt man her un saat mit an!“
Dörch Roof un Füer stiggt Gehann
Un hett dat lütte Worm in 'n Arm;
Un still mit einmal is dei Larm,
Kein Raup ward luut, kein Murt ward hürt,
Blot Füersuisen, Funkenknattern.
As wier ehr All dei Nehl tauschnürt,
Stahn s' doa un seihn em 'runne flattern.
Un blot dei olle Faureknecht,
Dei kicht so still un wiß tau Höcht:
„Man sach, mien Sähn Gehann, man sach!
Den Faut bet linksch! Nimm Di in Acht!
Nu is hei up dei letzte Tram²),
Dei Mutte schmitt sich up ehr Kind:
„Mien Kind! Mien Corl!““ Doa schütt dat
Dach tausam,
Un duisend Funken wirbeln in den Wind. —
Un all dei Minschen athen werre,
Un ringsherüm, doa hürt man fragen:

1) Faureknecht = Futterknecht. 2) Tram = Sprosse.

„Wer was 't, wer steeg doa von dei Verre?
 Wer halt dat Kind? Wer dehr dat wagen?“
 Sien Nam', dei güng von Mund tau Mund:
 „„Dat was Jehann, was Jehann Schütt!
 Hürst Du, Mariek? Hei halt dat Lütt.““
 Ach Gott, wo seelig sei doa stund!
 Wo hoch würr ehr dat Hart nich schlagen!
 Wo was dat vull von Freuden-Schuur'n!
 Woll hahr sei 't hürt, mit duusend Uhr'n
 Hahr sei dei Nahricht in sich sagen¹⁾.
 Sei drängt sich dörch. „Wo is Jehann?“
 Sei möt tau em, bei Hand em drücken,
 Sei möt in 't helle Dog em blicken,
 Möt seihn, wo stolz hei wesen kann.
 „Jehann! Jehann! Mien leiw Jehann!“
 So schmitt s' sich an sien Bost heran.
 Hei deiht dat blonde Hoa ehr strieken
 Uu flüstert sacht: „„Laat sin, Marieken!
 Mien Mähren sünd mi stü'rlos²⁾ worrn,
 Dei möt ik hebb'n. Laat sin bet morrn!““
 Un dei oll Daniel, dei seggt:

1) sagen = gesogen. 2) stü'rlos, eigentlich = steuerlos; von
 Pferden gebraucht = wild.

„Gefohr is nu nich mihr vörhannen,
 Dees' Regen löscht von sülwst dat Für,
 Un of dei Stormwind hett sich leggt.“
 Un Allens drängt sich üm Gehannen:
 „„Hier,“ seggt dei Ein, „„hier sünd Dien Pier!““
 „Dien Schwäp¹⁾), Gehanning!“ seggt dei Anne.
 „„Hier is Dien Kittel!““ Jeder möt
 Em wat tau gauden dauhn up siene Dart.
 Un as hei nu Mariel ümfött,
 Dei an em hängt un seelig roahrt,
 Dunn seggt oll Daniel: „E is woah,
 Dat is in'n Dörp dat brawste Poa!“
 Dunn wünscht ein Jeder still bei Beiden
 Dat schönste Glück un duusend Freuden.

Blot Ein steiht assied²⁾ in dei Fiern
 Un führt vull Grimm bei arme Diern,
 Un Afgunst³⁾ schämert ut sien Dog,
 As sei den Knecht so an sich tog.
 Un as hei fleiten seeg ehr Thranen,
 Dunn schneerten sich sien Ogenbranen⁴⁾
 So dicht tausam. Is 't von den Fall?

1) Schwäp = Peitsche. 2) assied = abseit, bei Seite. 3) Afgunst = Mißgunst, Neid. 4) Ogenbranen = Augenbrauen.

Is 't von dei Weihdaag¹⁾ in dei Hüft?
 Oh nee! dat is von Gift un Gall,
 Von dei dat Hart em äwedrist.
 Doch as, ehr Kind in 'n Arm, sich nu
 Heranne drängt dei Möllesfruu
 Un ehren heiten Dank utschürrt
 Un up Iehannen allen Segen
 Von Gott in 'n Himmel 'runnebirrt,
 Dunn kann hei 't lange nich verdrägen,
 Dunn kann hei 't lange nich anseihu;
 hei hinkt bi Sied un winkt un Ein,
 Dei möt em nah sien Schloß henlerrn²⁾. —
 Iehann, Mariel! Oh, häurt Zug vör den Herrn!

1) Weihdaag, eigentlich = Wehtage d. h. Schmerz. 2) lerrn
 = leiten, führen.

3.

Dei Schimp.

'T is Sündag werre; helle Sünn
 Riekt fründlich in dei Stalldöhr 'rin.
 'T is Sündagmorrn, 't is nicks tau dauhn:
 Dei ollen Mähren stahn un rauhn,
 Dalluhrig¹⁾ stahn s, deip in Gedanken,
 Wotau sei sünd? tau Höcht den Bein,
 Un af un an denn stampf mal ein
 Un schnappt vedreitlich nah dei Flanken²⁾
 Un schwäpt sich mit den Staart herümme
 Un jagt von 'n Puckel sich den Brümme
 Un streckt sich dal un leggt sich hen
 Un wählt³⁾ sich up dei frische Streu;

1) dalluhrig = mit hängenden Ohren. 2) Flanken, auch Lan-
 ken = Seite, vorzugsweise die Stelle zwischen Rippen
 und Hüfte. 3) sich wählen = sich vor Vergnügen wäl-
 zen. Das bloße Wälzen heißt: „Wöltern.“

Oll Schimmel-Hans halt denn un wenn
 Von siene Röp¹⁾ en Loppen²⁾ Heu
 Un ficht sich üm so mäud un still,
 Un nickt, as wenn hei seggen will:
 „Si, junges Volk, täuwt³⁾ man en Bäten,
 Denn war Si 't Upstahn woll vergeten.“
 Un båwert⁴⁾ up sien krummen Knei
 Un schuddert⁵⁾ sich dei Fleig von 't Fell,
 Un ornlich süfzt dat olle Vieh,
 As wenn em lang' vergahne Noah,
 Sien schöne Jugendtied inföll,
 As noch was schwart sien junges Hox,
 As siene Knaken noch ahn Tadel,
 As Rein em noch tau Arbeit dwungen,
 Un hei noch frie von Toom⁶⁾ un Sadel,
 As Fahlen was herümmesprungen. —

Un rings so still un dunstig is 't;
 Oll Daniel reckt sich harthaft mal
 Un halt sien Pußmeß⁷⁾ sich hendal

1) Röp = Raupe. 2) Loppen = ein Flausch. 3) täuben = warten. 4) båwert = zittern. 5) schuddern = schauern; d. h. mit der Haut eine zitternde Bewegung machen. 6) Toom = Baum. 7) Pußmeß = Rasirmesser.

Un stellt sich an dei Faurekist,
 Doarup sien Stückschén Speigelglas
 Un fohrt sich mit den Quast verdwas¹⁾)
 'Rin in dat olle gries' Gesicht,
 Un set't dei Tung 'rin in dei Backen
 Un fängt nah Kräfsten an tau racken²⁾),
 Bet hei den Boart herunne krigt. —
 Dei is en Bäten lang em worrn,
 Is von dei ganz verläden³⁾ Woch,
 Nu schrient⁴⁾ em dat — indessen doch —
 'Run möt 'e, denn 't is Sündagmorrn. —
 Gott Louw un Dank! Nu is hei 'runne!
 Hei stoppt dat Blaut nu noch mit Tunne⁵⁾),
 Verwoahrt dat Meß, dat Glas, den Quast,
 Treckt sich den Hosendräge fast
 Un bin'nt 'ne reine Schört⁶⁾ sich vör
 Un trett nu 'rute ut dei Döhr.
 So steiht hei doa in vullen Staat;
 Nu kann 'ne Gräwin kamen, hei 's parat.

1) verdwas = verqueer. 2) racken = kraßen. 3) verläden = vergangen. 4) schrienen = von Schmerzen an der wunden Hautoberfläche gebraucht. 5) Tunne = Zunder; Feuerschwamm. 6) Schört = Schürze.

Un vör dei Döhr, doa sitt Jehann.
 Oll Daniel schüfft¹⁾ sich an em 'ran
 Un schüfft en Priemken mang dei Tähn:
 „Wo büst Du west, Jehann, mien Sähn?“
 „„Tau Dörp. Mariek wull Middag kaaken²⁾,
 Dunn haut ik ehr dat Buschholt klein.““
 „Dat laat den Preiste man nich seihn.“
 „„Du leiwer Gott, wat soll en maaken?
 Dei ganze Woch geiht dat Geslaw³⁾,
 Dei Diern möt Dag för Dag tau Haw⁴⁾,
 Wenn soll sei denn den Kram besorgen,
 Wenn anners, as den Sünndagmorgen?““
 „Je, 't soll nu äwerst doch nich sin.“
 „„Dat weit ik woll; wi sälen behren
 Un sälen in dei Kirch herin.
 Dei dei Gesetze maaken dehren,
 Dat sünd dei Rieken, sünd dei Herrn,
 Dei Armuth dauhn s' doabi nich fragen;
 Wi möten 't dauhn, wi möten 't dragen,

1) schüfft, von schuben = schieben. 2) kaaken = kochen. 3) Geslaw. Slaven heißt: Slaven-Arbeit verrichten und wird für jede täglich wiederkehrende, schwere Arbeit gebraucht. 4) tau Haw = zu Hofe gehn, gezwungene Hofdienste verrichten.

Un wenn s' uns of mit Fäuten perrn.""
 „Jehann, mien Sähn, nimm Di in Acht,
 Dat sich dei Böß nich inschlickt in Dien Hart;
 Ahn dat wi 't marken, kümmt hei äwe Nacht
 Un malt uns dei Gedanken schwart.
 Du wierst süs so'n taufreden¹⁾ Blaut,
 An so wat hest Du nie nich dacht,
 Du dehrst Dien Ding' so wollgemauth,
 Dien Hart was froh, kein Arbeit würr Di schwer;
 Nu kümmt Du mi ganz anners vör."
 „„So? Bün ik anners? — Daniel, ja,
 Ik weit, ik bün ganz anners worn,
 Ik hew kein Rauh nich, wo ik stah un gah,
 Dat jögt mi ümme hen un her,
 Un is dat hüt, denn wünsch ik, dat wier morrn.
 Ach Gott! Wat is dat Hart mi schwer!
 Ik hew 't well markt: Du weitst Bescheid,
 Wo 't üm mien arm Marieken steiht.
 Dauh 'k up den Harwst kein Hübung friegen,
 Denn kann 'k dei arme Diern nich friegen,
 Denn möt en Unglück noch gescheihn,
 Den Jamme kann ik nich anseihn.

1) taufreden = zufrieden.

Blot Hüfung, Hüfung! Wiere fall
 Mi Kein wat dauhn. — Wat red ik All!
 Di is 't in'n Leben nich so gahn,
 Kannst nich mien Noth un Angst vestahn.""
 Un dei oll griese Faureknecht,
 Dei richt't sich still un iernst tau Höch
 Un steiht vör em un kicht em an:
 „So? Weitst Du dat? Meinst Du, Gehann?
 Was of mal jung, was of mal stark,
 Mien Knaken vull von kräftig Mark,
 Mien Dog' was floa, mien Hart was frisch,
 Mien Leben was 'ne gräune Wisch¹⁾),
 Un up dei Wisch, doa bläuht 'ne Ros',
 So schön un hell, so vull un rieß,
 Woll ebenso as Dien Mariek.
 Un was ik von dei Arbeit los
 Des Abens, wenn dei Schatten teihn,
 Denn seet ik mit mien Ros' allein,
 Un wat wi redten, wat wi spröken²⁾),
 Dat steiht mi deip in'n Harten schräben,
 Un lewig³⁾) is 't mi ümme bläben

1) Wisch = Wiese. 2) spröken = sprachen. 3) lewig = lebendig.

Un blist' bet dat mien Hart deicht breken."
 Gehann springt up un kriegt den Ollen
 Bi siene bewrig¹⁾ Hand tau hollen:
 „Worüm hest Du sei denn nich nahmen?"" —
 „En Worm was in mien Ros' 'rin kamen,
 En Worm hett miene Blaum vedorben;
 In Noth un Elend is sei storben.
 Mien Herr, dei hett sei sowiet bröcht²⁾).
 Hei was dei Herr, if was dei Knecht;
 Mien Hart blörr³⁾ un'n, sien Hand was haben,
 Hei brök⁴⁾ mien Ros', if hew s' begraben."
 „Wer was Dien Herr? Wer was Dien Bruut?"" —
 „Mien Herr was unsen Herrn sien Bahre."
 „Un Du reest⁵⁾ em nich jede Ahre⁶⁾),
 Du reest sien schwartes Hart nich ut?"" —
 Un dei oll Daniel wendt sich üm —
 Sien Dog, dat gläucht, sien Lipp, dei bewt —
 Un seggt mit bewerige Stimm:
 „Mien Sähn, mien Sähn, uns' Herrgott lewt.
 „Mein is die Nache," hett hei seggt;

1) bewrig = zitternd. 2) bröcht = gebracht. 3) blörr = blutete.
 4) brök = brach. 5) reest = rissest. 6) Ahre = Ader.

Hei hett sien Hand nahst¹⁾ up em leggt,
 Hei is in Sünn'n un Schan'n vegahn;
 Ik was un blew sien Faureknecht
 Un hoff, ik war vör Gott bestahn.
 „Mein is die Rache!“ Denk doaran,
 Dat is en Trost för uns, Gehann.“

Un Daniel geiht; Gehann, dei sitt
 Nahdenklich doa, den Kopp gestüt't,
 Un denkt an Danieln stene Rehr,
 „„Nee,““ seggt 'e, „„wenn ik 't wesen dehr,
 Un mi wier 't as den Ollen gahn,
 Denn hahr ik woll wat Anners dahn.
 „Mein is die Rache!“ spreckt dei Herr.
 Dat is recht gaut. Ja! Åwe wer
 Lett sich sien Ein un Allns vedarben
 Un leggt doabi dei Hän'n in 'n Schoot? —
 So tautauseihn? — Nee! — Leiwerst dodt!
 Hei ore ik! — Nee, Ein müft starben!“
 Un ballt dei Fust un schleicht up 't Knei:
 „„Ja, 't is dei ew'ge Litanei:
 Von Morris bet Abends in den Sälen²⁾!“

1) nahst und nahsten = nachher, hernach. 2) Sälen = Sielen.

Wi möten 't dauhn, un sei befehlen.
 Ob Ein dei Knaken kann noch rögen¹⁾,
 Wer frägt doanah? — Genaug — wi sälen!
 Un wenn s' denn blot uns' Hart mal frögen
 Un 'rinne seegen²⁾ in uns' Noth
 Un günnten uns uns' Bäten Brodt
 Un günnten uns man blot dei Stähr
 Un as en Minsch tum Minschen stün'n,
 Denn wull w' ehr Macht un Riekdauhm gün'n,
 Denn würr kein Arbeit uns tau schwer.
 Wek sälen 't dauhn un säln' dei Lühr
 As Minschen hollen; äwerst hier!
 Hier hett Kein mihr en heilen Rock,
 Hier is dat däglich Brodt dei Stock,
 Un Schandwüür is hier noch dat Best.
 So is uns' Herr, so is sien Bahre west.
 Dat is 'ne wahre Schinneban'n³⁾!"""
 Un as hei noch so sitt un simmt,
 Dunn kümmt tau em en lüttes Kind,
 Dat schmeichelt sich so an em 'ran
 Un krawwelt⁴⁾ em in sienem Boart

1) rögen = röhren. 2) seegen = sähen. 3) Schinneban'n = Schinderbande. 4) krawweln = krauen.

Un ei't¹⁾) so vähl un ficht so wiß
 Em mit dei groten Dogen an,
 So recht nach säute Kinneoart.
 Will up em rieren so, as süs,
 Un hölt sien Hand mit beide Hän'n
 Un springt herümme vör Verlangen
 Un will up 't Knei heruppe rangen²⁾).
 Jehann, dei böhrt³⁾ em of in En'n
 Un up dat Knei un lett em rieren.
 Wo schwart of sien Gedanken wieren,
 Bi so 'n unschüllig Kindsgesicht,
 Doa stellt dat Licht sich werre in,
 In em schient werre Leiw un Sünn;
 Dei Haß vegeiht, dei Schatten flüggt.
 Hei böhrt dat Jüngschen vör sich hoch
 Un ficht em in dat Kinneoog.
 „„Nee,““ seggt hei, „„nee, Du leiwes Kind,
 Du warst nich, as Dien Öllern sünd.
 Is in Dien Ahrern of ehr Blaut,
 Du deihst einmal dei Armauth gaut;

1) eien, eigentlich = „ei! sagen;“ vom Schmeicheln der Kinder gebraucht. 2) rangen, hier soviel als klettern. 3) böhren = heben.

Du drügst mi nich, Dien Dog is woah!""
 Un strickt taurüg dat lockig Hoa
 Un kückt vull Leiw dat Jüngschén an
 Un drückt 't an 't weike Hart heran
 Un drückt sien Lipp up sienem Mund
 Un küßt em recht ut Hartens Grund.

Un as hei 't dehr, dunn müßt 't gescheihn,
 Dat dei Mama kam ut den Goähren;
 Dei frame Fruu, dei müßt dat seihn,
 Begünn gewaltig up tau foahren:
 „Arthur, hier her! Unnützer Bube!
 Marsch! Fort mit Dir! Fort in die Stube!
 Und Er? Wie kann so'n Kerl es wagen,
 Mein Kind, das Kind des Herrn, zu küffen?
 Wart Er! Der Herr, der soll es wissen.“ —
 As hahr 't Gewitter in em schlagen,
 Foahrt hei tau Höcht. Dat Blaut dat schütt¹⁾
 Em gläugnig in 't Gesicht; hei bitt²⁾
 Dei Tähn tausam. Dat dehr em packen:
 För so vähl Leiw so 'n schändlich Wurt!
 Hei mügt vör Schimp un Schan'n versacken³⁾),

1) schütt = schießt. 2) bitt = beißt. 3) versacken = versinken.

Un as dei frame Fruu was furt,
 Dunn föllt hei up den Siß taurügg:
 „„Dat hew ik wulst! — Dat is mi recht!““
 Un Daniel steiht bi em un seggt:
 „Jehann, Du kennst dei Welt noch nich:
 As witte Duuw¹⁾ mit schwarte Raaw,
 So stimmt tausamen Herr un Slaw.
 Ehr Burthel geiht woll Hand in Hand,
 Sei wahnen heid in einen Land,
 Sei athen heid dei sülwig²⁾ Lust
 Un rauhn viellicht in eine Grust;
 An einen Gott, doa wen'n³⁾ sei sich;
 Doch Hart un Hart, dat findet sich nich.“

1) Duuw = Taube. 2) dei sülwig = dieselbe. 3) wen'n = wenden.

4.

Dei Hass.

Dei schönste Dag in 't ganze Joah
 Stiggt liesing 'ruppe hell un floa;
 Jacobidag, wenn Rogg ward meiht,
 Wenn Seegen up dei Felle steiht,
 Un sündenreines Gottes Gold
 Sich leggt up Wolf un Barg un Holt¹⁾;
 Wenn Gott dei olle schöne Welt
 Mit Glanz un Pracht umwunnen höllt,
 Wenn hei sei fött²⁾ so weik un warm
 In siene truue Vahrersarm,
 Mit Seegen siene Hand drup leggt
 Un, as den säwten³⁾ Dag, ehr seggt,

1) „Holt;“ in einigen Gegenden auch: „Busch,“ wird für „Wald“ gebraucht. 2) fött, von faaten = fast. 3) sät-ten, von säben = siebenton.

Dat Allens up sien leive Jer¹⁾
 Recht gaut un tau sien Freuden wier. —

Noch liggt dei Welt in deipen²⁾ Droom,
 Noch liggt dei Nacht up Barg un Boom;
 Up Gras un Busch, doa liggt dei Daak³⁾ ,
 Doch in den Morgen ward dat waak⁴⁾ ,
 Un Nacht vergeiht, un Schatten flüggt ,
 Un ümme helle, floare stiggt
 Dei Dag herup mit siene Dual ,
 Mit siene Arbeit, siene Lust ,
 Un mächtig schütt en hellen Strahl
 Zum Heben hoch dörch Nebeldust ,
 Un duusend anne folgen d'rup :
 Dei Sünne geiht up ! — —
 Un as sei upgeiht in ehr Pracht ,
 Waakt Schall un Farw ut Schlap un Nacht ,
 Dei Blaum ward bunt, dei Boom ward gräun ,
 Dei Jer so herrlich antauseihn ,
 Dei Heben blaag⁵⁾ , un dörch dei Höh .
 Gahn Wolfenschäp⁶⁾ up stille See.

1) Jer = Erde. 2) deip = tief. 3) Daak = Thau. 4) waak = wach. 5) blaag = blau. 6) Schäp, Plur. von Schiff = Schiffe.

Dat is en Kuß, den hett dei Heben
 Dei Ter in Leiw un Andacht geben.
 Un dörch dei Welt, doa klingt en Klang,
 Dei hürt sich an as: Leben! Leben!
 Dat is dei Ter ehr Morgensang.
 Dei Blaum, dei böhrt¹⁾ den Kopp tau Höh,
 De Draussel schleicht²⁾ den iersten Schlag,
 Un ut den Busch 'rut trett dat Reh,
 Un Allens grüßt den jungen Dag. —

Oh, junge Dag, oh, Morgensünn,
 Schien of in 't Minschenhart herin!
 Wat düste west³⁾), maak hell un floa,
 Un warm maak d'rin, wat kolt is west!
 Dei Arbeit von dat ganze Joah,
 Dei sieert hüt ehr Freudenfest.
 Dei sünst⁴⁾ des Joahrs in Noth un Leid,
 In Lumpen dörch dei Welt hengeiht,
 Dei Arbeit, dei sünst so veracht't,
 So kümmerlich bi Geld un Macht

1) böhrt = hebt. 2) schleicht = schlägt. 3) west, auch we-
 sen = gewesen. 4) sünst, abgekürzt auch „süs“ = sonst.
 „Sünst des Joahrs“ ist eine Redensart für: „im übri-
 gen Theil des Jahres.“

As Schnurre¹⁾ an dei Döhren steiht,
 Dei steiht hüt hier in lichte Pracht,
 Den Kopp so hoch, von schweren Dahren²⁾
 Dei rieke, goldne Kron in Hoaren.
 Sei führt as Kön'ginn äwr 'e Welt,
 Dei Allens richt um Allens höllt. —

Sei winkt, un Allens drängt sich 'ran,
 Ehr Volk, dat stellt sich Mann för Mann;
 Ehr Volk hett wunnefrischen Mauth,
 Den Blaumenstruuz³⁾ vör Bost un Haut,
 Dat Hart vull Lust un vull Begehr,
 Un äwr 'e Schulle⁴⁾ schwere Wehr,
 So drängt't sich 'ranne mit Gesang;
 Dei Boom⁵⁾ ward in dei Fer 'rin set't,
 Dei Seiß⁶⁾ ward wet't. —

Wat gift dat för en scharpen Klang! —
 „Un nu mit Gott, wi willn 't wagen!“
 Se war'n in heiten Sommersdagen,
 Dei lust'gen Arbeitsschlachten schlagen. —

As wenn dei Mahn durch Wolken treckt,

1) Schnurre = Bettler. 2) Dahren = Ähren. 3) Struuz = Strauß. 4) Schulle = Schulter. 5) Boom = Baum, hier der Sensenbaum. 6) Seiß = Sense.

So gahn dei Seißen dörch dat Kuurn¹⁾),
 As wenn in Tiern dei Bülg²⁾) sich brecht,
 So süfst un runsch³⁾) dat in dei Uhr'n⁴⁾).
 As wenn in Ternst hier schlagen wad,
 So war'n dei Seißen mächtig schwungen;
 Dei Dahren sacken up dat Schwad,
 As wier in Ternst dei Fiend bedwungen.
 Un doch is hier von Fiend kein Ned,
 Hier deiht 't kein Muurd un Doodschlag geben:
 Alläwerall is Freud' un Freed,
 Un All'ns is Lust, un All'ns is Leben. — —

Jehann, dei deiht den iersten Hau⁵⁾),
 Hei meiht⁶⁾ dei Annern hüt vöran;
 Strack trett hei an den Röggen 'ran,
 Süht nah sien Lag' un ficht genau,
 Wo hei'n am Besten faaten kann;
 Deiht drup dei Seiß noch einmal strieken:
 „So, nu mit Gott! Nu kumm, Marieken!“
 Sien Diern, dei folgt dat Schwad entlang

1) Kuurn = Korn. 2) Bülg = Welle. 3) runschchen ≡ ran-schen. 4) Uhren = Ohren. 5) Hau = Sieb. 6) meiht = mäht.

Un rafft dei Garw un schlingt den Schrank¹⁾;
 Dei Arbeitslust, dei lett vergeten
 Dat Leid, wat ehr dat Hart terreten.
 Un nah Jehann'n kümmt Jochen Plahsten,
 Un dei lütt Friedrich kümmt dennahsten²⁾;
 Fiel³⁾ Schulten bin'nt; „Diern, spaud⁴⁾ Di doch!
 Un wohr Dien Bein! If hau Di noch.“
 Un denn kümmt Krischan „mit bei Näs“⁵⁾
 Dei is, as ümme, in den Däf⁶⁾;
 Sien Achtermann⁶⁾, oll Brümme, seggt:
 „Jung, büst nich klauk? wat meihst Du t'recht?
 Legg doch Dien Schwad egalemang,
 Dat kann jo süss kein Deuwel binnen!“
 Up Brümmern folgt oll Havemann,
 Dei kann den rechten Tog nich finnen:
 Sien Seiß, dei steiht em nich tau Dank.
 „„Na, Barre, will 't oll Ding nich stahn?““

1) Schrank, von schränken, verschränken, ist eine eigenthümliche Schlinge, in welche das Korn gebunden wird. Ein festgeknötes Strohband heißt „Seil“. 2) Dennahsten, eigentlich = dann nachher, nachher, darauf. 3) Fiel, Fieken, Abkürzung für „Sophie, Sophiechen.“ 4) spaud = spute. 5) in den Däf sin = ohne Nachdenken und Aufmerksamkeit sein. 6) Achtermann = Hintermann.

Seggt tau em Jochen Rederank,
 „„Treck doch den Haken¹⁾ bet heranne! —
 Na, ik will in Dien Schwad 'rin gahn,
 Du nimmst denn nahsten Di en anne.““
 Un as dei Lebt kümmt Barre Toppel,
 Dei is kein Fründ von Gel un Hast,
 Hei is en ollen tragen Gast²⁾)
 Un meiht verdeuwelt lange Stoppel:
 „Dei Läng“, seggt hei, „dei hett dei Last³⁾).
 Ja, meiht Si man! Man ümme tau!
 Mi laat 't mit 't Jagen hübsch in Rauh.“ — —

As wenn des Harwsts an 'n Heben hoch
 In langen, drangen, schragen Tog⁴⁾)
 Dei Kraunen⁵⁾) trecken in dei Fiern
 Un 'runne juchen in dei Welt,
 So treckt dei Tog von Knecht un Diern
 Sich schrag un juchend äwer 't Feld.

1) Zum Unterschied von der Grassense, die einen Bügel hat, hat die Kornsense zwei gabelähnliche Haken, die zum glatten Hinlegen des Korns dienen. 2) Gast hier soviel als Gesell. 3) „dei Läng, dei hett dei Last,“ Redensart für: eine langdauernde Arbeit macht Mühe, auch wenn sie nicht sehr schwer ist. 4) Tog = Zug. 5) Kraun = Kranich.

As bi den Kraunentog dei Lahmen
 Beängstlich zappeln mit tau kamen,
 So zappeln, as bei Tog hentüht,
 Dei Hockers¹⁾ ängstlich an sien Sied,
 Un griezen hier un griezen doa
 Un schlepen schwoare Garben 'ran
 Un stufen²⁾ s' an dei annern an
 Un puhsten³⁾: „Barre, äwe Jahr
 Is doch dei Rogg' ganz hellischen⁴⁾ schwoar⁵⁾“

Dei Wewe⁶⁾ zappelt un dei Schniere,
 Schaulmeiste of troß sienem Haust⁷⁾),
 Kahrmake, Muure un so wiere,
 Ein Jeder hett sien Garben packt,
 Sei möten helpen in den Aust⁸⁾),
 So steiht 't in ehren Cunteract.
 Un ganz taulezt, doa kümmt noch Ein,
 Dei is so vörnehm antausehn;
 Man führt, dat hei tau 't Volk nich hürt,

1) Hockers = Aufhocker, welche das Korn in Hocken, Haufen, zusammenziehen. 2) stufen = stauchen. 3) puhsten, eigentlich = blasen; hier = feuchten. 4) hellischen = höllisch. 5) schwoar und schwer werden beide gebraucht. 6) Wewe, Schniere, Kahrmake, Muure = Weber, Schneider, Kademacher, Maurer. 7) Haust = Husten. 8) Aust = Grindte.

Dat hei dat Ganze kummandirt,
 Dat is dei olle Ahreboa¹⁾,
 Dei sich all hett so männig Toah
 Zum Königrief dit Dörp utsöcht²⁾)
 Un all dei leiven Kinne bröcht.
 Hei ficht so ierusthaßt un so wiß,
 Ob Allns of richtig is, as süss;
 Bekift dat Schwad von einen Jeden
 Un schient in 'n Ganzen siehr taurfreuden,
 Hei munstert³⁾ sich den ganzen Tog,
 Un winkt em sienen Biesall tau
 Un grüßt un nicht in stolze Rauh —
 Doch let 't binah, as wenn 'ne Pogg⁴⁾)
 Hei jedesmal bi 't Nicken nimmt —
 Hei böhrt so stolz un hoch bei Bein
 Un wad't so vörnehm dörch dei Stoppel,
 Un as hei an den Lezten kümmt,
 Uem doa of mal eins nah tau seihn,
 Schürrt⁵⁾ hei den Kopp: „Nee, Barre⁶⁾) Toppel,
 Dien Schwad is mi denn doch tau klein,

1) Ahreboa = Storch. 2) utsöcht = ausgesucht. 3) munstern = mustern. 4) Pogg = Frosch. 5) schürrt = schüttelt. 6) Barre = Gevatter.

Un hest of halmt¹⁾). Nee, dat möt nich gescheihu!
 Ik hew Di alle Joah Ein bröcht
 Un hew s' von 't beste En'n utsöcht;
 Nee! Åwe Joah²⁾ doa bring 'k Di Kein!" —

Un ümme heite brennt dei Sünn,
 Sei steiht all³⁾ in den Middag 'rin;
 Dei Schweit, dei drüpppt⁴⁾ von Back un Stiern,
 Doch ümme frisch is Knecht un Dieru,
 Noch lett dei Arbeit Keine schliepen⁵⁾,
 Blot, dat s' mal nah dat Leggel⁶⁾ griepen.
 Un Middag is 't, dei Behdklock stött;
 Dei Seiß up 't Schwad, dei Hark doabi!
 Dei letzte Garw ward 'ranneset't.
 Un äwer 't Feld doa kümmt 'ne Cumpanie
 Von lütte Etendrägers⁷⁾ 'ranne quöcht⁸⁾,
 Dei All dei Ahreboa hett bröcht —
 Un iehr 't nich dei, denn dehr 't dei leive Gott —

1) halmen, Verb., wird vom Mäher gesagt, wenn er einzelne Halmen stehen lässt. 2) åwe Joah = dieses Jahr. 3) all = schon. 4) drüpppt = tropft. 5) schliepen = schleifen und schlüpfen, entschlüpfen. Hier das Letztere. Die Redensart bedeutet: in der Arbeit nicht nachlassen. 6) Leggel = ein hölzernes Löffchen. 7) Essenträger. 8) quöhen = leuchten; auch husten.

En Jeder dröggt en Henkelpott¹⁾ ,
 Un dörch dei hohen Stoppeln russelt
 'T oll lütt Gewes²⁾ un krüppt³⁾ un pusselt⁴⁾
 Dörch 't hohe Krut an 'n Graben-Rand
 Un wesselt⁵⁾ slietig⁶⁾ Hand mit Hand,
 Den Lepel⁷⁾ dörch bat Knooplock tagen,
 So kamen s' 'ran un säufken⁸⁾ , fragen :
 „Corlin, Mariel? Wo is uns' Fieß?
 Wo is uns' Bahre?“ — „„Höching hier! —
 Wat? Ornlich Spickgaus, ornlich Bier?
 Ji sünd upstunns⁹⁾ woll hellischen rief,
 Un Mutte dei spandirt woll wat?““
 „Krischäning, an dei Hock, linksch von dit Schwad,
 Doa steiht mien Kiep¹⁰⁾ un liggt mien Rock,
 Dei bring' mi achte deese Hock. —
 Du, dumme Klas, ik segg jo „linkschen;“
 Doa achte glied, doa dicht bi Finkschen!“
 Un achtr'e Hock in eine Reihs,

1) Pott = Topf. 2) Gewes' für Wesen. 3) krüppt von kru-
 pen = kriechen. 4) pusseln von einer zugleich schwäch-
 lichen und mühevollen Hantierung gebraucht. 5) wesselt
 = wechseln. 6) slietig = fleißig. 7) Lepel = Löffel.
 8) säufken = suchen. 9) upstunns, wörtlich: auf diese
 Stunde, d. h. alleweile. 10) Kiep = Kober.

Doa sitten s̄, Kiepen mang dei Knei,
 In ehre Hand dat schwarte Brodt,
 Den Henkelpott up ehren Schoot.
 Dat lütte Volk liggt ehr tau Sied
 Un kückt so wiß tau Höcht un süht,
 Wo dat uns' Bahre nührig¹⁾ ett²⁾),
 Un ob hei woll wat äwrig lett³⁾).

„So, Jöching, so! Da hest dei Grütt!
 Et ut un gah nah Huus, mien Sähn,
 Un fall of nich! — Dau⁴⁾! Willem Dähn,
 Nimm mienen lütten Jochen mit,
 Un schmiet't mi nich den Pott entwei!
 Da hest Dien Müß, mien Sähn, nu gah!“ —

Bald liggt in Schlap⁵⁾ dei ganze Reih —
 Oll Toppel blot exirt⁵⁾ noch nah —
 So ruhig liggen s̄ doa, as ob
 Kein Dual sei wecken kün, kein Mäuh,
 Dat schönste Küffen unner 'n Kopp,
 Dei Arbeit, dei mit Lust vollbröcht;
 Dei schönste Deck is d'räwe leggt,

1) nührig, etwa: mit großem Appetit. 2) ett, von eten = ißt. 3) äwrig = übrig. 4) beim Aufrufen für: Du!

5) exiren für exerciren.

Dei jemals up en Schleper lag:
 Dei Schatten von en Sommedag. —
 Dei Klock is zwei, vebi dei Rauh:
 „Na, Kinnings, nu man werre tau!“
 Dei Arbeitsraup deiht Jeden wecken,
 Oll Teppel deiht sich noch mal recken,
 Un werre runscht 't un russelt 't, rappelt 't¹⁾,
 Un werre schläpt 't un löppt 't un zappelt 't. —

Un as dat kümmt tau Bespetied,
 Dunn sitt en Poar so still bi Sied,
 Gehann is 't un sien arme Diern,
 Dei kicht so truurig in dei Fiern.
 So sitten sei 'ne tiedlang Beid.
 Hei frögt taulegt: „Segg, büst Du mäud²⁾?“
 „„Oh nee, dat fall mi nicks verschlahn³⁾;“
 Du hest jo halw mien Arbeit dahñ,
 Du schmetst Dien Seiz so oft bi Sied
 Un rüfeln⁴⁾ mi dei Garw tausamen.
 Nee, ik kunn prächtig mit Di kamen.“

1) rappeln = sich anstrengen. 2) mäud = müde. 3) verschlahn = verschlagen; wird meines Wissens nur in dieser Redensart gebraucht, welche „das soll mich wenig kümmern“ bedeutet. 4) rüfeln = auf einen Haufen bringen.

Un as s̄ gewoahrt, dat 't Keine süht,
 Dunn leggt s̄ den Kopp an em heran
 Un kiekt tau Höcht: „„Mien leiw Gehann!““
 „Ja, Kind!“ un straakt sei fründlich äwe,
 „Hüt güng dat ornlich in dei Werr¹). —
 Süh, kief mal doa! Doa kümmt uns Herr!“ —

Dei Jagd geiht up Jakobidag.
 Dei Herr kümmt äwer 't Feld heräwe,
 Dei Jagdtasch un dei Flint ümdahn,
 Un as hei süht den Roggenschlag
 So dicht un drang' vull Hocken stahn,
 Dunn ward sien Dog so hell un wacht²),
 Hei 's so vegnäugt, sien Hart, dat lacht;
 Hei 's mit dei Arbeit of taufreden
 Un rückt dei Mǖz un grüßt en Jeden.
 „Hüt is hei fründlich“ seggt Gehann,
 „Rumm mit, Marieken, mit heran!
 Du möst em bin'n, ick will em strieken³);
 Un will'n em noch mal birr'n, Marieken.“

1) Werr = Wette. 2) wacht = munter, lebendig. 3) bin'n un strieken. Die Binderin bindet den Herrn mit einem Kornband, der Mäher streicht vor ihm die Sense. Der bei uns gebräuchliche Schnittergruß.

„„Oh, gah allein. If nich! If nich!““
 „Ih, hew Di doch nich hewelig¹⁾!
 Wat is 'e los, wat is doabi?“
 „„Oh nee, Jehann; oh, gah ahn mi!
 Hei deisht't nich, krigt hei mi tau seihn.““
 Jehann steiht up un geiht allein
 Un grüßt den Herrn un set't den Haut
 Woll up den Boom, un strickt so fasch²⁾)
 Un behdt sien lust'gen Riemels gaut;
 Dei Herr langt'rinne in dei Tasch
 Un halt en Dahle 'rut un winkt:
 „Da, Kinne; weest vegräugt un drinkt
 Hüt Abend mien Gesundheit eins.““
 Dei Knecht rögt sich nich von dei Stähd:
 „„Ach Herr, if hahr 'ne anne Bähd.
 Acht Joahr bün 'k nu bi Sei in Deinst
 Un ümme hew 'k mi gaut bedragen,
 Un äwe mi kann Keine klagen,
 If hew mien Arbeit dahn, as Ein,
 Un was Sei truu; mien Hand is rein.
 If hew all einmal doavon seggt

1) hewelig von heweln = kindisch scherzen; hier soviel, wie kindisch. 2) fasch = lebhaft und dreist.

Un miene Bähd an 't Hart Sei leggt,
 Ik kam noch mal. Oh geben S' mi
 Doch up den Harwst dat Friege frie!""
 Dei Herr, dei steiht nahdenklich doa:
 „Ja, Jehann Schütt, dat is woll weah,
 Du büst mi truu un iehrlich west
 Un in dei Arbeit büst dei Best;
 Indessen doch — dei eigen Lühr,
 Dei war'n mi goa tau vähl tau dühr¹).
 Ik hew mi eimal doarup stemmt²):
 Up miene Gäure laat 'k nich friegen,
 Wenn of dei Arbeit mal eins klemmt³),
 Ik kann naug Lühr ut 't Fürstlich friegen.
 Un denn is of kein Hüsing frie."
 „„Ja, Herr, wo Batte Brand in is;
 Den Ollen nehm ik denn tau mi,
 Un 't blew denn Allens so, as süs!""
 Dei Herr, dei grübelt, sinnt un steiht,
 As wenn 't em würklich nahgahn deih,
 Dat hei em Afschlag geben fall.
 Mit einmal äwerst schleicht hei üm,

1) dühr = theuer. 2) hier soviel, wie: ich habe meinen Kopf darauf gesetzt. 3) dei Arbeit klemmt = die Arbeit drängt.

In sienem Harten stiggt dei Gall,
 Unsäker¹⁾ ward sien barsche Stimm,
 Unruhig ward sien düster Dog;
 Hei dacht an 't Füer, wat doa gescheihn,
 Wat hei bi 'n Füerschien hett seihn,
 Un hart un kolt was 't, as hei frog:
 „Wer is 't denn, dei Du friegen wist?“
 „„Oll Brandten sien Marieken is 't“
 Dei Herr, dei würr vör Bosheit²⁾ blaß,
 Hei rückt dei Flint herüm, as null 'e
 Sei 'runne rieten von dei Schulle,
 Un schmeet den Dahle in dat Gras
 Un dreift sich up den Hacken³⁾ üm
 Un lacht so gehl⁴⁾ mit höhnsche Stimm:
 „Nee, säuf Di man 'ne Anne ut!
 Kein Hübung hew 'k för so'ne Brut!“ — —
 Dei Herr is weg; Gehann bliwt stahn,
 As hahr för em dei Bliß 'rin schlahn:
 „„Worüm? — Woso? — Worüm 'ne Anne?“
 Un schmitt sich an dei Hock heranne.

1) unsäker = unsicher. 2) Bosheit, meistentheils im Plattdeutschen für Ärger und Wuth gebraucht. 3) Hacken = Ferse. 4) gehl, in scherhaftester Redeweise auch gehlbunck lachen = verächtlich, höhnisch lachen.

Marieken ficht em truurig an:

„Ik sähr di 't woll, mien leiw Gehann.

Nich woah? Nu is't woll rein vebi?“

Hei stött ehr Hand ingrimmig weg:

„„Du sährst dat woll? Dei Wahrheit segg!

Wat is 't, wat hett dei Herr mit Di?““

„Du weitst, hei kann mi nich utstahn.“

„„Dat is dat nich! dei Wahrheit 'rut!

Hei was sowiet, hei hahr dat dahn,

Doch as hei härt, dat Du mien Brut,

Dunn wull hei nicks miehr doavon weiten.

Nu red un segg, wat soll dat heiten?““ —

So ängstlich seeg sei in sien Dog,

Dei Lippen würren ehr so blaß,

As sei dei Ogen nerre schlog,

Un 't lies' sich äwr 'e Lippen tog:

„Wiel ik em nich to Willen was.“

As wenn em dehr 'ne Arre¹⁾ steken,

1) Arre = Otter. Man macht einen Unterschied zwischen „Arre“ und „Schnak“ (= Schlange). Alle giftigen Schlangen heißen „Arre“, alle nicht giftigen „Schnak.“ — In dem Volksmunde sagt die „Schnak“:

Ik stek so liesing, as 'ne Ferre,

Un wat ik stek, dat ward woll werre.

Die „Arre“ antwortet darauf:

Ik stek, ik stek, ik stek durch Ferre,

Un wat ik stek, dat ward nich werre.

Flüggt hei tau Höcht; knapp¹⁾) kann hei spreken:
 „„Wat? — Em tau Willn? — Wer dehr dat? —
 Wer?““

Un bärwernd seggt s': „Dat was uns' Herr.““
 Un reckt den Arm nah em tau Höcht:
 „Ach Gott, Jehann! Nu hew ik 't seggt.
 Oh, kief²⁾) mi nich so düster an!
 Ich bleuw Di truu, mien leiw Jehann.
 Hett hei mi 't Leben of vegällt,
 Du bleuwst mien Einzigst in dei Welt.““

Hei reift ehr nich dei Hand, hei schwiggt;
 Den ollen Daniel sien Geschicht,
 Dei steiht so schwart vör em un fickt
 Em as en Späuf³⁾), dat nich mihr wikt
 Mit stiere Dogen in 't Gesicht.
 Bether was 't Arge un Bedruß,
 Wat in dat Hart em kient⁴⁾ un wuß⁵⁾),
 Nu waßt doa Haß un grimme Grull;
 Bet baben is dat Hart em voll.
 Hei dreiht sich üm un fött dei Seiß

1) knapp = kaum. 2) kief = sieh. 3) Späuf = Spuſ.

4) kienen = keimen. 5) wuß, von wassen = wuchs.

Un schwingt sei mächtig in den Kreis;
 As wenn hei nich hei sülben wier,
 Dei Sehnen Draht, dei Gliere Stahl,
 Naſt hei voran, den Tog hendal,
 Un Schwad up Schwad ſact up dei Ter.
 As wenn 't em hahr dat Späuk andahn,
 As hahr dei böfe Fiend em packt,
 So ſuuf't ſien Seiß; dat Kuurn, dat ſact,
 As wier dat Füer d'räwe gahn.
 Un ob dei Sünn fo hell oß ſchient,
 Vör ſiene Dogen is dat schwart;
 As lacht doarin dei böfe Fiend,
 So lacht dat hähnschen dörch ſien Hart.
 Un doabi is em doch fo weih,
 As wier nu von em Gottes Segen;
 Hei möt! Hei möt dei Knaken rögen¹⁾!
 Meiht jo für zwei!
 Dei deip em in den Harten ſitt
 Un em dörch alle Ahrern ritt,
 Dei Grull meiht mit. —

Hei leggt nich mihr dei Seiß up 't Schwad

1) Knaken rögen = Knochen röhren.

Un rafft Mariel dei Garw tausamen;
 Sei hast' dich ängstlich mit tau kamen,
 Doch endlich steiht sei mäud un matt;
 Dei Hand is lahm, dat Hart, dat flüggt,
 Dei Athen geiht, dei Bost, dei stiggt,
 Ut ehr Gesicht wickt alle Farw,
 So föllt sei dal up ehrre Garw
 Un ficht em nah so weih, so frank,
 Wo hei henraßt dat Schwad entlang.
 Sei denkt an dat veled'ne Joah;
 Dunn würr bei Arbeit ehr nich schwoc,
 Dunn was sei noch so frisch un stark,
 Un 't Blaut flöt lustig dörch dei Ahre:
 Wo höll s' ehr Schwad, wo schwüng s' dei Hart!
 Sei dacht an ehren franken Bahre:
 Herr Gott, wo dit woll All mal endt!
 Wo süss dat warden, wenn s' sich lähr¹⁾!
 Dei süss ehr Stütt noch wesen dehr,
 Dei hett sich hüt of von ehr wendt.
 Un ach! Allein kann sei 't nich drägen!

1) lähr = legte. — „Sich leggen“ ist der gebräuchliche Ausdruck für: „frank werden;“ vorzugsweise wird derselbe von Kindbetterinnen gebraucht.

Sei dacht an all ehr bitt're Noth:
 Woher? Woher dat däglich Brodt? —
 Un üm ehr 'rüm, wat Gottes Segen!
 Wat wuß för Brodt ut Gottes Tier!
 Dei Vägel in dei Lust, dei Diehr¹⁾
 In Wald un Feld, dei Worm, dei Fisch,
 Sei sitten all an Gottes Disch;
 So wiet sich blaag dei Heben reckt²⁾!,
 Ehr Mahltiedt is ehr ümme deckt.
 Un sei allein, sei süss verkamen?
 Sei folgt ehr Hän'n up 't Hart tausamen;
 Dat Hart würr still, dei Thranen flöten
 Un lösten all ehr Ach un Weih,
 Sei behdt so heit, sei behdt vör zwei;
 Uns' Hergott ward sei nich vegeten!
 Un wunnesfrisch un wunnestark
 Steiht s' up un grippt nah ehre Hark;
 Dei Arbeit ward ehr werre licht.
 Un as dei Abend 'ruppe stiggt,
 Un as dei Sün̄n den ležten Strahl
 „Gun Nacht oſ, Tier!“ heräwe schickt

1) Diehr = Thiere. 2) sich recken = sich erstrecken.

Uu dörch dei schwarten Dannen ficht,
 As Allens leggt dei Arbeit dal
 „„So, Kinnings, morrn is of en Dag,““
 Dunn geiht s' vöran, hen nah dei Hoch,
 Wo dat Geschirr tausamen lag,
 Un halt Jehannen sienem Rock.
 Un fründlich, as wier nicks gescheihn,
 Birrt s' em, den Kittel antauteihn,
 Un ficht em recht truhartig an:
 „Ik bün unschüllig¹⁾, leiw Jehann.““
 Un vör dit helle, lichte Wurt
 Möt all sien schwarte Bosheit²⁾ wieken;
 Hei ficht sei an, as wenn s' em duurt:
 „„Na, kumm! Gif mi Dien Hark, Marie-
 fen.““ — —

Un as sei dörch dei Abendrauh
 Birn Anne gahn, dat Dörp hentau³⁾;
 Un as bei Mahn in stille Pracht
 An 'n Sommeheben 'ruppe treckt
 Un mit den goldnen Finge sacht

1) unschüllig = unschuldig. 2) hier wieder mit Zorn zu über-
 setzen. 3) hentau = hinzu; wird immer dem regierten
 Hauptwort nach gesetzt.

Dei Ier un 't Minischenhart upweckt
 Tau Seeligkeit un säuten Droom¹⁾,
 Dunn sünd'ng' bei Dierns von'n gräunen Boom,
 Worunne zwei Verleiwte seeten,
 Dei äwe ehr Freuden ehr Leiden vegeten.
 Un was bei Boom of nich tau Stähr
 Un flustert 'runne lies' un sacht,
 Schient of bei Mahn nich dörch sien Blähr²⁾,
 So senkt sich doch bei stille Frehr
 Herunne ut bei Sommenacht;
 Un wat em ierst vertehren wull,
 Dei Haß un Grull,
 Dei schwiggt; un sei vegeet,
 Wat deip ehr in den Harten seet,
 Ehr Elend un ehr Herzleed³⁾.

1) Droom = Traum. 2) Blähr = Blätter. 3) In dieser Zusammensetzung wird nie „Hart“, sondern stets „Herz“ gebraucht.

5.

Dei Gruß.

Micheeli is 't, dat Feld is kloa;
 Dei Aüst tau Schick, un werre denkt
 Dei Minsch all up dat neegste Joah.
 Dörch fahle Stoppel lustig drängt
 Dei gräune Kleewe¹⁾ sich nah baben;
 Dei Wintesaat, dei ward bestellt,
 Un werre gräunt up 't fahle Feld
 Dei Hoffnung 'rut up Gottesgaben. —

Dei Gäuf²⁾), dei schrie'n, dei Pogg, dei schwiggt;
 Dei Wind geiht äwr 'e Hawestoppel;
 Dei Metten³⁾ treckt un sülwern⁴⁾ liggt
 Ehr sien Gewew up Feld un Koppel.

1) Kleewe = Klee. 2) Gäuf, Plural von Gauß = Gans.

3) Metten = Sommerfaden. 4) sülwern = silbern.

Un slietig spinnt dei lütte Spenn¹⁾)
 Un spinnt sich in ehr helles Sarg,
 Un äwe Busch und äwe Barg —
 Doahen! doahen! —

Treckt s' ruppe nah dei goldne Sünn,
 Treckt s' dörch dei reine, blaage Luft.

Oh, wer doch kün̄n

Eins schlapen in so helle Gruft!

Un wenn uns' Herrgott dat nich will,

Un rauh' k' in düstre Fer eins still,

Denn mügt ik, dat ik frank und frie,

So lang' ik lewt,

Hoch haben schwent,

As an den Heben treckt dei Wieh²⁾),

Un dat ik kün̄n von haben dal

Up däglich Noth un däglich Quaal

Deip unne mi

Herunne seihn,

Frie äwe Land un Waate teihn! —

Herrgott! Du gawst mi frisches Blaut,

Du gawst mi hellen, starken Mauth,

1) Spenn = Spinne. 2) Wieh, Femen., = Weih.

Du gawst mi Mark, Du gawst mi Knaken;
 Daum Eigenduhm;
 Oh, gif mi Raum¹⁾!
 Dat Anne wull ik denn woll maaken. —

So dacht Jehann, as hei doa leeg,
 Un äwe em dei Metten tög.
 Hei dacht nich d'ran, dat, wat doa lewt,
 Of an den ollen Ferborn flewt,
 Dat noch kein Wesen funnen is,
 Wat nich mit Kähren²⁾ bunnen is;
 Dat Frieheit is en golden Licht,
 Wat nich up Feren is tau seihn,
 Un wat in 't Minschenoog allein,
 Wenn 't breken deiht, herinne lücht. — —
 Jehann liggt achtr'e Steinmuur werre,
 Wo vör en Vierteljoahr hei lag;
 All'ns, wat hei führt, dat drückt em nerre³⁾,
 Un wenn hei in den Heben sach
 Un in sien reines Sünnergold
 Un äwer'n fiernen blaagen Holt,

1) Raum = Raum, Platz zum Rühren. 2) Kähren = Ketten.

3) nerre = nieder.

Un wenn 't em mächtig vörwärts tüht,
 Wenn hei dei Schwälken¹⁾ trecken süht,
 Denn fäuhlt hei, dat en schwaa Gewicht
 Em hängt an siene rasche Flücht²⁾. —
 Wat was hei doch ganz anners worrn!
 Wenn süs of was Bedruß un Zorn
 Hell in sien Hart mal upbegährt³⁾),
 Dat güng vörbi, nu fäuhlt hei, dat
 Em Grull un Haß in 'n Harten sat
 Un an sien frisches Leben tehrt,
 Un dat Vertwiewlung mit sien Lag'
 Sich fast un faste üm sien Dag'
 Un üm sien jungen Gliere schneert.
 Un wenn hei of mal troßig rehrt:
 „Oh, gif mi Ruum!
 Dat Anne wull ik denn woll maaken!“
 Denn glöwt sien Hart dat sülben kuum,
 Dat 't mal eins anners warden deiht.
 Hei süht dei Foahr⁴⁾, hei süht den Haaken
 Un süht dei Pietsch; sien Leben steiht
 Vör em un süht em iesig an,

1) Schwälk = Schwalbe. 2) Flücht = Flügel. 3) upbegähren = aufgähren. 4) Foahr = Fahre, Färche.

Un kolt un iesig ward sien Hart.
 „Ran an den Haken! Her den Staart¹⁾!“
 Un vörwärts rastert²⁾ dat Gespann.
 „Man ümme jüh³⁾! Dei Foahr entlang!
 Warst Du mal olt un schwack un frank
 Un kannst den Haken nich mehr räufen⁴⁾,
 Denn möt w' Di anne Arbeit säufen
 För schlichtern Lohn. Dat is Dien Dank!
 Man ümme jüh! Feld up, Feld dal!
 All Ding hett jo en En'n enmal.
 'Rin in den Sarg! Den Deckel tau!
 In 't käuhle Graf, doa findst Du Rauh.
 Man ümme jüh! Wat helpt 't Gestähn⁵⁾?
 Man ümme jüh! Un denn för wen?
 Wo blixt un dunnert dat in sien Hart!
 Wo reet⁶⁾ hei herümme den Haakenstaart!
 Wo reet hei herute dei harte Schull⁷⁾!
 As wenn hei 'n Graf hier graben wuß.

1) Staart, hier = Haakensterz. 2) rastern = rasseln 3) jüh!
 Ein Ausruf, der bei'm Untreiben des Zugviehs gebraucht
 wird 4) räufen = regieren, handhaben. 5) Gestähn =
 Gestöhne, Klage. 6) reet, von rieten = riß. 7) Schull =
 Scholle.

„Für wen? Für wen? — Du, Hund, für Di!
Oh, still doch, Hart! Man ümme jüh!“ — —

As hei dei Kawel¹⁾ ut hett haakt,
Un as hei Fieerabend maakt,
Dunn kümmt Marieken antaugahn.
Sei hett den besten Dauf²⁾ ümdahn,
Ehr Gang is rasch, ehr Bussen flücht,
Ehr Back is roth, ehr Dog, dat lücht. —
„Wo willst Du hen? Wat hest Du vör?“ —

„„Dei Möllefruu is bi mi west,
Dei redt mi fründlich tau un sähr:
Sei glöwt, dat wier för uns dat Best,
Wenn ik uns' Fruu mal bidden dehr;
Ik süll ehr recht an 't Hart mal leggen
Un süll 't ehr recht beweglich seggen,
Wo uns dat güng, denn meint sei, dehr s' 't.
Un wenn Du em denn nochmal behrst. . . .
Wat kickst Du mi so düste an?
Sall ik dat nich? Is Di 't nich mit?““
„„Ah, nee. — Worüm? — Nee, dauh Du 't man.““
„„Ach wenn Du wüßt, mien leiw Gehann,

1) Kawel = Leos, Maas, pensum. 2) Dauf = Tuφ.

Wo mi dat bang vör 'n Harten sitt,
Dat if doa nah dei Fruu fall hen!
Un doch is mi tau Mauth, as wenn
Nu ann're Tieden för uns kamen.
Paß up, Jehann, nu breckt sich 't Weere¹⁾! ""
Sien Hand up ehre Schulle lähr'e²⁾
Un seggt tau ehr: „Nimm Di tausamen!
Hoff nich tau vähl un törn³⁾ Dien Hast!
Dat kann tauwielen anners kamen;
Un kümmt dat anners, denn stah fast!
Hürst Du? Dei Tähn tausamen bätten⁴⁾
Un wenn s' Di of dat Hart utreeten!" —
„Ach hahrst Du doch ditmal nich Recht!" —
Sei geiht un steiht nochmal un frögt:
„Wo treff 'k Di nahst⁵⁾? "" — „As süs,
Mariet;
Bi 'n Fleereboom⁶⁾ an 'n Mählendief." — —

„„Gu'n Abend of,““ seggt Daniel
Taur' Möllefruu. „„Hüt gïst 't noch wat.““ —

1) *Weere* = Wetter. 3) *lähr 'e* = legte er. 3) *törnen* = aufhalten, bändigen. 4) *bäten* = gebissen. 5) *nahst* = nachher. 6) *Fleereboom* = Fliederbaum. Mit „*Fleere*“ wird indessen nicht der Flieder, sondern der Hollunder bezeichnet. Der Flieder heißt: „span'sche Fleere.“

„Ih, in den Nurden is 't noch hell.“ —
 „Ja, 't schadt em nich, dat föllt all natt.
 Hüt Abend dehr dei Sünin nich dägen¹⁾;
 Ik glöw, wi kriegen vählen Regen.““ —
 „Dat wier nich gaut; dat Dack, dat is
 Nich dicht in besen ollen Rathen²⁾“ —
 „Na, möten 't mal eins nahseihn laten,
 So wahnens S' frielich nich, as süs.
 Wenn ward dat niege Huus denn fahrig³⁾?““ —
 „Ach Gott, dei Arbeit geiht so tahrig⁴⁾!
 Martini meint jo mien Gesell. —
 Wat was 't för 'n Füer, Daniel!“
 „Ja, dat was dull. Na, ik seet jüst
 En bätzen up mien Fauderkist
 Un dacht an nicks, dunn hört ik Larm. . . .““ —
 „Ach Daniel, ik, dat Gott erbarm!
 Ik stünn un wüft nich, wat ik dehr,
 Ik was verbaast⁵⁾ un leep un rönnt,
 Un wenn Jehann nich was tau Stähr,

1) dägen = taugen. 2) Rathen = Tagelöhnerhaus 3) fahrig = fertig. 4) tahrig, von tahren = necken, durch Necken stören. Tahrig wird daher von einer Arbeit gesagt, wenn dieselbe durch allerlei kleine unvorhergesehene Zwischenfälle im Fortschreiten gehindert wird. 5) verbaast = verdutzt, vor den Kopf geschlagen.

Mien Körle, dei wier verbrennt, wier rein ver-
brennt." —
„Dei wier verbrennt, Fruu Rosenhagen.““ —
„Dei wier verbrennt! — If hewt vesöcht.
Un wull em giern mien Schuld afdragen;
Doch weit Hei, Daniel, wat hei seggt?
Für Geld dehr hei den Hals nich wagen.“ —
„Ih, doamit is em of nich deint¹).
Rümmt 't mit sien Hüfung nich tau Schick,
Denn ward 't mit em en dulles Stück.
Sien arm Marieken sitt un weint;
Sei weiten doch . . . ?““ — „Ih, woll! If weit;
If was vör'n Bäten jo noch doa
Un sähr tau ehr: „Ih, sitt un roa!“
Sähr if, „kumm, maak Di up dei Fäut,
Wenn Hei nich will, denn gah nah Ehr²)
Un stell Ehr dat mal orndlich vör,
Du fallst mal seihn“, sähr if, „Sei deicht 't.“ —
„Sei is of hen nah Ehr: sei güng,
Grar as dat an tau schummern³) füng,

1) deint = gedient. 2) Hei un Sei wird auf gleiche Weise von jedem Chepaare gesagt; vorzugsweise jedoch wird damit der Herr und die Herrin bezeichnet. 3) schummern; = dunkelwerden; vom eintretenden Zwielicht gebraucht.

Dwas äwer'n Höf. Dat hett sei dahn.""—
 „Wo? Kümmt sei doa den Weg nich her? —
 Du! — Hür . . . !"— „„Oh nich! Oh laaten
 S' gahn!

Wer weit, ehr is dat Hart woll schwer.
 Mi dücht binah, in 'n Düstern kann en
 Ehr anseihn, wat dei Fruu¹⁾ ehr sähr.
 Nee, laaten S' gahn! Sei söcht Gehannen,
 Dei steiht all up sien olle Stähr
 Un luurt. Dei armen jungen Lühr²⁾!""—
 „Ja, Daniel, dat 's en groot Mallür!"
 „„Wat will dat nich, Fruu Rosenhagen! —
 Wat helpt dat All? Sei möten 't dragen. —
 Gun Nacht! Ja 't was en gruuglich³⁾ Füer.""—

'Ne schwart Gestalt, dei wankt vörbi
 Un schlickt so lies' entlang den Diek⁴⁾
 Nah 'n Fleerebusch.— „Büst Du 't, Mariek?"—
 „„Iß bün't Gehann.""— „Wat sähr s' tau
 Di?" —

1) Dei Fruu, uns' Fruu und, wie oben bemerk't, Sei, sind die gewöhnlichen Bezeichnungen für die Herrin. 2) Lühr = Leute. 3) gruuglich = graulich und gräulich. Hier das Letztere. 4) Diek = Teich, Weiher.

Sei set't sich up en Stubben¹⁾) dal
 Un treckt den Dauf sich äwer 'n Kopf;
 Hei frögt dat Sülw'ge noch einmal,
 Süht in dei Nacht herin, as ob
 Dei Nacht em Antwort geben süll;
 Doch Allens schwiggt, dei Nacht is still. —
 „Marieken, kumm un antwurt mi!
 Wes man getrost! Wat sähr s' tau Di?“ —
 „„Dat weit ik nich, ik weit man blot,
 Dat wi verlur'n up ewig sünd,
 Un dat dat Kind in mienen Schoot —
 Ach Gott, Gehann, mien armes Kind! —
 Verflucht dörch uns're Sünnen is.
 Dat hebb'n Sei seggt, dat weit ik wiß,
 Dat bruust mi noch dörch miene Uhren.
 Ach Gott, Gehann, All drei verluren!““ —
 „Wat? Glöwst Du dat? — Wer hett Di 't
 seggt? —
 'Ne Fruu, dei sich up 't Bäden leggt
 Un fram is worrn in alle Gel²⁾),
 Wiel dat s' nicks Bäteres versteiht.

1) Stubben = Baumstumpf. 2) Gel = Eile; ein anderes
 Wort „Gel“ = Egel, Blutegel.

Dei Dart ward fram ut Langewiel;
 Dat weit ik of, wat so Ein weit;
 Un ik segg Di, dat is nich woäh,
 Dat is nich wierth, dat Ein drüm roa." —
 „Sei was dei Ferst¹), dei mi den Bäker²)
 Vull Schimp un Schan'n tau schmecken geew,
 Em vull göt, bet hei äwedreen³);
 Un-ach! Ik glöwt un hofft so säker.
 Sei geew mi all dei schlichten Wür⁴),
 Sei hett mi 't seggt, wo 't mit mi wier,
 Sei hett mi 't seggt, wo 't mit mi kehm,
 Un wat dat för ein En'n eins nehm." —
 „So? Hett s' Di 't seggt, mien arm Marieken? —
 Sähr s' Di denn goa nicks von dei Nieken⁵)
 Un von dei Herrn in unsen Lan'n?
 Vertellt s' Di nicks von dei ehr Schan'n?
 Un sähr s' Di nich, dat dei dei Sün'n,
 Dei wi ut reine Leiw begahn,
 Un wiel wi uns nich friegen kün'n,
 Ut pure Schändlichkeiten dahn?
 Dat ganze Dörpe sünd vegist't?

1) Ferst = Erste. 2) Bäker = Becher. 3) äwedreen = übertrieb. 4) Wür = Worte. 5) rieß = reich.

Un wo dei Tucht is unnegahn,
 Dat doa dei Herrn dat angestifft?
 Dat wi 't mit Elend büßen möten,
 Wenn wi mal Gottes Wurt vegeten?
 Un unse Herren blot mit Geld?
 Dat sähr s' Di nich? — Denn sähr s' Di nicks,
 Un Lägen¹⁾ hett sei Di betell't." —
 „„Nee, nee, Gehann, so kann 't nich sün.
 Uns Herr Pastur, dei was doabi,
 Dei redte just so up mi in:
 Dat Richtigst wier för Di un mi,
 Dat w' öffentlich för dei Gemein
 Bör 't Altoa up den Schandstaul²⁾ seeten,
 Wiel dat wi 't sößt³⁾ Gebot vegeeten.
 Un wat hei dauhn kunn, süll gescheihn,
 Dat bei oll Mohd keem werre up,
 Un ik süll denn taum iersten 'rup." —
 „Dat sähr dei Paap? Hoho! Hoho!
 Dat würr en Spaß, dat würr 'ne Lust!" —
 „„Oh Gott, Gehann, oh lach nich so!" —
 „Hoho! Hoho! Dat wier dat just,

1) Lägen = Lügen 2) Schandstaul = Schandstuhl, Bußschemel. 3) sößt = sechste.

Wat Knecht un Herrn maakt werre glied.
 In 'n Leben sünd wi Arm un Rieß,
 Vör 't Altoa is dat richtig Flach¹⁾),
 Wo glied wie weest sünd männig Dag.
 Un deiht 't nich mihr uns' Religion,
 Denn mag dei Schimp un Schan'n dat dauhn.
 Sei kriegen Wien un Brodt apart,
 Wiel dat för uns ehr ekeln ward;
 Dei Schandstaul äwerst wier uns glied.
 Hoho! Hoho! Lach doch Mariel!" —
 „„Oh laat dat! Du vesünnigst Di.““ —
 „„Versünningen? Ik? — Wo denkst Du hen? —
 Wiel 'k 't Kind bi 'n rechten Namen nenn? —
 Ik red man von dei Preisterie;
 Ik red nich gegen Gotts Gebot,
 Doa steiht nicks in von so 'ne Mohd,
 Doa steiht vähl Gauds för Arme schräben,
 Un dat uns' Herrgott vähl vergeben.“ —
 „„Uns' oll Herr Paster hahr 't nich dahn,
 Dei hahr mi nich so schrecklich richt't,
 Dei hahr en Hart uns tau verstahn.
 Oh, dat dei unn're Brausen²⁾ liggt!““ —

1) Flach = Fleiß, Stelle. 2) Brausen = Rasen.

„Ja, dei was brav; ja, dei was gaut,
 Dei hahr nich mit den Schandstaul drauht¹⁾.“ —

„„Dei hahr mi in 't Gewissen redt,
 Un hahr mit mi un för mi behdt.““ —

„Dei hahr en Hart für arme Lühr.“ —

„„Oh, dat dei bi uns bleeben wier!
 Nu hew ik unne Gottes Sünn
 Un up dei wiede Welt nich Einen,
 An den'n sien Hart ik mi utweinen,
 An den'n sien Knei ik bichten kün.
 Ach, ik hew Keinen, Keinen, Keinen!““ —

„„Ik un Dien Bahre sünd Die truu,
 Wi stahn noch ümme fast bi Di.“ —

„„Mien Bahre is kein Trost för mi —
 Du weitst worüm, Jehann — un Du . . .““ —
 Hier steiht sei up, fött sienem Arm —

„„Dien Hart schlog woll eins weik un warm
 Un was för mi dei säkerst²⁾ Lahr³⁾;
 Un wat ik up den Harten hahr,
 Mien Denken all un all mien Dauhn,
 Dat kün dat doa woll un ruhig rauhn.

1) drauht = gedroht. 2) säkerst = sicherste. 3) Lahr = Lade.

Doch dat's vörbi, dat is nu west;
 Dien Hart beharbargt anne Gäst,
 Dei känen miene schwacken Klagen,
 Mien Noth un Jamme nich verdragen." —
 „Ik bün Di, wat ik ümme was,
 Kannst woll in mienem Harten rauhn,
 Un rögt sich in mi Grull un Haß,
 So hebb'n s' doch nicks mit Ti tau dauhn." —
 Sei drückt sich faste an em 'ran:
 „„Laat fohren Haß un Grull, Gehann!
 Mien Hart, dat is bet baben vull.
 Von bange Noth un bitt're Quaal,
 Doa is kein Platz för Haß un Grull." —
 Hei set't sich up den Stubben dal
 Un treckt sei sacht up-sienen Schoot
 Un tröst't un minnert ehre Noth,
 Un rings ümher
 Liggt schwart un schwer
 Dei düst're Nacht
 Un flüstert sacht
 Un süsszt dörch 't Ruhr¹⁾)

1) Ruhr = Nohr.

Un dörch den ollen Fleereboom
 Un dörch dat Läusch¹⁾ an'n Waatersoom;
 Un 't Regenschuur,
 Dat 'ruppe tüht,
 Glitt singend äwer 't Waater hen,
 As sünd dei Nacht en Truuuerlied,
 Un weint so sacht herun, as wenn
 Sülwst schwarte Nacht sich barmen deicht
 Nem 't Minschenhart un üm sien Leid.

1) Läusch = Schilf.

6.

Dei Lust.

Hubertusdag steiht in den Klenne¹),
 Un in dei Bucht²) ein Viertheinenne³),
 Dei is doa sorgsam faurert⁴) worrn
 Un fall — so seggen S' — heran vemorrn⁵)
 Un fall hüt loopen vör dei Hun'n.
 Natt is 't von Baben un von Un'n;
 Dei Daak liggt gries up Dörp un Feld;
 Dei Sünn kift 'runne up dei Welt,
 As woll s' hüt goar nich ut dat Bedd,
 Un kift so mäud dörch dei Gardinen,
 As hahr s' 't sich in den Kopp 'rin set't:
 Hüt kunn of woll en Anne schienem,

1) Klenne = Kalender. 2) Bucht = Umzäunung. Das Wort hat stets den Nebenbegriff, Theil eines Ganzen zu sein.
 3) Viertheinenne = Vierzehnender. 4) faurert = gefürt
 tert 5) vemorrn, auch: vemorrntau = heutemorgen.

Natt is dei Ter, dei Luft, dei Schall;
 Dei Döscheschlag¹⁾), dei flappt so stump,
 Un af un an is ut den Stall
 En Bröll'n tau hür'n, dat klingt so dump,
 As wier 't oll Weih in deipen Droom
 Un drömte von den gräunen Boom
 Un von dei Weid un von dat Gras,
 As 't Frühjoah un as 't Sommer was,
 Un 'dei oll Bull, dei lümmelt²⁾ mang,
 As wier in'n Stall em nicks tau Dank.
 Dei ollen Wiewe schwingen Flas³⁾)
 Un sitten up dei Schaapstalldähl⁴⁾)
 Un kieken mäud un schleeprig 'rut

1) Döscheschlag — Drescherschlag. — Heut kommt wohl nur hauptsächlich der Zweischlag vor; in früheren Zeiten redete man von Dreischlag und Bierschlag; ja, auch des Sechsschlages erinnere ich mich. 2) Wenn der Bulle nach seinem Fauchzen noch still vor sich hin brummt, so nennt man dies: lümmeln. Der Kinder-Singsang lautet:

„Lümmel, Lümmel, Lepelstähl,
 Unse Jakob frett so vähl.“

Un andern Orten giebt es eine Variation, welche heißt:

„Rühr, rühr Lepelstähl
 Unse Jakob frett so vähl.“

3) Flas = Flachs. 4) Dähl = Diele, Flut.

Un seihn as Uhlenkücken¹⁾ ut
 Un klappen, klatern²⁾, plätern vähl,
 Doch hürt 't sich so verdraten³⁾ an,
 As wenn Ein müggt un nich recht kann;
 Dei Lust, dei fehlt, dei helle Schlag,
 As früher an den Brakeldag⁴⁾).
 Dei Manns⁵⁾, dei dragen ut dei Schün
 Ehr Döschebund nah dei Maschin⁶⁾);
 Luut burrt tau Höcht dei Sparlingsschauw⁷⁾)
 Un maakt 'ne Schwenfung ierst tau Prauw⁸⁾)
 Un wackelt up' un wackelt dal,
 Maakt halwe Schwenfung noch einmal
 Un schmitt sich up en anne Flach,
 Tau seihn, ob doa von Gottes Seegen
 För ehr en Bäten äwrig lag.

Dei Nebel föllt; en sienen Regen,

1) Uhlenküken = Eulenküchlein, junge Eulen. 2) klatern un
 plätern, Beides in übertragener Bedeutung = klatschen.
 Eigentlich heißt „klatern“ einen klapprnden Ton hervor-
 bringen, und „plätern“ — nur vom Spielen der Kinder
 im Wasser gebraucht — patschen, panschen, klatschen. 3)
 verdraten = verdrossen. 4) Braken = Flachsbrechen.
 5) Manns = Männer. 6) Heckerlingmaschine. 7) Schauw
 = Schwarm; aber nur vom kleinen, wilden Gefügel ge-
 braucht. 8) Prauw = Probe.

Dei füsselt¹⁾ 'runne as en Faden,
 Un wo em was en Löckschén baden²⁾;
 Doa maakt hei sich noch mal so dünn
 Un sädelt sich allmählig 'rin
 Un bohrt sich 'run bet up dei Hunt
 Un jögt dat Bäten Warmniß³⁾ rut;
 Dat Ein 't mit Tähnenklappen krigt,
 As wenn man in 't soll Feiver³⁾ liggt.
 Dei Hoffhund krüpppt in siene Hütt,
 Un dei oll schwlige⁴⁾ Kapuun
 Krüpppt einsam unner'n Goahrentuun.
 Dei Hahu mit siene Häuhne sitt
 In einen Klumpen unner'n Wagen;
 Hüt Morgen hett hei noch so freiht⁵⁾,
 Nu sitt hei as up 't Muuhl geschlagen,
 Un wenn hei mal wat seggen deicht
 Un scheif den Kopp tau Höchten böhrt,
 Denn seggt hei blot: „If sähr 't, if sähr 't,
 Wi fregen Negen, fregen Negen.“

1) füsseln, von einem fein ausgefransten Gewebe und einem
 feinen Regen gebraucht. — Füsselig, d. h. halb betrunken,
 könnte man mit „angerissen“ übersetzen. 2) baden =
 geboten. 3) soll Feiver = kalte Fieber. 4) schwlig =
 schäbig. 5) freiht = gekräht.

Un ein oll Hauhn, dat seggt doagegen:
 „Rein Stück an 'n Heben bleeben floa!
 As Mehlgrott dic!
 Is dit en Stück!
 Natt sitt if doa, nu, nu, nu roa!“
 'T is All'ns vedreitlich, Gaus allein
 Steiht still vegnäugt up einen Bein,
 Behaglich pliert¹⁾ s in 't Weere 'rin
 Un in dei dicke Regensupp
 Un kift nah 't Ahrboars-Nest herup:
 Wo dei oll Burs nu woll müggt sin,
 Un wo dei woll herümme tög?
 Un keek sich üm, ob Schwälf noch flög:
 Wo dat oll sippig²⁾ Ding woll wier?
 Un fähr nich vähl, dacht desto mihr,
 Dacht an dei schöne Grabenburd
 Glick linkischen achtr'e Goahrenpurt,
 Ob't doa viellicht nich Gras noch gaf,
 Un wucht' sich up un wackelt af.
 Un dei oll Ahnt³⁾ kümmt ehr entgegen

1) plieren = mit einem halbgeschlossenen Auge sehn. 2) sippig = unstät. 3) Ahnt = Ente.

Un rätert¹⁾), plättert wat tau recht:
 Un deiht sich goa tau höflich rögen
 Mit 't Achtedeil, as Gaus ehr frögt:
 „Bör'n Duhr is 't woll sihr natt? Wat? Wat?“
 Un seggt mit höflichen Geschnater:
 „„Ja, Gnaden Gaus, schön natt, schön natt!
 Un böhr'n S' tau Höcht ehr leiven Röck.
 Doa 's nicks as lüuter Waater, Waater,
 Un wat noch fast is, dat is Dreck.““ —

Oll Daniel steckt dei Näs' herut
 Un führt nah Baben hier un doa:
 „Ih,“ seggt hei, „'t führt all klütrig²⁾ ut,
 Un achte Dam'row ward't all floa.
 Ik glöw, wi kriegen hüt noch Weere³).
 Un wes't parat! Un paß ein Jere
 Gaut up, dei Prier herut tau lerrn⁴⁾!
 Sei waren s' glied herup bestell'n

1) rättern = ununterbrochen vor sich hinschelten und schnattern.

2) klütrig von Klut = Kloß, von Flüssigkeiten gebraucht; daher mit „geronnen“ zu übersetzen; von festen Körpern sagt man kluitig. 3) Weere bedeutet vorzugsweise: gutes Wetter. 4) lerrn = leiten, führen.

Un wenn s' nich doa sünd, kunn hei schell'n;
 Hüt is kein Späzen mit den Herrn."

Dei Sünn brekt dörch. Dei Herr, dei röppt,
 Ein Jere schirrt un deiht un löppt,
 Un Daniel lerrt den Hingst herut;
 Dunn kümmt Marieken hastig an.
 Un führt so bang' und ängstlich ut
 Un frögt den Oll'n: „Wo is Gehann?“ —
 „„Dei Knechts, dei halen Holt vermorrn.““ —
 „Ach, Daniel, mi 's so angst un bang'n;
 Mien Bahre is so frank mi worrn,
 Ich hew nah'n Doktor so'n Verlang'n,
 Ach, Daniel, biss Hei doch den Herrn,
 Dat hei den Doktor halen lett.“
 „„Ja, gah man — laat Di man nich perrn¹⁾!
 Segg'n will 'k't em woll. Un täuw man hier!
 Wenn hei man sienen Gauden hett.““ —
 Dei Rüters schwenken sich tau Pier,
 Dei Herr sich up den Schimmelhingst;
 Oll Daniel steiht un höllt den Bägel:
 „„Wenn d' dit doch mal recht klauk anfügst!““

1) perrn = treten.

Denkt hei un fuschert¹⁾ an den Tägel
 Un summelt²⁾ rüm an dei Randarr.
 „Was hat Er noch, Er alter Narr?“ —
 „Den Dokter möt w^o woll halen laaten?“ —
 „Was? Doktor? Was? Ist Jemand frank?“ —
 „Ik freeg den falschen Toom tau facaten.“ —
 „Das frag ich nicht. Wer ist denn frank?“ —
 „„Ih, in den Stall is, Gott sei Dank!
 Nich tau verreden³⁾, All'ns gesund;
 Dll Brand is blot so up den Hund,
 Un dunn dacht ik....“ — „Das Denken lass' Er!
 Was Er auch denkt, ist einerlei.
 Mit Brandten ist es doch vorbei;
 Stellt vor sein Bett ein Eimer Wasser
 Und vor ihn legt ein Bündel Heu;
 Der Doktor wird ihm doch nichts nüß.“
 Un lachte äwe stenen Wiß,
 Rehr⁴⁾ ut dat Duhr dei Annern nah.

1) fuschern, von einer Handtierung gebraucht, die man nicht
 sehen lassen will. 2) summeln, von einer Handtirung ge-
 braucht, die man nicht fertig friegt. 3) nich tau verre-
 den = nicht zu verreden; eine allgemein gebräuchliche cap-
 tatio benevolentiae gegen Zauberei und den Neid der
 bösen Geister. 4) rehr = ritt.

Dat Hurn dat schallt: Trarah, trarah!
 Dei Hingst, dei vöömt sich för Gewalt,
 Dei Hund, dei jault, dei Pietsch, dei knallt;
 Oll Gnaden Gaus, dei retürirt
 Un buttert¹⁾ 'rüm un kriescht för Schrecf,
 Sei hett so dägern²⁾ sich vesiert.
 Hell lüchten in den Sünnenstrahl
 Dei roden un dei gräunen Röcf.
 So treckt dei Dog dat Feld hendal
 Nah 't Rangdewuh. Un Ann're kamen,
 Von allen Sieden kamen s' ran;
 Un sünd so lustig All tausamen
 Un segg'n sich fröhlich gauden Morrn:
 „Wat süll dat för 'ne Lust hüt waren,
 Wenn s' em ierst vör dei Schweepen³⁾ hahren!“
 Dei Mähren stampfen up den Born,
 Dei Nüste blöß't, dat Dog, dat blißt;
 Dei Hun'n, dei gnurrn sich an un schulen⁴⁾

1) buttert = klopfen, stampfen. 2) dägern, adv. = heftig.

3) Schweep = Peitsche. 4) schulen = von unten auf ansehen, mit dem Nebenbegriff des Neides; mit dem Nebenbegriff des Hasses wird „glupen“ gebraucht.

Nah Röteroart, gnitschäwsch¹⁾), vergrift²⁾),
 Un zwewern³⁾ 'rüm un bläken⁴⁾), huhlen,
 Bet Ein dei Pietsch tau faaten krigt
 Un dat Gezauste⁵⁾ all besredigt
 Un dei Moral von dei Geschicht
 Ehr üm dei Uhren 'rümme predigt.

Dei Hirsch is los! Hei steiht un dreicht,
 Den Kopp tau Ser sich in dei Run'n;
 En Bäwern dörch dei Glieder geiht,
 Hei süht bei Jägers, süht dei Hunn,
 Hei schmit 't Geweih up siene Schuft⁶⁾
 Un wind't un sichert⁷⁾ dörch dei Lust.
 In sienem Dog dei Sünnenstrahl,
 Dei Frieheit rings up Barg un Dahl,
 Dei Frieheit un dat Sünnengold,
 In blaage Fiern dei lust'ge Holt! —
 Hei 's frie! Hei 's frie! — En mächt'gen Satz! —
 „Halloh! Halloh!“ — Los geiht dei Haß!

1) gnitschäwsch, von Gnitt = Kräze, Grind, und schäwsch = schäbig hier in übertragener Bedeutung sowiel als: neidisch. 2) vergrift = innerlich ergrimmt. 3) zwewern = bissig umher zanken. 4) bläken = bellen. 5) Gezauste = lautes Zanken. 6) Schuft = Widerrist. 7) Weidmannsausdruck = wittern.

Dörch gräune Saat un grieße Stoppel,
 Dörch Busch un Feld un Wisch¹⁾ un Koppel.
 Hei's frie! Hei's frie! — Doa kümmt'ne Heck.
 Wo set 't hei an! — Hell d'räwe weg!
 Un achte her folgt dat Geläut,
 Dei ganze, scheck'ge Kötermäut,
 Un krüppt hendörche, jichernd²⁾, jaugelnd,
 Witt, bunt un bruun herüm krawaugeln³⁾. —
 Dei Hirsch, dei flüggt; dei Pietsch, dei knallt;
 Dei Herr vöran, dei Almern nah;
 Dei Hingst dei stiggt; dat Hurn, dat schallt:
 „Wat Frieheit hier? — Trarah! Trarah!
 Wi sünd dei Herrn, wi sünd dei Frieen,
 Laat' t doch dat Pack noch Frieheit schrieen!“
 Noch schütt hei furt, noch is hei frie
 Un lacht up all dei Köterie,
 Doch schwack un schwäcker ward sien Loop,
 Un enger schneert sich 't Nett tauhoop⁴⁾
 Un twischen Graben, twischen Muur,
 Doa ward hei stellt un senkt 't Gehürn;

1) Wisch = Wiese 2) jichern — keuchen. 3) krawaugeln;
 das Iterativum von „krawweln“ = kriechen. 4) tauhop
 = zusammen.

Doa schallt 't Hallalli em in 't Uhr,
 Dat helle, lichte Dog ward trüw,
 Weck¹⁾ seggen, dat dat Thranen wieren —
 Un wieren 't Thranen, wier 't kein Wunne. —
 Ji, Kötter all, bliewt em von'n Liew!
 Nehmt Zug in Acht! Dat Hurn dat schilt.
 So geiht dei goldne Frieheit unne,
 Mit Hun'n ward sei tau Dode hißt.
 Wat is doch twischen Muur un Graben
 Für goldne Frieheit all begraben! — —

„Jh wat!“ seggt Buuer Schwart tau Witten,
 As s' sacht den Weg entlanken führen,
 „Wat hest Du 'rüm tau spinkeliren²⁾
 Nah dei oll Jagd? Willst, Deuwel, sitten!“ —
 „„Jh, hier führst Du jo doch man Schritt,““
 Seggt tau den Ollen Barre Witt,
 „„Kief, wo dat Volk sich afmaracht³⁾),
 Un wo sich dat All lewig rögt! —
 Stell Di doch of mal blot tau Höcht!““ —
 „Jh wat! Uem so'n oll Hasenjagd,

1) Weck = Welche, Einige. 2) spinkeliren = speculiren d. h.
 umherschauen. 3) afmaracht = abquält, sich bis zur Er-
 schöpfung anstrengt.

Doa war 'k mi vähl noch afstrapzieren! —
 Nee, wenn D' wat seihn willst, füllst mal seihn,
 Wenn s' richtig Stäwelschiet¹⁾ mal rieren;
 Doa gelt dat doch noch Arm un Bein." —
 „„Na, schön is 't doch! — Süh, Barre, kief!““
 Röpt Witt un floppt sich up dei Hosen,
 „„Ik wull, ik wier entfahmten rief,
 Denn wier ik dörch mit all dei Schosen.
 Mi mein ik sülwst — vestah mi recht —
 Ik wier denn rief, dat heit as ik.““ —
 Schwart kickt em dwaslings²⁾ an un seggt:
 „Na, Barre, dat wier mal en Stück!
 Wullst Du denn Stäwelschiet mit rieren?“
 „„Ih, Gott bewohr! Nee, Barre, führen!
 Bier Schwarte vör, un ümme up un dal!
 Dei Landstraat ümme up un dal!
 Blot bei Vertehrung, glöw mi, is t',
 Wenn Du mal rief eins warn süst³⁾),
 Dat Eten, Drinken un dei Staat,
 Blot bei Vertehrung, nich dat Rieren⁴⁾.
 Un mit den Staat würr 'k woll parat,

1) Er meint „steeple chase“. 2) dwaslings = überzverg, verqueer. 3) süst = solltest. 4) Rieren = Reiten.

Un dei Vertehrung wull 'k woll liehren¹⁾ —
 Ach Gott, wat hebb'n w' nu up dei Welt?
 Kein Eigendauhm, kein Recht, kein Geld
 Un blot en schmucken Hümpel²⁾ Kinne.""³⁾ —
 Oll Schwart kicht in dat Stroh herinne
 Un grifflacht⁴⁾ vör sich hen un seggt:
 „Ih, Barre, Du redst ungerecht.
 Twors Eigendauhm, dat hebb'n wi nich,
 Un mit uns' Recht is 't tägerig,
 Un an uns' Geld, doa säl wi just
 Dei Fingern uns nich blaag an maaken;
 Doch hebb'n wi noch recht schöne Saaken:
 Des Sommers Warmniß⁵⁾, Winters Frost,
 Des Daags frie Lüchtniß⁶⁾, up dei Nacht
 Friet Schlapen, wenn wi schlapen känen,
 Un alle Joah dei schöne Pacht
 Un bi 't Betahlen friees Stähnen⁶⁾
 Un denn noch af un an en Posten
 Gerichts- un wat noch süs för Kosten

1) liehren = lehren und lernen; hier das Letztere. 2) Hümpel = Haufen. 3) griffachen = heimlich, hämisich lachen. 4) Warmniß = Wärme. 5) Lüchtniß = Erleuchtung. 6) Stähnen = Stöhnen, Klagen.

Un denn — un denn — den Herrn Drost'n.
 Bet jezt hahr w' of noch frie Vernunft,
 Doch dei 's nu in dei Krümp 'rin gahn;
 Uns' Paster un sien ganze Zunft,
 Dei is doa nich mit inverstahn.
 Un doarin weit 'k mi nich tau rahren,
 Denn wat uns' Landrost is, dei seggt:
 „Wenn blos Vernunft die Bauern hahren
 Un bloß 'ne Art Verstand davon,
 Denn fehm das Allens richtig t'recht,
 Denn konn das mäglich sin, denn konn
 Das mal mit sie eins nüdlich waren.“
 Un wat uns' Paster is, dei seggt:
 Wi sälen glöben, Barre, glöben
 Un dei Vernunft gefangen geben.“ —
 „Dat säl wi? — Nee dat dauhn wi nich!
 Nu kief mal an! Wat denkt hei sich?
 Wo? Dei Vernunft wier ageschafft?
 If haust¹⁾ in 't Amt un all dei Herrn
 Un in dei ganze Ridderschaft;
 If laat mi an dei Näs' nich lerrn

1) hausten = husten.

Un laat mi von kein Schaap nich bieten,
 Ik dahu mi up den Jüchstock¹⁾, schmieten
 Un will dei Herrn...."" — „Heda! Er! Bauer!
 Oh, bieg Er hier mal um die Mauer
 Un nehm Er uns den Hirsch mal mit!“ —
 „„Dau! Fixing²⁾!““ röppt oll Witt un ritt
 Dei Tägel Schwarten ut dei Hän'n
 Un fängt an üm dei Muur tau wen'n. —
 „Dat nennst Du up den Jüchstock schmieten?
 Un willst dei Herrn....?“ — „„Ih, Barre, red!
 Sei sünd so höflich in ehr Bähd,
 Un denn is 't of 'ne grote Ihr³⁾.““ —
 „Ne grote Last för miene Pier!“
 Brummt in den roden Boart oll Schwart,
 As em dei Hirsch upladen ward. —
 Dei lust'ge Jägetog, dei treckt
 Nu nah den Hof taurügg vöran;
 Oll Witt, dei sitt un windt un reckt
 Den Kopp grar as en Hampelmann;
 Set't bald sich dal, bald steiht hei up

1) Jüchstock = Joch. Die Redensart ist von einem wider-spänstigen Ohsen hergenommen. 2) fix = schnell. 3) Ihr = Ehre.

Un schnackt un drähnt von grote Ihr.
 Oll Schwart seggt: „Büst 'ne Klätepupp¹⁾?
 Du schnakst jo Allens fort²⁾ un klein.
 Dat wier 'ne Ihr, dat Hun'n un Pier
 Un Herrn uns mit den Staart ansehn?“ —
 „„Ob Ein mi mit den Staart ansüht,““
 Seggt Witt, „„dat is mi ganz egal,
 Wenn 't blot mit 'ne Manier geschüht.
 Nee kief doch blot den stolzen Herrn,
 Doa up den Schimmelhingst, doa vörn.““ —
 „Den seih 'k hüt nich taum iersten Mal,“
 Seggt Schwart. „Wat sien Grotvahre wier,
 Dei drog dei Näs' noch nich tau Höcht
 Un satt noch nich so stolz tau Pier,
 Dat was en richt'gen Scheepfnecht³).
 Von den'n deiht all sien Niekbauhm stammen,
 Von 't Bucken, Barre, un von 't Lammern.“ —
 „„Ih, Barre, Du hest kein Gesäuhl.
 Kief blot dat lustige Gewäuhl,
 Wo sich dat treckt den Weg entlang,

1) Klätepupp, ein Kinderspielzeug, eine hohle mit Erbsen gefüllte Puppe. 2) fort = kurz. 3) Scheepfnecht = Schäferknecht.

Un all dei roden Röck mit mang.""" —
 „Oh, ja, ik seih s," seggt Schwart un grient,
 „Doch is nich Allens Gold wat schient.
 Kief blot mal nipping¹⁾ tau: bi Weck
 Liggt up dei schönen roden Röck
 Doch of entfahmten vählen Dreck." — —

Na, endlich kümmt dei ganze Trupp
 Nah den bekannten Hof herup.
 Dei Buuren hollen vör dei Döhr,
 Dei Herren stiegen von dei Pier,
 Un dei von ehr dei Vörnehmst wier,
 Dei winkt, un Barre Witt trett vör.
 Dei Herr klemmt sien Lorjett in 't Dog,
 Kickt Witten sief Minuten an
 Un frög: „Sein Name, lieber Mann?"
 Nee, wo dat Hart oll Witten schlog!
 Blot ut Respekt freeg hei dat Schweiten²⁾
 Un ann're Unbequemlichkeiten.
 „„Herr Gnaden,"" seggt hei, „„ik heit Witt,
 Wo süll ik groot noch anners heiten?

1) nipp = genau; nur vom Sehen gebraucht. 2) Schweiten = Schwitzen.

Un dei doa up den Wagen sitt
 „So? so? — Der Name lieber Freund?“
 Dei Oll hahr fast vör Freuden weint
 Bi all dei Ihr un duuft¹⁾ sich nerre:
 „„Mien Nam is Witt, un dei doa sitt“
 „Der Name?“ frögt dei Herr em werre.
 „„Mien Nam is Witt.““— „Na, lieber Schmidt,
 Ich wollt nur sagen — Ihm nur sagen,
 Er hat sich heute gut betragen.
 Ich kann den Bauersmann wohl leiden,
 Wenn er gefällig und bescheiden,
 Das kann Er auch dem Andern sagen. —
 Heda! 'nen Schnaps für diese Beiden!“
 Doch würr binah dei Ned em Leed,
 As hei herup keek nah den Wagen,
 Wo Barre Schwart recht paßig seet.
 Den Oll'n keek ut sien dwaslings Dog
 So'n rechten floaren Spitzbauw 'rut,
 Un üm sien breides Muhl, doa flog
 So'n schnurrig Lüchten un so'n Blißen,
 Dat leet binah as luute Wißen,

1) duuken = tauchen, bücken, kauern.

Dat seeg binah as Lachen ut.
 Un sitt un rögt nich Hand un Faut
 Un seggt, as Witt so wollgemauth
 Nah'n Wagen werre 'ruppe krawelt:
 „Na, Barre, hest Di schön besawwelt¹⁾!“
 Un seggt, as Witt nah'n Schnaps deiht janken²⁾:
 „All gaut! Wi laat uns schön bedanken.“
 Un as oll Witt rehd von dei Ihr,
 Schleicht Schwart schwabb! dwaslings mang dei
 Pier;
 Un as sei in den Landweg kamen,
 Dunn frögt hei Witten: „Wo 's der Namen?“
 Un as oll Witt von „Herrn“ seggt,
 Dunn singt oll Schwart entfahmte Liere
 Von: „Scheepknecht“
 Un „dauh mi recht,“
 Von'n: „Duhrweg“ un von: „so wiere;“
 Un behdt ganz allerleinste Stückschén
 Un halt en Dahle ut dei Tasch

1) besawweln, auch beseiweren, wird von kleinen Kindern gebraucht und heißt = begeistern. Im übertragenen Sinne bedeutet es: sich unpassend aufführen, sich blamiren. 2) janken = Sehnsucht, Gelüste, Appetit, Verlangen nach etwas haben.

Un wiest em den'n un lacht so tückſchen¹⁾):
Na, Barre, maak en Diener rasch!" — —

Un duusend von Lichte dörchstrahlen den Saal,
Dei Poare, dei ſchesen²⁾ herup un hendal;
Sei knicken un bücken un tillfäuten³⁾ 'rüm
Un flustern so leiflich mit fäutliche Stimm
Un tuscheln⁴⁾ tausam;
Dei Herr un dei Dam,
Sei laaten as Duuben un Lämmer fo fram.

Un häweln⁵⁾ un schnäweln un kurren⁶⁾ fo zoart,
Sei strickt dei Fresur ſich, hei strickt ſich den Boart;
Hei drückt ehr den Hanschen⁷⁾), ſei ficht in den
Schoot,

Un nu ward hei driste, un nu ward ſei roth.
Un 't weit doch dei Welt,

1) tückſchen, adv. = tückiſch. 2) ſchesen. Wollte man das Wort mit Tanzen überſetzen, so würde dadurch nicht Alles ausgedrückt ſein. Schesen wird nur von einer wiegenden, ſchleifenden Tanzbewegung gebraucht. 3) tillfäuten, von tillern, d. h. eine hüpfende, zitternde Bewegung machen, und von Faut = Fuß. 4) tuscheln = flüstern. 5) häweln = kindiſch ſcherzen. 6) kurren = gitren, von Tauben gebraucht. 7) Hanschen = Handschuh.

Dat s' em nich geföllt,
 Dat hei sei blot friegt üm dat leidige Geld.

Dei Herrin von 't Huus is in Gold un in Sier,
 Doa drückt 't sich un bückt 't sich bet dal up dei Ter,
 Schnitt stiew¹⁾ Kumpelmenten up knic'rige Bein;
 Sei freu't sich so gneedig un nimmt sei as ein
 Unschülliges Kind
 För boare Münt,
 Un weit doch all längst, dat dat Lägen sünd.

Un Eten un Drinken up Sülwe un Gold!
 Dat Ies is so frisch un dei Wien is so olt.
 Dei Herr böhrt den Bäker: „Recht lang' so
 man noch!
 Wat scheern uns dei Annern? Bier Dahle dei
 Rogg!“

Dat Rappwater²⁾ flütt³⁾ ,
 Ein Jeder drinkt mit,
 Stött an mit den Nahwer⁴⁾ dei neben em sitt.

1) stiew = steife. 2) Rappwater = Rappswasser. Als durch glückliche Preise und glücklichen Bau des Rappses die Landleute reich geworden waren, floß der Champagner und wurde nach seiner eigentlichen Quelle „Rappwater“ genannt. 3) flütt = siegt. 4) Nahwer = Nachbar.

Dei gruglichste Viederjahn rings in dei Run'n,
 Dei fischt den Herrn Paster dat Wurt ut den
 Mun'n,

As dei in sien geistliches Füer un Fett
 Up Kirchenbuß un up den Schandstaul gerött¹⁾,
 Un drückt em dei Hand:

Dei Saak wier bewandt²⁾), —

Dat heit för dat Volk, för den Daglöhner-Stand.

Un 't is so'n Behagen, un 't is so'ne Lust!
 Nah Specksieden schmieten s' vergnäuglich mit
 Lust.

Dat schmeichelt un lawt³⁾) sich so driest in 't
 Gesicht

Un kettelt⁴⁾ un fragt sich un rökert⁵⁾ un lügt.

Nu jæk⁶⁾ Du ierst mi,

Denn nahst jæk ik Di!

Doch plötzlich is 't all mit dei Lust vebi. — —

En Flüstern geiht den Saal entlang:
 „Der Wirth, er liss so schnell hinaus —

1) gerött = gerath. 2) bewandt = zweckmäßig, praktikabel.

3) lawt = lobt. 4) kettelt = kitzelt. 5) rökert = räumert. 6) jæk = jucke.

Ist etwa Feuer in dem Haus? —
 Was ist passirt? — Istemand frank? —
 Ein Tagelöhner? — So! — Nu, Gott sei Dank!
 Ich glaubt', es würd' was Schlimmes sein. —
 Ein Tagelöhner blos! — Nein, nein!
 Der nicht! — Eins von den Pferden,
 Der Schimmelhengst hat Harnbeschwerden. —
 Der Hengst? — Der Hengst? — Der Worsleyhall?
 Ich würd' verrückt — paroles d' honneur! —
 Wenn ich so'n edles Thier verlör." —
 Un'rute lopen s' nah den Stall
 Un stahn un duurn un geben Rath;
 Dei Ein, dei hölt dei Schnirt¹⁾ parat,
 Dat Beiharzneibauf bedt en Anne,
 As wier 't sien däglich Lex²⁾, utwennig,
 Dei Drürr³⁾), dei schleept dei Decken 'ranne
 Un deckt sei äwe eigenhännig.
 Dei Herr, dei röpt: „Wo 's Jehann Schütt?
 Dat glied hei nah den Dokter ritt
 Un em vertellt, wat hier passirt!

1) Schnirt = Sprize. 2) Lex = Section. 3) Drürr = Dritte.

Mien schöne Hingst, mien dühres Diert¹⁾!"
 Un dei oll Daniel trett heran:
 „„Bi Batte Brandter sitt Gehann.
 Herr, doa 's en goa tau grotes Leiden;
 Herr, ik will rieden, wat ik kann,
 Sall ik nich leiwerst²⁾ glied dei Beiden,
 Den Pier= un Minschendokter hahlen?"" —
 „Hei deiht, wat ik em hew befahlen.
 Marsch! Vörwarts! Rasch! Wat luurt Hei
 denn?"" —

Un Daniel jögt den Weg doahen,
 Sien wittes Hoar spält in den Wind,
 Un düster liggt dei Nacht herüm,
 Un düster spreect in em dei Grimm:
 „„Sei segg'n jo, dat 'w of Minschen sünd.
 Na, Gott sei Dank!
 Noch bün 'k nich frank;
 Doch kümmt mal eins an mi dei Reih,
 Denn wull 'k, ik wier en leiwes Beih. —
 Sei seggg'n jo, dat w' of Minschen sünd!

1) Diert = Thier. 2) Leiwerst = lieber.

Ik hew kein Regel un kein Kind;
 Dat was mal eins 'ne ann're Tied,
 Doch dei liggt wiet!"""
 Un stött dei Spuren in dei Rippen
 Un flüstert äw're bleiken Lippen:
 „„Wenn blot kein Unglück mal geschüht!"""

7.

Dei Dod.

Du Batte Brand liggt up den Dod;
 In 't Finste schient dat Morgenroth;
 Dei oft hett schient in Noth un Leid,
 Dei dunst'ge Lampenschien vegeiht,
 En niee Morgen breckt heran. —
 An 't Finstersäms¹⁾ lehnt still Jehann,
 Süht vör sich hen, wo an dei Wand
 Dei bunten, roden Sünnenstrahlen
 Sich schämernd mit dei Schatten malen,
 Un foahrt sich mit dei harte Hand
 Lauwielen äwer 't fuchte Dog,
 Wenn up Mariek den Blick hei schlog;
 Dei mit dei Schört²⁾ för dat Gesicht

1) Säms = Gesimse. 2) Schört = Schürze.

Haltw äwer 't Bedd heräwe liggt.
 Ach, wo 't ehr dörch dei Glieder flog
 Von Schuur'n, von deipe Hartenschuur'n¹⁾!
 Wo dehr dei arme Diern em duurn! —

Dei Döhr geiht up un liesing treitt
 Oll Daniel 'rin, geiht an dat Bedd
 Un nimmt sien Käppel in dei Hand
 Un seggt mit bärerig Stimm:
 „Gun Morgen, Korl! — Kennst mi noch Brand?“
 Dei Krank dei dreischt den Kopp herüm
 Un süht em frömd in dat Gesicht,
 As wenn Ein kümmt ut siernen Land
 Un werre nu taum iersten mal
 Sien Bahres Huus tau seihen krigt:
 Em is dat frömd un doch bekannt,
 Un tägernd steiht hei för dei Döhr
 Un weit nich, ob hei 'rinne fall;
 Em kümmt 't so olt un knendlich²⁾ vör,
 Hei stünn vör schön're Hüüse all.

1) Hartenschuuren = Herzensschauern. 2) knendlich, woh von Knie abzuleiten, also = kneihoch, kleinlich, erbärmlich; wird auch gebraucht in der Redensart „knendlich bidden“ = kneindlich bitten.

Un süht ehr all in dei Gesichte
 Un süht dei goldnen Morgenlichte,
 Dei dörch dei düst're Kame¹⁾ teihn²⁾;
 Dat hett hei vördem³⁾ All mal seihn,
 Un 't sprecket so leislich em tau Sinn;
 Hei kiehrt up Jeren noch mal in
 Un seggt: „Marieken, böhr mi höger,
 Un rückt mi an dat Finste neeger⁴⁾,
 Ich will bei Sünn noch einmal seihn.“
 Un as 't nah sienem Wunsch gescheihn,
 Dunn deicht sien düster Dog sich hellen,
 Hei röpt heranne Daniellen
 Un frögt so recht ut friee Bost:
 „Hüt is woll wunderschönes Weere?“ —
 „„Wi hebb'n den iersten hellen Frost.““ —
 „So 'st recht! So 'st recht! — Hüt fall'n bei
 Blähre.

Up desen Dag hew ik so oft
 Tau Gott up mienem Lager hofft.
 Wenn föllt dat Blatt, denn war ik frie,

1) Kame = Kammer. 2) teihn = ziehn. 3) vördem = früher. 4) höger = höher; neeger = näher. Auch hier ist das „g“ des Hiatus wegen eingeschoben.

Denn war 'k erlöst, sähr 'k oft tau mi."

Un ficht sien Kind so leidig¹⁾ an:

„Kumm her, Mariek, kumm neeger 'ran!

Of Di, mien Kind, ward lichte sin,

Wenn ik nich mihr tau last Di bün."

„„Oh, Bahre, nee!“ — „If weit, if weit:

Du wierst mien Kind, mien true Magd;

If weit mit Di all längst Bescheid,

Un wat Di drückt. Wes nich verzagt!

Dehrst Du of — „„Bahre, all mien
Leben !““

„Dehrst Du von sienem Weg of wieken,

Uns' Herrgott ward Di woll vergeben;

Wi seihn uns werre, leiw Marieken!

Wein nich, mien Kind! Folg²⁾ mi dei Hän'n,

Als Du dat alle Abend dahn!

Is 't of mit dese Sünn tau En'n,

Uns ward 'ne anne Sünn upgahn.“

Un rod von Weinen un von Schaam

Gift s' em dei lahmen Hän'n tausam. —

1) leidig; wird sowohl in activer als in passiver Bedeutung gebraucht und bedeutet Beides: „Mitleid fühlend“ und „Mitleid erregend.“ Hier das Erstere. 2) folg = falte.

Dei Bahre behdt för 't Kind so heit
 Un still is 't binnen, still is 't buten¹⁾),
 En Engel dörch dei Kame geiht,
 Un Gottes Og ficht dörch dei Ruten²⁾)
 Un gütt³⁾ sien Licht in vulle Fluth
 In bange Minschenharten ut.
 Dei Bahre behdt so heit för 't Kind,
 Von'n Heben weiht dei Morgenwind,
 Dei Sünndags = Kirchenklocken klingen
 Von 't Kirchdörp säut un liesing her,
 Dei sünd't, dei em dei Antwort bringen.
 Un bi Mariel föllt dal Jehann
 Un schleicht den Arm so truu üm ehr
 Un treckt sei an sien Hart heran.
 Em is 't, as wenn tau dese Stun'n
 Dei Seelennacht, dei em bedrückt,
 Vör Sünnesschien un Klingen wict,
 As hahr hei sich nu werre fun'n,
 As wenn nah düstre Winternacht
 In Frühjoahrslust un Frühjoahrspracht

1) binnen un buten = innen und außen. 2) Ruten = Gen-
 sterscheiben; von „Raute.“ Deshalb im Kartenspiel =
 Carreau. 3) gütt; von geiten = gießt.

Sien Hart in em tau bläuhēn füng,
 Unschüllig rein un froh taumal,
 As wenn hei noch taum Behden¹⁾ güng
 Un siert dat ierste Abendmahl.
 Un up sien gählen²⁾ Locken lag
 So licht un floar dei junge Dag,
 Un seelig lücht sien Dog doarin
 As Hoffnungsschien un Morgensünn. —

„O! Bahre Brand halt deiper Athen,
 Un 't was as wenn üm siene Dogen
 Sich düst're all dei Schatten togen:
 „Du warst dei Beiden nich verlaaten,”
 Seggt hei mit Mäuh tau Daniellen.
 „Wi Beiden wieren Spälgesellen,
 Du wierst mien Fründ un blewst³⁾ mien Fründ.
 Des' Beiden dauh 'k up 't Hart Di leggen;
 Wenn s' nich up rechten Wegen sünd,
 Denn fallst Du ehr den rechten seggen.
 Willst Du dat dauhn?” — „Ja, Körle, ik will.”“

1) behden = beten. „Taum Behden gahn“ auch „Taum Preister gahn“ wird vorzugsweise für „zum Confirmationsunterricht gehen“ gebraucht. 2) gähl = gelb. 3) blewst = bliebst.

Un werre is dat ringsüm still,
 Dei franke Bost blot räkelt¹⁾ holl,
 Un ümme düst're ward sien Dog;
 Sien Daniel böhrt den Kopp em hoch,
 Un schwack un schwäche ward dei Oll,
 Doch plötzlich nimmt hei sich tausamen,
 Als wier'n em niege Kräften kamen,
 Un seggt: „Bald is 't mit mi gescheihn;
 Ik kann mien Kinne nich mihr seihn;
 Doch ihre²⁾ mi dei Dogen breken,
 Kamt neeger 'ran,
 Mariel, Gehann!

Ik will dat lezte Wurt nu spreken:
 Zug einzigst Arwdeihl³⁾ is dei Noth,
 Zug einzigst Lohn dat däglich Brod;
 Dei Arbeit is Zug einzigst Freud,
 Ji sied Zug einzigst Dogenweid;
 Dei heilig Schrift is, richtig lesen,
 Hier un'n Zug einzigst Stütt un Staf,
 Un wenn Ji nah ehr Vörschrift wesen,
 Denn is Zug einzigst Trost dat Graf.

1) räkeln = röcheln. 2) ihre = eher, bevor. 3) Arwdeihl = Erbtheil.

Känt Si nich an Zug sülwst Zug freu'n,
 Nich Dag för Dag mit Armauth ringen,
 Ahn Afgunst¹⁾ Macht un Riekbauhm seihn,
 Känt Si dat troß'ge Hart nich dwingen,
 Nich jede Arbeit still verrichten
 Ahn Werrewür²⁾ un böß' Gedanken
 För jeden Herrn, of för den schlichten;
 Känt Si nich jeden Abend danken
 Uprichtig för Zug' suures Brod,
 Denn wier 't am Besten, Si wier't dov,
 Un dat Si leegt an miene Stähr."
 Un schwacke würr hei, as hei 't fähr
 Un höge geiht dei franke Bost,
 Mit Mäuh noch kann hei Athen halen;
 Dörch siene Glieder tüht en Frost,
 Dei lezt von alle Ferenqualen;
 Un flustert: „Wull Zug woll noch segen³⁾,
 Kann blot mien lahmen Hän'n nich rögen."
 Un Daniel löst dei behden⁴⁾ Hän'n

1) Afgunst = Abgunst, Neid. 2) Werrewür = Widerworte.

3) segen = segnen. 4) behden; statt behdenden = bilden. — Diese abgekürzte Form des Particips ist, wenigstens in meiner Gegend, sehr gebräuchlich. Man sagt z. B. loopen Trin, schrien Föhr ic. für: laufende Trine, schreiendes Kind ic.

Un höllt sien lahmen Arm in En'n,
 Un luut un dütlich seggt dei Oll:
 „Lewt woll, leiw Kinnings, lewt recht woll!
 Un ümme gaht up Gottes Wegen!
 Gaht an dei Arbeit, an dei Noth
 Mit Mauth un Lauversicht! Dei Dod,
 Dei bringt den Lust¹⁾ un Gettes Segen.
 Holst ut! Holst ut!” — Un sachtaurügg,
 As wenn hei wier von Arbeit mäud. —

Woll gahn dei Kirchenklocken säut,
 Dat schlatten Uhr vernimmt sei nich;
 Woll führt dei leiwe Gottesfünne
 So hell in 't braken Dog herin;
 Dat Glas is trüw, dei Speigel blind.
 Woll drückt sien Hand dat arme Kind,
 Woll schmit s' sich weinend an sien Lief,
 Woll fött sei em so heit un warm
 Un drückt em jammernd in dei Arm,
 Sien Hart is still, sien Hand is sties;
 Un ein Gedank, ein Bangen füllt,
 So kolt as Ies, so schwer as Stein,

1) Lust = Erndte.

In ehr Gemäuth: sei steiht allein,
Allein, allein in wiede Welt.

Wat of' Jehann ehr seggt un heiht,
Dat truu hei ümme bi ehr steiht;
Wat of' bei olle Daniel tröst't
Un in sien frame Insolt seggt:
Sei kunn sich freu'n, hei wier erlöst,
Hahr alle Sorgen von sich leggt;
Hei wier üm ehr tau jede Stun'n
Un seeg¹⁾ von 'n Himmel up ehr 'run
Un würr in Leiden un in Freuden
Sien Kinne woll in Gott behäuden²⁾;
Sei hürt dat blot mit halwen Uhren,
Ehr is 't, as wier sei noch en Kind
Un hahr bi Regen, Nacht un Wind
Sich in en düstern Holt verluren,
As wüxt sei nich, wohen un her,
As fehm en Grugel³⁾ äwe ehr.
Un as dei Beiden Affcheid nahmeu,
Dunn sackt sei still in sich tausamen:

1) seeg = sähe. 2) behäuden = behüten. 3) Grugel = Grauel, Grauen.

Ach, wer s' doch lähr¹⁾

An siene Stähr! —

Sei 's still; dei Nahwersfruuens²⁾ kamen
 Un gahn tau Hand mit Rath un Dath,
 Dei Dische kümmt un nimmt dei Maat
 Un süht dat Bäten Armauth an
 Un frögt nah 't Sarg. Sei antwurt' lies:
 „So wollseil, as 't man wesen kann.“
 Un as dei Abend 'ruppe tüht,
 Dunn sitt sei noch nah eine Wies¹⁷
 Bi 't Bedd an ehres Vahrers Sied,
 Oll Loppelsch bringt dei Lamp herin
 Un seggt: „Nu legg Di dal, Mariel,
 Ik will nu wachten bi dei Liek“. —
 „„Nee, Nahwersch, nee! Nee, laat s' mi sin!“
 Un dörch ehr Glieder schuddert³⁾ Frost,
 Un üm ehr schleicht dei Fruu en Dauf.
 Un up den Doden siene Bost
 Doa leggt s' en oll vergräpen⁴⁾ Bauf,
 Purrt⁵⁾ noch tau Höcht den Lampendacht

1) lähr = legte. 2) Nahwersfruuens = Nachbarsfrauen.

3) schuddert = schaudert. 4) vergräpen = vergriffen.

5) purren = stochern.

Un schürrt den Kopp un seggt; „Gut Nacht!“
 Marieken dankt, un schwer Gedanken;
 Dei trecken ehr dörch Hart un Sinn;
 Wat sei of behdt, sei will'n nich wanken.
 Ach, wer dei Taufkunst weiten kunn!
 In ehr is so en wild Gewäuhl,
 Dat drängt sich düster dörch ehr Hart,
 Un Kloar is blot dat ein Gesäuhl,
 Dat gröter Unglück kamen ward. —
 Un drieste Tritten kamen 'ran;
 Dei Döhr geiht up, dat is Gehann.
 Hei set't sich dal, ahn wat tau seggen,
 Un deiht ehr Hand in siene leggen.
 Hei hett dei Truuer äwerwun'n
 Un denkt mit Freuden d'räwer nah,
 Dat hei nu äwer Dag un Stun'n
 Kann trecken nah Amerika.
 Den letzten Niegel vör sien Glück,
 Den schöw¹⁾ hüt morrn dei Dod taurügg.
 Doch as hei s' doamit trösten will
 Un tau ehr von dei Taufkunst rehrd,

1) schöw = schob.

Un wo dat herrlich warden süll,
 Dunn güt' ehr frostig dörch dei Ahre,
 As würr dat Hart tausamen schneert,
 As wier 't 'ne Sün'n an ehren Vahre,
 As wier 't 'ne Sün'n, in ehre Lag',
 In niege Hoffnung furt tau leben,
 As wier 't 'ne Sün'n, an bet're Daag',
 Noch mal an Freud un Glück tau glöben.
 Wat hei of seggt von 't schön're Land,
 Ehr schuddert kolt, as wenn ehr gruut,
 Un treckt ehr Hand ut siene 'rut
 Un fött dei folle Dodenhand.

8.

Dei Mürd.

Ol Brand is in sien Sarg 'rin leggt;
 Doa liggt hei still; kein Grafrehd seggt,
 Wat hei all dehr un leer¹⁾ hier un'n;
 Hett sich 't entseggt²⁾ un hett 't verwun'n,
 Hett still un sacht sien Leben schlaaten;
 Sien Wirkn hett kein Spuren laaten,
 As 't Abendroth is hei verschwun'n.
 Kein Fründschaft³⁾ folgt em achter her —
 Den Herrn sien Arbeit, dei geiht vör —
 Kein Nahwer dröcht sien arme Lief;
 Gehann un Daniel, dei dragen

1) dehr un leer = that und litt. 2) hett sich 't entseggt; wörtlich = hat sich's entsagt. Allgemein gebräuchliche Redensart für „sterben“. 3) Freundschaft wird vorzugsweise für „Verwandte“ gebraucht.

Den Näsendrücker¹⁾ up den Wagen,
 Sien einzigst Folg' is sien Mariek,
 Ehr Süfzen is sien Liekensang.
 Den harten, froren Weg entlang
 Nah 't Kirchdörp rummelt furt dei Kist;
 Kein Preister segen't siene Rüst;
 Gehann un Daniel, dei laaten
 Dat Sarg herinne in dat Graf.
 Dei Schüpp²⁾ tau Hand! — Dei Gruft is schlatten.
 Oll Daniel nimmt den Haut heraf
 Un höllt em vör sien iernst Gesicht
 Un behdt för den'n, dei unnen liggt,
 En Bahreuns³⁾ ut deipe Bost. —
 Dei ierste Schnei in desen Joah
 Sackt lies' herunne up den Frost,
 Up 't frische Graf, in 't witte Hoa,
 Un duusend stille Faden weben
 Sich twischen Fer un twischen Heben
 Taum sieerliches Liekenkleed,
 Dat wickelt sich üm Allens 'rüm,

1) Volksausdruck für einen Sarg mit plattem Deckel, wie er
 für ganz arme Leute im Gebrauche ist. 2) Schüpp =
 Schaufel. 3) Bahreuns = Vaterunser.

Nem 't folle Graf, üm 't warme Leben.
 Un in Mariel doa sprecht 'ne Stimm:
 „Wat drückt Di so Dien grotes Leed?
 Wat flagst un trauerst Du, Mariel?
 Vör Gott is Dod un Leben glied;
 Hei deckt up 't Leben blassen Dod
 Un weckt ut Nacht dat Morgenroth,
 Wer in em lewt, dei nich verdarwt¹⁾,
 Un leben deiht, dei in em starwt.
 Hei leggt dei Fer in 't Dodenkleet²⁾
 Un weckt sei up tau Frühjohrsleben;
 Un leggt hei up Di schweres Leed,
 Ward hei Di ok en Frühjoahr geben,
 Wo männig³⁾ Blaum Di werre waßt,
 Un wo Dien Hart kann werre gräunen,
 Still' Diene Klag' un laat dat Weinen!
 Sei treckt den dünnen Dauf sich fast
 Nem Arm un Bost, as wier 's entschlaaten,
 Schmitt einen Blick noch up dat Graf,
 Drögt sich dei letzten Thranen af;
 Oll Daniel frigt ehr Hand tau saaten;

1) verdarwt = verdirbt. 2) Dodenkleet = Todtenkleid. 3) männig = manche.

So geiht sei trüg, in 'n Harten Mauth
 För 't Unglück, wat tau kamen drauht. —

Jehann führt sachten achte her,
 In em sprefft 't anners, as in ehr;
 Unruhig jagt ein Plan den annern:
 Hei kann nu trecken, kann nu wannern
 Friet äwer See un äwer Land;
 Sied dem, dat dod is Batte Brand,
 Is em bei Welt nich mihr verschlaaten;
 Hei kann nu kunn'gen¹⁾, wenn hei will,
 Dei Herr, dei möt em trecken laaten,
 Un wenn hei em wat seggen süss,
 Denn blift hei em kein Antwort schüllig.
 Hei is nu frie, so gaut as frie,
 Un ut is nu dei Schinnerie,
 Hei drögt s' nu nich mihr so gebüllig. —
 Un as hei nah den Hof 'ran kümmt,
 Dunn föllt em all dat Utrecht in,
 Sien Grull dei stiggt un grunst²⁾ un grimmt

1) kunn'gen = kündigen. 2) grunsten, vielleicht ursprünglich = dem Hochdeutschen „grunzen“. Es wird jetzt aber nur von verbissenem Ärger und Gross gebraucht. Z. B. „dat grunst em“ = „das verdrießt ihn“.

Em dörch dat Hart un dörch den Sinn:
 „Ja“, seggt hei, „ja, wi sünd ehr Slaben,
 Sei sünd dei Herrn, wi sünd dat Schund.
 Den ollen Mann so tau begraben,
 Nich as en Christ, nee, as en Hund!
 Den Dokter nich mal halen laaten!
 Ja, wenn w' so Mähren wesen dehren!“
 Un frigt in Grull dei Pietsch tau saaten
 Un hau't ingrimmig mang dei Mähren,
 As müßt hei 't dei entgellen laaten.
 Dei gahn tau Höcht un richten an.
 Hei törnt¹⁾ un höllt sei, wat hei kann,
 Doch dat 's vergewis, dei Tägel ritt,
 Dei Hingst geiht dörch, dei anne mit;
 Un up den Hof jagt 'rup dei Wag',
 Dei Lerre flüggt, dei Unnelag!²⁾
 Noch sitt Jehann, — nu ligt hei un'n;
 Den Tägel üm dei Hand 'rüm wun'n,
 So schlæpt hei nah. Dei Mähren gahn,
 Bet s' vor den Stall von sülben stahn. —

1) törnen = aufhalten, bändigen. 2) Unnelag' = Unterlage.
 So wird das Brett genannt, welches den Boden eines Bauwagens bildet.

Oll Daniel löppt un folgt den Wagen,
 So fir dei ollen Knaken dragen.
 Gott lob! Kein Unglück is gescheihn.
 Dat Veih riffschlagt¹⁾ , doch is 't gesund,
 Gehan'n geiht Blaut ut Näs' un Mund,
 Doch heil sünd em noch Arm un Bein.
 „Gehann, hest Di of Schaden dahn?“ —
 „„Nee, nee!““ Un lerrt dei Mähren 'rinne
 Un fött dei Fork²⁾: „„Entfahmte³⁾ Schinne!““
 Un fängt doā an up los tau schlahn.
 „Schäm Di,“ seggt Daniel, „dat tau dauhn!
 Wo kannst en Veih so glupschen⁴⁾ hau'n?“
 Un will den Arm taurügg em holl'n.
 Hei ritt sich los un stött den Oll'n,
 Dat in dei Eck hei 'rinne flüggt.
 Dei Herr trett in den Stall un seggt:
 „All werre⁵⁾? Dunn all bi dat Füer!
 Hew ik hier Jungs bi miene Pier?“
 „„As Jung dehr ik mi nich vermeiden⁶⁾,“

1) riffschlagen = mit den Rippen schlagen, feuchen. 2) Fork = Gabel, hier Dunggabel. 3) entfahmt, oder auch entfahmtig = infam. 4) glupsch = plump, ungeschickt, gradezu. 5) all werre = schon wieder. 6) vermeiden = vermiethen.

If bün tau olt, üm Schwien tau häuden! "
 „Halunk! So'n Antwort gifst Du mi?“
 „„Ja, Minschenschinne, so'n för Di!“
 Dei Herr, dei schleicht in vulle Wuth
 Em mit dei Rietpietsch int Gesicht,
 Oll Daniel springt doamang un schriggt:
 „Jehann, Jehann, holl ut! holl ut!“
 Begews! Tau späd! — En mächt'gen Stoot!
 Hoch halt hei ut; dei Fork, dei flüggt,
 Un mit dei Messfork stött hei'n dod. —
 „Herr Gott! Herr Gott!“ Oll Daniel schmitt
 Sich up den Herrn un deih't un ritt
 Den Rock em un dei Kleeder open¹⁾;
 En roden Strahl flütt ut dei Post:
 „Oh, Satan, Du hest gruglich drapen²⁾!“ —
 Jehann lehnt an den Stänne-Post³⁾;
 Vöräwebög't mit halben Lief,
 Steiht hei so starr, as wier hei stief;
 Un ümme gröte, ümme stiere

1) open = offen. 2) drapen = getroffen. 3) Stänne-Post
 = Ständer-Pfosten. Stänne = Ständer, Stand, ist
 der für einzelne Pferde oder ganze Gespanne durch Bret-
 ter oder Bäume abgeschiedene Raum.

Stahn em dei Dogen ut den Kopp,
 So aschenbleik licht hei, as ob
 Dei Stoot em sülben dröp¹⁾, as wier 'e
 Dodschlagen sülwst, un nich dei Müre²⁾).
 Dei Pietschenstriem un rode Schrammen,
 Dei liggen up bei bleike Tiern
 Un lüchten up in bläud'ge Flammen,
 As wenn dat Rainsteiken³⁾ wier'n. —
 Oll Daniel hewt sich von bei Liek:
 „Oh Gott, Jehann! Oh Gott, Mariel!“
 Un as hei em tau seihen frigt,
 Em 'rinne führt in 't bleik Gesicht,
 Dunn tummelt 'ran hei an dei Wand,
 Dunn waren schwack bei ollen Bein,
 So'n Anblick hett hei noch nich seihn
 Un höllt sich vör 't Gesicht bei Hand:
 „Unseelig Minsch, wat hest Du dahn?
 En Murd, en Murd hest Du begahn,
 En Murd, dei 'rup taum Himmel schrigt!“
 Un führt em werre in 't Gesicht,
 Un 't is, as wenn hei em noch duurt,

1) dröp = traf. 2) Müre = Mörder. 3) Rainsteiken = Rainszeichen.

Fött sich en Hart un stött em an:
 „Hürst Du denn nich? Gehann, Gehann!
 Oh, Unglückskind, furt! Mit di furt!“
 Un stött em, röpt¹⁾ em in dei Uhren:
 „Minsch, Minsch! Maak furt, süs büst verluuren!“
 Un in Gehan'n kümmt werre Athen,
 Hei deiht as blind herümme faaten,
 Un ficht nah dit un ficht nah dat
 Un grippt²⁾ herüm un weit nich wat,
 Un Hand un Dog geiht fürchterlich,
 Un tast nah hin'n un tast nah vör
 Un tummelt von dei Lief taurügg —
 En grugliches Handtieren was 't —
 Un will herute ut dei Döhr,
 Un Daniel höllt em nochmal fast
 Un röpt em tau: „Dei hollen Eiken! —
 Dei schwarte See! — doa will 'k Di säufen³⁾“
 „„Ja,““ seggt hei, „„ja!““ mit hast'ge Stimm,
 So holl, as fehm s' all ut dei Gruft.
 Un as hei kümmt in frische Lust,
 Dunn dreiht sich Allens mit em 'rüm,

1) röpt = ruft. 2) grippt = greift. 3) säufen = suchen.

Hei föllt, — hei rappelt¹⁾ sich tau Höh;
 „Dei holle Eif, dei schwarte See!“
 Dat is sien einzigste Gedank.
 Dei Steinmuur löppt hei nu entlang:
 „Dei holle Eif, dei schwarte See!“
 Un 'räwe set't hei, as en Neh.
 Nu is hei weg! Nu, Gott sei Dank! —

Un all dei Lühd²⁾, dei Döschers³⁾ all,
 Dei drängen sich nu in den Stall:
 „Wat is 'e los? Wat is gescheihn?“
 Wer dehr bei Dath? — Wer hett dat seihn? —
 En Unglück is 't, doch is 't em recht! —
 Wer hett bei Hand hier an em leggt? —
 Un ahn dat Eine doavon weit,
 En Flustern dörch bei Minschen geiht:
 „Jehann, bei wier 't, bei kann 't man sin.“
 Un bei Inspecter stört' t. herin:
 „„Wat staht Si hier as in den Droom?
 Den Hingst herut! Un 'rup den Toom!
 Doa löppt bei Müre dörch den Schnei.

1) rappeln = raffen; hat sonst auch noch die Bedeutung = gestört sein. 2) Lühd = Leute. 3) Döschter = Drescher.

Hallunk, dat Di Dien Recht gescheih!
 An 'n Galgen is Dien richtig Platz! —
 Dei Hand up 't Krüz¹⁾! En mächt'gen Saz!
 Halloh! Halloh! Los geiht dei Has! —
 Wo bruust hei dörch dat apne Duhr,
 Wo suust hei äw'r'e hoge Muur!
 Wo flüggt dei Hingst, wo flüggt dei Mähn!
 Wo flüggt hei äw'r 'e witte Plän! —
 Oll Daniel wringt²⁾ sien ollen Hän'n:
 „Herr Gott, Herr Gott, Du kannst dat wen'n! —
 Ich behd un behd, weit nich för wen, —
 En Müre is 't, doch as mien Sähn —
 Nu frigt hei 'n faat't, nu kümmt hei 'ran —
 Linksch nah dei Bäk³⁾ herun, Gehann!
 Doa nich! Doa nich! Bet wiere t'rügg!
 Doa höllt dat dünnne Jes noch nich! —
 Hei 's 'räwe, richtig 'räwe kamen.
 Nu nimm Dien letzten Kräft tausamen!
 Bet rechtsch! Bet nah dei Schonung 'ranne⁴⁾! —
 'Rin nah den Holt! — Nu is hei 'rin. — —
 Ach, leitwer Gott, un nu dei Anne!"'

1) Krüz = Kreuz, Krupe. 2) wringen = ringen. 3) dei Bäk, fem. = der Bäck. 4) 'ranne = heran.

Dat grieße Hoar tau Barg em stünn,
 Hei wringt un böhrt dei ollen Hän'n:
 „Herr Gott, Herr Gott! Wo fall dit en'n?
 Herr Gott, hei ward jo dat nich wagen!
 Dat Äuwe¹⁾ is jo vähl tau steil,
 Hei schütt sich af jo Gnick un Krägen,
 Behölt jo keinen Knaaken heil!
 Hei set't heran, hei wagt den Sprung —
 Dei Hingst dei böhmt, dei Hingst dei stiggt —
 Ein Unglück is för hüt genung!“ —
 Hei höllt dei Hän'n för dat Gesicht,
 Hei kann dat Unglück nich anseihn,
 Hei föllt taurügg up einen Stein
 Un sackt doa schwack in sich tauhoopen,
 Sien Glieder an tau båwern²⁾ füng'n,
 Un as dei Minschen rön'n un lopen,
 Un as dei Hingst in wille Sprüng'n
 Ahn Rüter em vöräwe suust,
 Is em so frank, em friert un gruuft:
 „Oh, Herr, oh, laat mi den Verstand!

1) Äuwe, eigentlich wie hier = Ufer, sonst aber auch für jede mäßige Bodenerhöhung, Hügel, gebraucht. 2) båwern = zittern.

Wi stahn jo all in Diene Hand,
 Wi stahn jo All in Dienen Rath;
 Doch so en Dod un so 'ne Dath! —
 Du weitst, oh Herr, hei was nich schlicht,
 Oh, gah mit em nich in 't Gericht,
 Straf nich tau hart, wat hei verbraken!
 „Iß was mal just, as hei, gesinnt“ —
 Un 't schürrt em dörch dei ollen Knaken —
 „Mit mi hahr 't just so warden künnt!“

9.

Dei Fluch.

Den Herrn sien Lief is 'rinne dragen
 Un up sien Bedd heruppe leggt,
 Un den Inspecter hahl'n bei Knecht
 Half schunnen¹⁾ 'rup un half terschlagen.
 „Gottlob! Hei lewt“, seggt Daniel,
 „Nu, Friedrich, nah den Dokter schnell!
 Ach Gott, ik möt nu nah Mariel!“ —

Dei Docter kümmt, besüht dei Lief
 Un schürrt den Kopp, mit iernst Gesicht
 Leggt still bei Hän'n hei in den Schoot:
 „„Hier is kein Hülp,““ seggt hei, „„dei's dod.““ —
 Dei Herren kamen von 't Gericht

1) schunnen = geschunden.

Un fragen 'rümme krüz un queer,
 Wo dat so kehm, wo 't wesen dehr;
 Un as sei 't gründlich unnesöcht¹⁾
 Un tau Papier of Allens bröcht,
 Dunn seggt dei Ein: „Hier 's nichts zu machen;
 Beschlag blos legen auf die Sachen.“
 Dit hebb'n sei richtig 'rute klügelt.
 Gehan'n sien Lahd, dei ward besiegelt
 Un unne Schlott un Riegel leggt.
 Oll Daniel führt mit an un seggt:
 „Ach Gott,“ seggt hei, „wat hei sich spoart
 Tau siene Reis' un Awefoahrt²),
 Un all dei Lust dei hei entsähr,
 Wenn hei den Schilling 'rinne lähr
 Un sich afknappen dehr en Bäten,
 Dat hett dei einzigst Dath nu fräten³).
 Ach, woll is 't truurig in dei Welt;
 Gott weit, if truur nich üm dat Geld.
 Nee, nee! Dei Angst! — Wat is hei morrn?
 Hüt is mien Sähn en Müre worrn,
 Un dei so truu mi was un leiv,

1) unnesöcht = untersucht. 2) Awefoahrt = Uebersahrt.

3) fräten = gefressen.

Is morru en Nöwer¹⁾ ore Deiv²⁾.
 Wohen bringt nich dei bitt're Noth!
 Gott gew, ik kunn Di doasför woahren!" —

Un as nu deiht dei Abend kamen,
 Dunn söcht sien Bäten hei tausamen,
 Wat hei sich dehr tausamen spoaren,
 Un Allens, wat hei man kann finnen,
 Dat halt hei 'rut, vewoahrt dat truu;
 En poar Pund Wull³⁾, en Bolten⁴⁾ Linnen,
 Dat bringt hei nah bei Möllefruu:
 „Gun Abend of, Fruu Rosenhagen,
 Ik hew en Bolten Lin'n noch sun'n. —
 Marieken het't tau fien mi spun'n⁵⁾;
 Dat is man Schad för mi tau dragen —
 Nu kam ik her un wull mal fragen,
 Ob Sei 't mi nich afköpen mügten." —
 „„Ach, Daniel, wat sünd 't för Geschichten!
 Gehann, so'n braven Minschen süs!
 Mi is 't, as wenn 't nich möglich is."!" —

1) Nöwer = Räuber. 2) Deiv = Dieb. 3) Wull = Wolle.
 4) Bolten = Bolzen, ist früher gewiß ein bestimmtes
 Maß für Leinwand gewesen; jetzt gebraucht man den
 Ausdruck für jedes größere Stück zusammengerollter Leinwand.
 5) spun'n = gesponnen.

„Wat helpt dat All, wat helpt dat Klagen!
 Wo is 't mit't Lin'n, Fruu Rosenhagen?
 „„Je so, dat Lin'n! — Un denn Mariel!
 Ach Gott, ikleep herümme glied;
 Verfier¹⁾) Di nich! sähr ik, hei wier 't,
 Hei dehr dei Dath! — Dat Gott erbarm!
 Sei feel verlang²⁾) mi in den Arm,
 So dägern³⁾) hahr s' sich doch vesiert.““ —
 „Ja, ja! För dei 's 't en Sammeleben.
 Wat will'n Sei för dat Lin'n denn geben?“ —
 „„Worüm denn äwer hüt of grad?““ —
 „Ik framt hüt up⁴⁾) in miene Lahd,
 Dunn feel 't mi in dei Hand herin,
 Dunn dacht ik, dat kunn möglich sin,
 Dat Sei den Bolten köpen woll'n.“ —
 „„Dat hahr doch äwer Tied bet morrn,““
 Un kicht em spiz in dat Gesicht.
 „Je, ik hew bi den Schauster Schull'n,
 Un dei is all so dringlich worrn,
 Un denn — un denn — un nahsten frigt . . .“ —

1) verfieren = erschrecken. 2) verlang^s, adv. = der Länge nach. 3) dägern, adv. = heftig, sehr. 4) upkramen = anfräumen.

„„Un will dei Lühd doch nich bedreigen¹⁾). —
 Na, Daniel, laat hei 't nu man sin,
 Weck war'n nich fahrig²⁾ mit dat Leigen.““
 Un geiht nah ehre Kame 'rin
 Un halt en lütten Kasten 'rut:
 „„Wat ik nich weit, maakt mi nich heit. —
 Ich, ja! Dat Lin'n führt wonah ut;
 Mien is 't, so as 't doa liggen deiht.““
 Un grippt nah ehren Kasten 'rin
 Un legt en Hümpele³⁾ Dahlers hen:
 „„Dit is dei Pries! so ward 't woll sin!““
 „„Oh nee, oh nee! Fruu Rosenhagen,
 Dit is binah jo so, as wenn . . . !““
 „„Ik of will miene Schuld afdragen!““
 Un as s' ehr Jüngsch'en ward gewoahr,
 Dunn strickt s' em glatt dat gehle Hoar,
 Un Thranen in ehr Dogen stün'n:

1) bedreigen = betrügen. 2) fahrig = fertig. 3) Hümpele Haufen. Dasselbe bedeutet auch „Hoop“. Beide werden jetzt ziemlich gleich gebraucht; obgleich vielleicht noch ein Unterschied fest zu stellen wäre; etwa so, daß „Hümpele“ mehr von ordnungslosen, nicht zusammenhängenden oder zusammengehörenden Dingen, „Hoop“ von absichtlich oder zufällig geordneten homogenen Dingen gebraucht wird.

„„Ach, dat mien seelig Mann dehr leben!
 Wat kann 'ne arme Wittwe geben?“
 Un grippt noch mal in 't Geld herin':
 „„Nu nehm hei't, Daniel. — So! — Nu gahr'e¹⁾!
 Dit leßt dat kümmt von sienem Vahre.“
 „Ik daucht, ik nehmt, Fruu Rosenhagen,
 Doch eine Bähd hew ik woll noch:
 Dei arme Diern! — Oh, dauhn Sei 't doch!
 Un blieben S' bi ehr deese Nacht.
 Ik höll²⁾ bi ehr woll sülben Wacht,
 Doch äwerst . . . äwerst . . .“ — „„Ja, ja!
 . . . T is gaut!
 Verlaat Hei sich doarup, ik dauh 't.“
 — — —

Du Daniel geiht. Dei Nacht tüht 'rup,
 Ganz liesing geiht dei Stalldöhr up.
 Dei Mahnschien liggt up 't witte Feld,
 Unschüllig rauht dei stille Welt,
 Dei Schnei, dei liggt so floar un rein,
 As wier mendag³⁾ kein Murb gescheihn;

1) gahr'e, eigentlich gah hei = gah er. Das „r“ ist hier des Hiatus wegen eingeschoben. Meines Wissens geschieht dies nur bei wenigen Imperativen; dort aber immer.
 2) höll = hielte. 3) mendag, auch allmendag adv., eigentlich = meine Tage, alle meine Tage, d. h. immer. Mit einer Verneinung wird es zu „nimmer“, wie z. B. hier.

As wier dei Jer 'ne Königslied,
 Von so 'n König, dei in'n Leben
 An Ihren wier un Dugend rieß;
 As wenn an'n düstern Winterheben
 Von unsfern Herrgott alle Stiern
 Ansticht tau ehr Begräfnis wier'n. —
 Oll Daniel is 't, dei 'rute schlicht;
 Un as hei deiht üm 't Beihuus¹⁾ bögen
 Un doa dei stille, heil'ge Nacht
 In 't ew'ge Dog herinne kift,
 Dunn was 't, as wenn em Stimmen frögen:
 „Hest Du Di 't of woll recht bedacht?
 Wat schlichtst Du heimlich dörch dei Nacht?
 Büst Du of woll up Gottes Wegen?“ —
 „„Mien Weg,““ seggt hei, „„geiht in den Herrn;
 Ik will kein zeitlich Unglück wen'n,
 Ik will en ewig Arwdeihl rexrn.
 Un wenn 'k up schlichten Wegen bün,
 Denn, Herr, denn steck mi hier mien En'n.““
 Un in em sacken alle Stiern
 Un waren tau 'ne grote Sünn:

1) Beihuus = Viehhaus; wird ausschließlich für den Rinderstall gebraucht.

„Mien arm Gehann! Mien arme Diern!“
 Wenn üm em rund dei Nacht of lag,
 In em is 't floar, is 't hellig Dag;
 Is 't of en truurigen Besäuf,
 Un maakt hei em dat Hart of frank,
 Frisch geiht hei sienem Weg entlang:
 „Dei schwarte See, dei holle Eif,
 Doa is dat Flach¹⁾, doa finn 'k Gehannen!“
 So geiht hei 'rinne in dei Dannen.

In 't düst're Dannenhoar, doa liggt
 Dei witte Schnei so wiß un schwer,
 Un mit sien ungewisses Licht
 Leggt sich dei Mahnschien d'räwe her;
 Un dörch dei schwarten Büsche schlicht
 So'n Flämmern un so'n Schämmern sich,
 As wenn wat üm dei Stämmen kicht,
 Bald huscht dat vör, bald huscht 't taurügg,
 Bald danzt dat up den Mahnschienstrahl,
 Bald duukt²⁾ sich unnu're Schatten dal
 Un krawelt ließ dörch Schnei un Musch

1) Flach = Fleck, Stelle. 2) duukten = tanzen, kauern, bücken.

Un rüßelt dörch den kahlen Busch,
 Un allerhand Unwesen späufen
 In Ellerwriet¹⁾ un knorrnig²⁾ Eiken.
 So heimlich All'ns! Blot ut dei Fiern
 Kann Ein den Schuhut raupen³⁾ hür'n,
 Dat schallt so schuuring dörch dei Nacht;
 Oll Daniel böhrt dei ollen Bein;
 Em is 't, as wenn wat üm em lacht,
 As wenn noch Ein
 Em folgen deiht
 Un in sien eigen Tritten geiht.
 Un wenn dei Schnei un Blähre ruscheln,
 Denn hürt hei 't tuscheln,
 As wenn 'ne Stimm em heimlich reep:
 „Dat Waater, wo dei Her versöp⁴⁾),
 Dat ladet noch Männigein tau Gast;
 Dei holle Eif hett männ'gen Knast⁵⁾),
 Doa kann noch männig Müre hängen!“

1) Ellerwriet. Eller = Else. „Wriet und verb. wrieten“ wird von jedem sich horstig ausbreitenden Gewächse gebraucht. 2) knorrnig von Knorrrn = Knoten im Holze. 3) raupep = rufen. 4) versöp = versoff, ertrank. 5) Knast ist fast gleichbedeutend mit Knorrrn, wenigstens häufig; es bedeutet aber auch einen vorstehenden trocknen Ast.

Wo deiht dei gruuglich Angst em drängen!

Wo jögt em dat dörch Holt un Nacht!

As jög em nah dei wille Jagd,

So drift't em furt,

Hen nah den Urt.

Doa steiht hei still, vöräwe högt,

Un horft un luurt,

Ob sich wat rögt?

Kickt nah dei Telgen¹⁾ in dei Höh,

Kickt 'runne up den witten See;

Dat Hart steiht still, dei Athen schwiggt. —

Dunn is 't, as wenn sich wat bewegt,

As wenn doa wat in Schatten liggt;

Hei schlicht sich 'ran.

Ta, 't is Jehann! —

Wo dei wille Bier²⁾ den Hauer wet'

Wo dei Wulf sien einsam Lager hett,

Wo dat Undiert liggt un luurt up Roof³⁾,

Doa liggt hei in dat welke Loof⁴⁾

Un as hei von dei Ter sich richt,

1) Telgen = Alt. 2) Bier = Eber. 3) Roof = Raub.

4) Loof = Laub.

Un em dei Mahn schient in 't Gesicht,
 Dunn führt den Oll'n en Wesen an,
 Is as Gehann, un nich Gehann,
 As wenn ein Minsch up dese Fer
 All dörch mit all sien Hoffen wier,
 Mit Lust, mit Leiw, mit Kraft, mit Allen,
 As wier en Gotteshuus verfallen.
 Un fött den Oll'n sien Hän'n taugliek
 Un flüstert heisch: „Mariel? Mariel?“ —
 Oll Daniel fickt em harmend an:
 „„Noch lewt s', noch behd s' för Di, Gehann.“
 Hei föllt taurügg so blaß un bleik
 Un lehnt sich an dei holle Eif,
 Bedeckt mit siene Hand dat Dog,
 Un as hei s' werre 'runne tog,
 Dunn stün'n dei groten Thranen d'rin,
 Dei iersten, dei hei weinen kunn:
 „Oh segg ehr, sei süll kamen, kamen!
 If nehm sei mit; wi gahn tausamen;
 If bring uns dörch in t' anne Land.“
 Un fött den Oll'n sien Knei un weint;
 Dei Oll, dei schüvt¹⁾ taurügg sien Hand:

1) schüvt = schiebt.

„„Nee, nee, Jehann, so is 't nich meint.
 Wat twischen Di un dese Ter
 Mal fast un leislich spinnen wier,
 Den Faden hett Dien Dath ferreten.
 Un hett dei Diern Ti nich vergeten,
 Un behd s' för Di mit trauen Sinn,
 Denn soll Di dat en Zeiken¹⁾ sin,
 Dat Gott Di för dei anne Welt
 Noch an en losen Faden höllt.
 Riet nich intwei! Riet nich intwei!
 Un ward Dien Leben langes Weih,
 Un möst Du Noth un Elend dragen,
 Un hürst Du dörch dei Frühjoahrsspracht,
 Un hürst Du dörch dei Sommernacht
 Alläwerall 't Gewissen schlagen,
 Denn denk doaran,
 Mien Sähn, Jehann,
 Eins ward dat Elend von Di nahmen:
 Wenn Du up 't letzte Lager liggst
 Un up den Herrn Dien Hoffen richst,
 Denn soll Marieken tau Di kamen.““ —

1) Zeiken = Zeichen.

Gehann liggt still, oll Daniel schüvt¹⁾
 Em sacht en Päckschén in den Rock
 Un drückt em in dei Hand en Stock:
 „„Un wenn Di 't of in 't Elend drift,
 Ahn Stütt fallst nich up Diene Bahn,
 Ahn Hülp fallst nich in Sün'n²⁾ vergahn:
 Dit Geld schickt Di dei Möllefruu,
 Un desen Stock — hei was mi truu —
 Den nimm, mien Sähn, den gew if Di;
 Un büst Du mal von Elend mäud,
 Denn stütt Di d'rup un denk an mi
 Un an Mariel un an ehr Leid.““
 „Nee!“ schrigt Gehann, springt up dei Fäut³⁾;
 „Wat? If fall gahn, Mariel fall bliaben?
 Mi willst allein in 't Elend drieben?“ —
 „„If briew Di nich, Di drift Dien Dath;
 Du hest sei sei't⁴⁾ dei böse Saat.““ —
 „If hew nich sei't, if hew blot meiht,
 Wat Anne vör mi hebbən sei't.
 Dei so'n Geseße mal eins maakt,

1) schüvt, von schuben = schiebt. 2) Sün'n = Sünde.

3) Fäut, von Faut = Füße. 4) sei't, von seien = sien.

Dei hebbenn't sei't un unnehaakt¹⁾ ,
 Dei raff'ge²⁾ Giez, dei hett dat egt,
 Dei Lust nah Willkür hett dat plegt.
 Dei Saat, dei quüll, 'rut kam dei Kien³⁾ ,
 Dei Hochmuth was dei Sünnenschien,
 Dei frame Läg hett Thranen regent,
 Un Satan hett dat Feld insegent;
 Ik hewt nu aust⁴⁾ ! — Nu stahn S' un schrien
 Un reden vähl von Schuld un Murd:
 „Maak furt! Maak furt!“ —
 Ja, ja! — Ik weit woll wat ik bün;
 Doch wenn hei werre vör mi stünn⁵⁾ —
 Den'n mein ik mit dat bleik Gesicht —
 So niederträchtig un so schlicht
 Un frisch un rod,
 Ik störr⁶⁾ den Hund noch einmal dod!
 Un hüng an'n Galgen all dei Strick,
 Hei ore ik! Hei ore ik!
 Hei hett mien Leben
 Bergist,
 Vergeben!

1) unnehaaken = unterpflügen. 2) raffig = habbüchsig. 3) Kien = Keim. 4) austen = erndten. 5) stünn = stände.
 6) störr, von stöten = stieße.

Hei hett mit Grull mien Hart vergällt;
 Hei drift
 Elendig 'rin mi in dei Welt!
 Hei hett mien Mäten
 Von 't Hart mi räten¹⁾ ,
 Hei un sien Ban'n!
 Fluch äwe All'ns, wat stolz un rief!
 Fluch äwe mienem Bahrelan'n! —
 Mariek! Mariek!" —

So stört' hei furt dörch Nacht un Schnei,
 Dei Sinn verwurrn, dat Hart intwei²⁾ ,
 So stört' hei suet, den Barg³⁾ tau Höcht,
 Doa steiht hei still un dreicht sich üm
 Un röpt mit schuurig wille Stimm:
 „Fluch! Fluch! So was 't! So hew ik seggt.
 Fluch äwe Zug! dei uns verjagen.
 Si hebb'n dei Hän'n, dei Zug eins fött⁴⁾ ,
 Si hebb'n dei Bein, dei Zug eins dragen,
 Mal ahn Erbarmen von Zug fött⁵⁾ : —

1) räten, von rieten = gerissen. 2) intwei = entzwei, gebrochen. 3) Barg = Berg. In den norddeutschen Ebenen wird dieser Ausdruck schon für einen mäßigen Hügel gebraucht. 4) fött, von föuden = füttern, ernähren. 5) fött = gestoßen.

„Laat s' gahn, laat s' gahn, laat 't Pack doch
gahn!“ —

Si hewt kein Hart uns tau verstahn;
As Minschen staht Si nich taum Minschen.
Dei Tied ward kamen, hüt ore merrn,
Wo S' up dei Knei taurügg uns wünschen.
Mit uns sünd Si mal Herrn eins worrn,
Ahn uns sünd S' nicks!“ — Un büct sich nerre,
Grippt in den Schnei un balst en Ball,
Un pralst em up den froren Born¹⁾ —
„Kümmt Frieheit mal un Frühjoahr werre,
Denn sält Si All
Bergahn, as dese Schnei vergeiht!“
Un höher richt't hei sich un steiht
So düster doa in witten Schnei:
„Up Jugen Kopp dat Ach un Weih
Un up Jug Hart dei heiten Thranen
Von all dei Lühd, dei hier nich wahnen,
Dei hier nich glücklich kunnen leben,
Dei ut dat Vahreland Si dräben²⁾!
Fluch äwe Jug un äwe Juge Kinne!“ —

1) Born = Boden. 2) dräben = getrieben.

Un röppt dat mit gewalt'ge Stimm
 Un schwenkt den Stock so wild herüm
 Un stört' sich in dei Dannen 'rinne.
 Dat was sien letztes Lebewoll. — —

Un an dei Eif lehnt schwack dei Oll
 Un höllt dei Hand sich vör dat Dog,
 Un as den Blick tau Höcht hei schlog,
 Dunn was hei furt,
 Un spraken was dat gruuglich Wurt.
 Un 't bruust em dörch dei ollen Uhren,
 As Stormwindslied
 Bi Winterstied:
 „Verluren! verluren! Jehann verluren!“
 Drup wankt hei furt; kein Späuken jögt¹⁾
 Em dörch dei Nacht mihr, dörch dei Dannen.
 Wat Späuken hier! Hei süht Jehannen. —
 „Dat was sien Herr, hei was sien Knecht.
 Oh Herr! Oh Herr! Wer hett nu Recht?
 Dien Satzung kann dei Minsch verstahn,
 Doch wat dei Minschen doatau dahm,
 Verstah, wer kann!“ —

1) jögt = jügt.

Un lehnt sich an 'ne Wied heran
 Un ficht herup tau'n Stiernenheben¹⁾:
 „Herr Gott, Du weit'st allein Bescheid!
 Doa stahn s' un gahn s' in Ewigkeit,
 Wat 's gegen dei ein Minschenleben?
 Doa stahn s' un gahn s' in ehre Pracht,
 Dag ore Nacht;
 Du leggst Dien Hand mit Segen drup,
 Un Stiern un Mahn un Sünn geiht up;
 Dien Segen deiht dei Welt regieren,
 Wat kann ein Minschenfluch bedühren²⁾?

1) Stiernenheben = Sternenhimmel. 2) bedühren = bedeuten.

10.

Dei Bertwievlung.

Heil Christdag¹⁾ Abend. — Oh, wo säut
 Sitt All'ns tausam in Leislichkeit!
 Dei Mutte hett dat Kind in Arm
 Un fickt dat leiw un seelig an
 Un drückt dat an sich fast un warm;
 Dei Bahre röpt den Jungen 'ran
 Un will den Schlüngel spälen liehren,
 Wo hei dat Hottepierd²⁾ möt rieren,
 Wo hei den Tägel³⁾ saaten möt,
 Un wo hei möt dei Pietsch regieren.
 Sien Weisheit äwe kümmt tau späd;
 Dei Schlüngel weit all gaut Bescheid,

¹⁾ Heil Christdag = Weihnachtstag. ²⁾ Hottepierd = Hott-pferdchen, Steckenpferd. ³⁾ Tägel = Zügel.

Hei maakt dat so, as Jochen deiht,
 Un set't sich up un fött den Toom
 Un jögt herüm un maakt sich krähnsch¹⁾),
 Jögt üm binah den Dannenboom —
 Dei Schimmel is so werredähnsch²⁾). — —

Un dörch dei Ollen ehr Wesen klingt
 'Ne wunderschöne Melodei,
 Dei dörch bei däglich Noth un Mäuh
 Süs Dags³⁾) nich bet taum Harten dringt.
 Un in ehr Hart, doa wirkt un wewt
 Dei Leiw en sinnig Bild tausamen;
 Wat lang all dod, wat frisch noch lewt,
 Dei ollen Öllern⁴⁾ un dei Kinne,
 Dei fött sei in den riecken Nahmen
 Un wewt in ehr Gewew herinne
 Mit goldnen Faden Glück un Segen.
 Wo schütt ehr Spaul⁵⁾ so lustig 'räwe!
 Wo schleicht sei fast bei Lahd doagegen!
 Dei Leiw, dat is en dägten⁶⁾ Wewe! —

1) „krähnsch“ wird von der stolzen Halsbiegung eines Pferdes gebraucht. 2) werredähnsch, eigentlich = widerdänisch, d. h. widerspenstig. 3) süs Dags, eigentlich = sonst Tagess, d. h. für gewöhnlich. 4) Öllern = Eltern. 5) Spaul = Spule, hier das Weberschiffchen. 6) dägten = tüchtig.

Un glücklich sitten beide Ollen —
 Dei Wewe is ehr woll bekannt —
 Un drücken truulich sich bei Hand:
 „Dat fall woll hollen!“ —

Un buten wirkt en annern Wewe,
 Schütt of sien Spaul recht lustig 'räwe;
 Hoch up den Barg, doa steiht sien Stauhl;
 Hei leggt sich 'rup mit ganzen Liew,
 Wo knirrt un knarrt dat oll Gedriew¹⁾!
 Wo klappt dei Lahd, wo suus't dei Spaul!
 Dei Stormwind wewt sien Winterwand²⁾ —
 Sien Uptog Nacht, sien Inschlag Schnei —
 Un singt doatau 'ne Melodei,
 Dei bruuft so schuurig dörch dat Land,
 As wieren 'rut dei bösen Geister;
 Is of en dägten Bewemeister! — —

In ehre Kamer sitt Mariek —
 Wat is dat för en Weere buten!
 Dei Storm segt äwer'n Mählendiek
 Un schmitt den Schnei in wille Weihn

1) Gedriew = Getriebe. 2) Wand = Tuch, Gewand; daher Wandschneider = Tuchhändler.

So scharp un schniedig an dei Ruten —
 Sei sitt bi ehre Lamp allein,
 Bald sitt sei still, bald rögt s' bei Knütt¹⁾ —
 Dei Uhl, dei kriescht: „Kumm mit! Kumm
 mit!“ —

Un schuddernd gütt²⁾ ehr dal den Nacken;
 Sei foahrt tau Höcht, sei schurrt tausam:
 „Ja bald, ja bald! — If kam, if kam.“
 Dat Dog dat gläuh't, un up dei Backen,
 Doa liggt 'ne Farw, dei brennt un lücht,
 As wenn en bitterbösen Schimp
 Dat Blaut ehr jög³⁾ in dat Gesicht.
 Bald schlütt s' dat Dog, as wull sei rauhn,
 Bald knüt't s' ehr Strümp, — so'n lütte Strümp! —
 So wirr un hastig is ehr Dauhn,
 As wieren ehr Gedanken wiet
 An annern Urt, in anner Tied,
 As wenn s' sich ierst besinnen müßt. —
 Ja — Wiehnacht=Heiligabend is 't.
 Ja — 't is all lang' — all lang is 't her,
 Dunn freeg s' mal wat tum heil'gen Christ;

1) Knütt = Strickzeug. — Knünnen = stricken. 2) gütt't = gießt's. 3) jög = jagte.

Ehr Vahre bröcht ehr Stuten¹⁾) mit —
 Hei was dunn gaut noch in bei Wehr²⁾) —
 Un wat ehr Päding³⁾) was, bei Schmidt,
 Dei hahr ehr mal vier Schilling geben.
 Dunn dehr ehr Mutting of noch leben,
 Dei bünzelt⁴⁾) ehr denn Poppen t'recht —
 Kein ornlich — nee! — man blot von Plün'n⁵⁾),
 Von Allens, wat sei just künн fin'n —
 Sei hahr'n of eig'ntlich kein Gesicht,
 Un of dei Bein, dei dehren fehlen;
 Sei künн doa äwerst schön mit speelen,
 Sei hahr ehr Schört un Däufe neigt⁶⁾),
 Un hahr sei führt up Vahrers Kahr⁷⁾),
 Un in den Backtrog hahr sei s' weigt. —
 Ach, wenn s' allwiel 'ne Weig doch hahr! —
 Ach, wo verlaaten sitt sei doa!
 Ehr Mutting dod so männig Joah,

1) Stuten = Seimel. 2) „gaut in de Wehr“ ist eine Redensart für „in guten Unständen“. 3) Päding dimin. von Päd = Pathe. 4) „bünzeln,“ mit Bündel zusammenhängend, heißt aus Zeng, Lappen, Bändern etwas zusammenwickeln und knoten. 5) Plün'n = Lumpen, Flicken, Lappen. 6) „neiht“ und „neigt“ = genähet. 7) Kahr = Karre.

Ehr Bahre dob — oh, un Jehann! —
 Dat wille Feewe pacft sei an
 Un jögt dei Ahren up un nerre
 As gläugnig Füer; un denn is 't werre,
 As wenn 'ne folle Dodenhand
 Von binnen löscht den willen Brand
 Un 'rüm an ehren Harten ritt. —
 Dei Stormwind brius't. — „Kumm mit, kumm
 mit!“

Kriescht heisch¹⁾ dei Uhl. „„If kam, if kam!
 Mien Jammer hett denn mal en En'n.““
 Un sackt taurügg un sackt tausam
 Un fött den Kopp in beide Hän'n
 Un drückt, as müht s' mit duusend Kähden²⁾
 Tausam sich dei Gedanken schmäden³⁾). — —

Nu horft sei up. — Hett sich wat rögt? —
 Sei geiht an 't Bedd; vöräwe bögt
 Süht s' in dei ollen Küssen 'rin;
 Un 't is, as wenn en warme Strahl
 Von Gottes Leiw un Gottes Sünn

1) heisch = heiser. 2) Kähden = Ketten. 3) schmäden = schmieden. 4) rögt = gerührt.

Hell schient in 't düst're Hart hendal.
Dei Nacht möt wieken vör dat Licht,
Un all 't unheimlich Schummern¹⁾ flüggt;
Ehr Welt liggt vör ehr Kloar un warm
Un jung, as 't Kind in ehren Arm;
Dei Thranendau, dei kühlt dat Dog,
In'n Harten Nachtigall ehr schlog,
Un üm den fründlich hellen Mund,
Doa bläuhn vähl duusend Blaumen bunt,
Un ob dat buten weiht un schnie't,
In ehr is säute Frühjoahrstied.
Laat 't schnien, laat störm'en, laat bruusen den

Sei un ehr Kind! — Sei un ehr Kind! —
Un as s' dat Jüngschen vör sich hewt,
Dunn lacht ehr Hart för Freuden luut:
Dat is ehr Welt, in dei sei lewt,
Wo führt ehr Welt so leislich ut! —
Dei Leiw, dei wirkt, dei Leiw, dei wewt
Dörch 't Hart den Hoffnungsfaden ehr,
Von 'n Himmel hoch, doa kümmt sei her

1) Schummeru = Dämmern, Dämmerung.

Un bringt of ehr den heil'gen Christ¹⁾ ,
Un Wiehnacht = Heiligabend is 't. — —

Un as sei noch so seelig seet,
Ehr leiwes, lüttes Kind in Arm,
Un all ehr bitt're Noth vergeet,
Dunn ward doa buten so'n Larm,
Doa rummelt nah dei Dähl wat 'rup.
Un as bei Stubendöhr geiht up,
Dunn is 't oll Toppelsch mit 'ne Weig:
„Süh so, Mariek, nu kümmt in Reig"²⁾ ,
Doa legg den Prinzen man herin." —
„„Oh, Nahwersch, wenn ik doch eins künn
Iug all Iug Gauheit mal vergellen!"" —
„„Oh," fängt dei Olsch nu an tau schellen,
Klappt von bei Tüffeln³⁾ sich den Schnei
Un schürrt em af von ehren Dauf,
„„Oh, Mäten, segg, büst denn nich Dauf?
Meinst Du, dat Unsereins en Weih?
Dat ik dat ruhig mit anseih,

1) Die Bezeichnung „heilig Christ“ wird auch für „Wiehnachtsgeschenk“ gebraucht. 2) Reig' = Reihe. 3) Tüffeln = Pantoffel.

Wo dat Du hier in Weihdag,¹⁾ sittst
 Un mit dat Worm hier Elend littst.²⁾?
 Nee! — Sülwst mien Oll, dei nich vähl seggt,
 Seggt hüt tau mi: „Wo dücht Di dat?
 Keem wi woll nich ahn Weig taurecht?
 Du hest jo äwe Joahr Kein hatt,
 Un Jöching, dei 's jo nu all gatlich³⁾,
 För den'n findet of en Flach⁴⁾ sich noch,
 Den'n legg wi in den Bacteltrog,
 Doa liggt dei Schlüngel jo ganz staatlich.
 Bring ehr dei Weig doch 'rümme," sähr 'e,
 „Un nimm ehr of en Küssen mit;
 Sei hett am En'n noch nich so'n lütt."
 Un ornlich schellen warden dehr 'e,
 As ik nich gliedsten vör em leep.
 Herr Je, Mariek, wat is 't för Weere!
 Un wo bei Uhl so gruuglich reep!
 Ik hew so dägern mi verfiert⁵⁾,
 Wenn dat man blot nich Unglück bruut." —
 „Ach, Nahwersch, ja! — Ik hew 't woll hürt;

1) Weihdag', eigentlich = Wehtage, d. h. Schmerzen. 2) littst = leidest. 3) gatlich = ziemlich, handlich. 4) Flach = Fleck, Stelle. 5) verfieren = erschrecken.

Wi hett allein hier ornlich gruut." —
 „Un denn is 't bi Di of so kolt,
 Doa kann dat Lütt Di jo verklamen¹).“ —
 „„Ach Gott, ik glöw, doa is kein Holt.
 Na, täuw S', ik will . . .“ — „Du darwst
 nich 'rut!

Ik sinn so vähl woll noch tausamen. —
 Herr Je, wo Di dei Backen brennen! —
 Nee! — So'ne Uemstän'n möt ik kennen;
 Ik bünne 'ne Fruu, ik möt dat weiten.
 Süh, Du geföllst mi goa nich recht,
 Hahrst Di man in dat Bedd 'rin leggt. —
 Na, täuw, ik will Di Füer bäuten²).“ —
 „„Süs dehr mi Daniel dat besorgen,
 Hüüt hett hei woll kein Tied nich hatt.“ —
 „Ja, Mien, dei sähr, hei wier hüt Morgen
 Bör Dau un Dag all in dei Stadt
 Herinne schickt nah Wiehnachts-Saaken. —
 Na, täuw, ik will Di Füer maaken.“ —
 Un 'rute löppt s' un hött doa Füer,
 Un as dat schön in 't Brennen wier,

1) verklamen = erstarren. 2) bäuten = heizen.

Dunn hahlt s' dei Küssen, maakt sei warm
 Un nimmt Mariek dat Kind von'n Arm
 Un leggt dat in dei Weig: „Süh söking¹)!
 Wo liggt hei nüdlich doa, Herr Jefing!
 Un wo hei kiekt! — Je, kiek Du man!
 Un wo dei Hand all grippt, ach Götting!
 Nee, kiek doch blot mal an dat Lütting!
 Hei fött sich an dei Weig all an.“
 Woll kiekt Mariek em an un seggt:
 „„Ach, dat Sei mi dei Weig hett bröcht....!““—
 „Ih, red doch doavon nich mihr, Diern!
 Ik hew s' Di bröcht un dehr dat giern.
 Un dat 's 'ne Weig, Du kannst mi glöben,
 So'n deiht 't in 't ganze Dörp nich geben:
 Kiek nipp mal tau — von Beerboomholt²).
 Nu is sei frielich schlicht un olt,
 Doch as sei nieg³) noch was, mit rode Bein
 Un hellblag Lief, dunn füllst Du s' seihn!
 Dat was en staatsches Arwstück³) dunn.
 Na, Toppel leet s' nahst gries anstrieken,
 Un dei oll Farw is of all 'run,

1) söking, dimin. von so. 2) Beerboom = Birnbaum. 3) nieg = neu. 4) Arwstück = Erbstück.

Nu deihst s' sich frielich nich miehr glieken.
Ik hew s' noch von mien Ollern¹⁾ kregen.
Ja, Diern, doa hew ik sulwst in legen,
Un denn bi mi nahst all mien Nägen²⁾). —
Nee, kief, Mariel, hei maakt all Öging³⁾)! —
„Ach, Nawersch⁴⁾), ja! — Wenn blot Ehr
Jöching,
Wenn dei man blot nich Schaden nimmt.”“ —
„Dei? — Nee! — Ich wo! — Dei Schlüngel
kümmert
Bald in sien sößteihst⁵⁾ Mahnd⁶⁾ herin;
Un wenn dei Dart ierst so deihst sin,
Dat s' dörch sünd mit dei iersten Tähnen,
Un dat s' en Bäten loopen können,
Denn möten s' 'rute ut dat Nest;
So is dat bi mi ümme west.
Dei Annern hebb'n so lang' nich legen,
Un hew s' bet jetzt doch grot all kregen. —
Mäuh maakt dat ierst; ja, wähle Mäuh!
Vör Allen bi dei iersten drei,

1) Öllern = Eltern. 2) Nägen = Neune. 3) Ögings machen = Auglein machen, äugeln. 4) Nahwersch = Nachbarin. 5) sößteihst = sechszehnte. 6) Mahnd = Monat.

Un wenn sei fir up 't Anner kamen;
 Doch is en Hümpel¹⁾ ierst tausamen,
 Denn deiht sich dat all beter fäuden²⁾),
 Denn kann dei Ein dat Anner häuden³⁾),
 Un dauhn sei ierst man hartlich sin,
 Denn hett en of Plesir doaran:
 Mien Öllst⁴⁾ tum Bispill, mien Gehann,
 Dei hött nu all dei Faselschwien⁵⁾);
 Un kief, Marief, wo lang' ward 't woahren?
 Denn nimmt sien Herr em bi dei Pier,
 Denn dei Verstand kümmt mit dei Joahren.
 Un wenn ik so as Du nu wier,
 Denn weit 'k nich, ob 'k mi grämen kunn,
 Dat 'k mit so'n lüttes Wörmken seet.
 Nu mag Di dat schanirlich sin —
 Un 't drückt Di jo noch anner Leed —
 Doch paß mal up, hest Du 't ierst groot
 Un is 't en dägten Kierl ierst worrn,
 Un deiht hei gaut Di hüt un morrn,

1) Hümpel = Haufen. 2) fäuden = füttern, und daher auch = aufziehen. 3) häuden = hüten. 4) Öllst = Ältester.

5) Faselschwien, werden Schweine genannt, welche dem Alter nach zwischen Ferkel und Mastschweinen stehen.

Denn littst up 't Ölle of kein Noth." —
 „„Oh nich! Oh, laat S' doch sin . . . !“ —
 „Wes still! —

If red jo doch man so. Dat süll
 Di jo nich in dei Finstern schlahn. —
 Ach Gott, if red un if süll gahn!
 Mien Diern, mien Fief, soll Tüften¹⁾ braden,
 If hew sei bi dei Pann henstellt,
 Dei hett s' gewiß verbrennen laaten.
 Nee, nicks as Arger up dei Welt!
 Un denn bei zackermentschen Jöhren!
 Wenn s' denn man blot uppassen dehren!
 Dat mägen schöne Tüften sin!
 Gun Nacht, lütt Jüngschén, na, gun Nachting!
 Nu ligg of still un schlaf of sachting! —
 Un Du, Mariek, Du blifst mi in
 Un geiht nich 'rut! Un nu gun Nacht! —
 Un dei oll Pann is all so dünn,
 Dat mägen schöne Tüften sin!" — —

Sei geiht. — Marieken rückt sich sacht
 Ran an bei Weig un nimmt bei Knütt

1) Tüften = Kartoffeln.

Un bögt sich fründlich äwer 't Lütt¹⁾)
 Un flüstert säute Leiweswüürd —
 Wer hett s' ehr liehrt²⁾? —
 Un weigt ehr Kind tum iersten Mal. —
 Dei Weig, dei rögt sich up un dal,
 As wenn in stille Heimlichkeit
 'Ne Stubenklock in Freden geiht
 Un mit den ollen trauen Schlag
 Inweigt dei Unrauh un dat Weih,
 Wat schwer uns up den Harten lag. —
 Sei singt 'ne olle Melodei —
 Wo hett sei s' hürt? —
 Ein wunnersäutes Singen wier 't,
 So weik, so warm, so voll von Rauh;
 Den Tert, den maakt ehr Hart doatau:

Mien säutes Leben,
 — Du büsst mi geben,
 Du büsst mien Hoffen,
 Du büsst mi bleben!
 Un hett mi Noth un Elend troffen,
 Di holl ic s' fiern.
 Wo giern! Wo giern!

1) Ein Säugling wird vorzugsweise „dat Lütt“ genannt.
 2) liehrt = gelehrt.

Du fallst nich ken'n —
 Ich will't woll wen'n¹⁾ —
 Wat uns bedrapen;
 Mit miene Hän'n
 Riet ic dei wieder Welt Di apen²⁾.
 Sallst glücklich sien,
 Frie unne Frie'n!

Hei hett nich schreben,
 Wo hei is bleben —
 Is hei all storben? —
 Dien Bahre, dreb'en
 Ut 't Bahreland. — Is hei verdorben?
 Un füll hei 't sien,
 Hei blist doch mien.

Hei was kein Müre³⁾,
 En Kierl blot wier'e
 Dien brave Bahre!
 Kraft in dei Gliere,
 Un hellen Mauth in jede Ahre,
 Un leiw un truu!
 So ward ok Du!

Un büft Du 't worrn
 Hüt ore morren,
 Denn treck⁴⁾ w' em nah;
 Up frieen Born⁵⁾

1) wen'n = wenden. 2) apen = offen. 3) Müre = Mörder. 4) trecken = ziehen. 5) Born = Boden.

Säuk¹⁾ w' em denn in Amerika.
 Doa puȝt sich eben
 So gräun dei Jer,
 Doa lacht dei Heben
 So blaag as hier,
 Doa riept dei Seegen,
 Doa bläuh't dei Boom,
 Doa föllt dei Regen,
 Doa bruus't dei Strohm,
 Doa lüchten Sünnen,
 Un Wolken teihn,
 Doa ward verschwinnen,
 Wat lang' gescheihn;
 Dei Nebel wieken
 För Morgenwind,
 Vör sien Marieken
 Un vör sien Kind.
 En niees Leiben, en niees Leben! —
 Doa ward uns denn ok Hübung geben.

Un as s' noch in 'n Gedanken sitt
 Un liesing singt dei Melodei,
 Dunn kümmt heran en schweren Tritt,
 Ein trampst²⁾ sich buten af den Schnei
 Un grawwelt³⁾ an dei Klink herümme;

1) säuken = suchen. In der ersten und zweiten Person Plur. wird, wenn das Pronomen nachgestellt wird, meistens die abgekürzte Form z. B. „treck w', säuk w', statt „trecken wi, säuken wi“ gebraucht. 2) trampsen = trampeln, stampfen. 3) grawweln ist das iterativum von greifen.

Staathöller¹⁾) Brümme kümmt herin:
 „Gün Abend, Diern!“ — „„Gün Abend,
 Brümme!“

Un foahrt tau Höcht: wat süss dat sin? —
 Wat süss hei will'n? — Ehr Hart, dat schleicht:
 Wenn 't man nicks Schlimmes wesen deih! —
 „Mariek, weit Gott, ik dauh 't nich giern! —
 Nimm Di dat nich tau Harten, Diern!“ —
 Sei fött em an: „„Wat noch? Wat werre?““ —
 „Marieken, still! — kumm, sett Di nerre!
 Gott weit, dat ik nich anners kann;
 Sei reep mi sülwst an 't Finster 'ran
 Un hett mi 't üp dei Seel befahlen,
 Ik süss noch hüt nah Di hendalen
 Un süss Di segg'n: Dat wier nu ut,
 Hier ut bei Hüsing müht Du 'rut,
 Du süssst nah 't Nebengaut tau Haw²⁾).“ —
 Sei lett em los un set't sich dal:
 „„Dat is dat? — So? — Ach, 't is egal,
 Ob 'k hier, ob 'k doa herümme slaw³⁾).““

1) Staathöller = Statthalter; wie die Vögte genannt werden. 2) tau Haw = zu Hofe, d. h. um dort Hofdienste zu verrichten. 3) slawen = Sclaven-Arbeit verrichten, für jede schwere, zumal wiederkehrende Arbeit gebraucht.

Un folgt dei Hän'n in ehren Schoot:
„Dat is dat? — So? — Dei Wahnung blot?“
Un führt sich in ehr Kamer üm
Un seggt mit truuring sachte Stimm:
„Un 't is doch schwer, dat ik soll furt.
Hier hew ik lewt sied mien Geburt,
Hier hew ik spält¹⁾ in jungen Dagen,
Hier hew ik Noth un Elend dragen,
Hier sünd mien beiden Öllern storben,
Hier is mien ganzes Glück verdorben. —
Dat 's nu vörbi. — Wo tau noch klagen?
Ik möt un soll un ward of gahn.“
„Dat 's recht, Mariel! Man nich verzagen!
Du möst dat ut den Sinn Di schlahn. —
Dien Kind, dat soll denn utdahn²⁾ warden.“
„Wat seggt hei? Wat?“ — Sei flüggt tau
Höchst. —
„Mien Kind? Mien Kind? — Wat hett Hei
seggt?“
Dei Lipp, bei schwiggt; dei Oogen starren,
Sei steiht so schrecklich antauseihu,

1) spält = gespielt. 2) utdahn = ausgethan, d. h. bei Andern in Pflege gegeben.

As wier sei Yes, as wier sei Stein;
 Oll Brümme springt nah ehr heran:
 „Mariet! Mariet!“ un fött sei an.
 Sei ritt sich von em los un schmitt¹⁾)
 Sich äwe Weig un Kind un ritt²⁾)
 Dat Jüngschén ut dei Küssen 'rut:
 „„Utdahn! Utdahn! — Ja, daucht' man ut! —
 Utdahn! — Utdahn! — Ik weit Bescheid. —
 Utdahn, so as en 't Licht utdeiht!“³⁾ —
 Springt in dei bütelst³⁾) Eck taurügg
 Un drückt un drängt sich an dei Wand.
 Un höllt so fast ehr Kind an sich
 Un reckt so wild nah vör dei Hand:
 „„Furt! Furt! — Dit is mien Einzigst jezt,
 Dit is mien Leiwst, dit is mien Lezt;
 Dit Ein, dit hett mien Allens kost'.
 Hier! Riet't dat Hart mi ut dei Bost⁴⁾)!
 Mien Hart, mien Leben
 Will ik Zug geben,
 Dit Ein
 Allein

1) schmitt = schmeißt, wirft. 2) ritt = reist.
 3) bütelst = äußerste. 4) Bost = Brust.

Is mien, is mien!

Mien einzigst Deihl up dese Ter!"" —

Oll Brümme bidd't: „Marieken, hür! —

Kumm her, mien Kind, hür doch up mi! —

Sei ward't nich dauhn. — Nimm Di tausam! —

Sei meint 't woll nich so bös mit Di! —

„So bös? — Oh nee! — Sei is jo fram. —

Utdahn! — Dat 's hüt mien heilig Christ!

Un Wiehnacht-Heiligabend is 't ""

Un lacht so grell un redt so wild

Un het't so hastig un so hild¹⁾

Un weigt in Arm dat lütte Wesen.

Den ollen Mann ward gruun un gräsen²⁾

Em ward so bang; hei kann s' nich räuen³⁾,

Hei möt sich Hülp bi Nahwers säuken;

Hei stört' herut. — Sei steiht un luurt:

„Ja, Jünging, ja! Nu sünd sei furt!"" —

Sei kift so wild un schlicht hervör

Un horkt so ängstlich an dei Döhr:

Dei Stormwind buten bruust mit Macht,

1) hild = geschäftig. 2) gräsen, von gras, ist noch stärker, als grauen. 3) räuen = pfleg n., regieren, Handreichung thun.

Dei Uhl röpt schuurig dörch dei Nacht:
 „Kumm mit! Kumm mit! Kumm mit, mi
 gruut!“ —

„„Un wenn Di gruut, mi gruut hier of!““
 Un schleicht üm 't Kind den dünnen Dauf
 Un stört' in Schnei un Nacht herut.
 „Kumm mit! Kumm mit!“ — „„If kam,
 if kam!“ —

Nah ehr, nah ehr! Sei is jo fram;
 Bi ehr is hüt of heilig Christ,
 Un Wiehnacht=Heiligabend is 't.““ — —

Dat huscht dei Goahrenmuur entlang,
 Versteckt sich achter'n Boom so bang,
 Dat steiht un kückt un bögt sich vör,
 Dat schlicht so heimlich in dei Döhr
 Un äwr'e Dähl¹⁾ un fött den Drüce
 Un klinkt so lies', un Wiehnachtslicht
 Strahlt up en Dodenangesicht. —
 Dei Stormwind singt sien willen Stücke,
 Dei Schnei danzt dörch dei Winternacht;
 Un is dat of en schuurig Weben,

1) Dähl = Diele, vorzugsweise aber gleich „der Flur“.

So is 't doch noch en warme Leben,
As binnen bi dei Lichter = Pracht. —

Kein Minsch hett seihn,
Wat doa gescheihn;
Kein Minschenkind hett je nah Joahren,
Wat binnen spraken is, erfoahren.
Dat was en Bidd'n, en knäglich¹⁾ Duälen,
Dat was en Schell'n, en hart Befehlen,
Dat was taulezt en hellen Schrie —
Dunn was 't vebi. — —

Un 'rute stört' wat ut dei Döhr
Un drückt wat hastig an sich 'ran,
As wenn 't dat nümme missen kann,
Un schwankt un schwäkt²⁾ so hen un her
Un grippt un tast entlang dei Wand
Un grippt un fött³⁾ nah eine Hand,
Dei 't hollen fall.
Kein Hand is doa,
Sünd storben un verdorben All.

1) knäglich = kläglich, flehend. 2) schwäken = schwach einher wanken. 3) grippt un fött = greift und fäßt.

Kein Hand höllt mihr dei arme Diern;
 Dunn süßt sei schwoc;
 Dunn is versunken
 In wiede Fiern
 Dei Nacht un Dual;
 Un duusend Funken,
 Un duusend Stiern
 Gahn up un dal,
 Un Klocken klingen
 Nem ehr herüm,
 Un Engel singen
 Mit säute Stimm;
 Ehr schwindt allmählig,
 Woran sei dacht,
 Ehr ward so seelig,
 Ehr ward so sacht,
 Un sei saft¹⁾ dal, erlöst von Weih,
 Herinne in den weiken Schnei,
 An 't Hart von wille Wintenacht. — —

Un bin'n is of en willes Jagen,
 Un Lichter gahn of up un dal,

1) saft = sinkt.

Un Klocken kling'n un warden tagen¹⁾ ,
 Un dat Gesin'n stört't in den Saal ,
 Un alle Hän'n, dei dauhn un plegen :
 Dei Fruu, dei hett ehr Krämpfen kregen. — —

Oll Daniel kümmt von Stadt taurügg,
 Dunn stahn sien Pier un schuuen sich ;
 Dat is, as wenn wat Schwarts doa liggt ;
 Un as hei von den Wagen stiggt ,
 Dunn fött hei eine folle Hand ,
 Dunn führt hei in ein bleik Gesicht —
 Ach Gott ! dat was em woll bekannt :
 „Mariek, Mariek ! Dat Gott erbarm !“
 hei nimmt dat Kind ut ehren Arm
 Un böhrt²⁾ dei Mutte sacht tau Höch
 Un hett sei up den Wagen leggt
 Un führt — wohen ? — Wohen denn nu ? —
 Ja richtig ! — nah dei Möllefruu.
 Dei nimmt sei up un hett sei hegt ,
 Von 't ganze Dörp is s' räuft un plegt ,
 Dei Ein bröcht dit, dei Anne dat ,
 Dat Kind hett Toppelsch mit sich nahmen ,

1) tagen = gezogen. 2) böhrt = hebt.

Sei hahr jo äwer Joah fein hatt;
 Doch as dei Sprak ehr werre kamen,
 Dunn föllt s' in wille Raserie;
 Dat Fewer bruust ehr dörch dei Ahre:
 „Jehann! Ehr Kind! Ehr olle Vahre!
 Amerika! Doa ward sei frie!“
 Denn hett s' üm Hüfung werre beden;
 So hett sei vähle Wochen led'en¹⁾
 Un twischen Dod un Leben rungen,
 Doch endlich het 't dei Jugend dwungen,
 As s' äwerst von dat Lage stünn²⁾,
 Dunn was dat Nacht in ehren Sinn;
 Wat All gescheihn, ehr was 't verschwunnen,
 Ehr Noth un Leed was all vergeten,
 Still un gedüllig hett sei seten;
 Uns' Herrgott hahr en Utweg funnen.

1) led'en = gelitten. 2) in dieser Redensart wird „stehen“ für erstehen, aufstehen gebraucht.

11.

Dei Macht.

Dei Frühling kam mit all sien Gräun
 Un all sien Blaumen antauteihn
 Un streut sei ut mit vulle Hand,
 As wenn hei recht spillunk¹⁾ wull;
 Den naakten Barg, den kahlen Sand,
 Den'n schmeet hei s' tau mit Hännenvull,
 Un sülwst in Diestel un in Duurn
 Hett Blaumen hei un Gräuns verlur'n.
 Un as hei hahr dit Stück verricht,
 Dunn müßt hei sülwst sich dräwe freun;
 Wo lacht sien helles Argesicht,
 As hei sien Maakwark hett beseihn!

1) „spillunken“, verstärkt für „spillen = verlieren, durch Nachlässigkeit etwas verstreuen. Spillunken daher = etwas mutwillig verstreuen, verschwenden.

Wo lacht sien floares, blaages Dog,
 Wenn 't 'run keek up dei gräune Flur!
 Wo horkt hei up un spiȝt dat Uhr,
 Wenn Nachtigahl un Hämpeling schlog!
 Un danzt herümm un juchheit luut:
 „Süh so! Nu hew ik puȝt dei Bruut!
 Un spält mit sienem Schatz Verstek,
 Luurt¹⁾ ut den gräunen Holt herut
 Un duuft²⁾ sich in dei floare Bäk,
 Verkrüppt³⁾ sich in dat gräune Musch⁴⁾
 Un leggt sich heimlich achter 'n Busch
 Un lacht so lustig un so säut,
 Wenn siene leive Bruut nich weit,
 Wo eigentlich dei Spitzbaum is.
 Un springt herut un höllt sei wiȝ⁵⁾
 Un nimmt sei lachend in den Arm
 Un drückt sei an sich weik un warm
 Un soppet un brüdt⁶⁾ un lacht un küßt:
 „Wenn Du mien Schatz man blieben wist⁷⁾,
 Bruukst nich tau weiten, wo ik bün;

1) Luurt = lauert und auch = lauscht. 2) duuft = taucht.
 3) verkrüppt = verkriecht. 4) Musch = Moos. 5) wiȝ = fest.
 6) brüden = necken. 7) wist = willst.

Ik bün bald hier, ik bün bald doa,
 Ik schien up Di herun as Sünn,
 Ik späl as Wind mit Diene Hoa,
 Ik sing as Vagel Di tau Rauh
 Un deck Di denn mit Blaumen tau,
 Ik weig as gräune Lindenboom
 Di in den säuten Kinne-Droom
 Un wenn Du drömist¹⁾, denu fött Di warm
 Mien Leiw as stille Nacht in 'n Arm. —
 Doch nu, mien Schätz, nu kümmt dat Best,
 Nu kümmt uns' lustig Hochtiedtsfest;
 Ik hew den Dag up Pingsten set't,
 Un doatau is ein Jeder beden,
 Dei Lust tau Leiw un Leben hett;
 Ik sähr 't ehr All, ik sprök²⁾ mit Jeden:
 Dei Boom, dei bringt sien junges Gräun,
 Dat Kuurn sien Dahr³⁾, dei Blaumen bläuhn,
 Tau pußen unsen Hochtiedssaal.
 Un äwe Barg un äwe Dahl
 Tüht Allens, wat sich freuen kann,
 Teihn all dei muntern Gäst heran;

1) drömist = träumst. 2) sprök = sprach. 3) Dahr = Ahre.

Dei Hund enfängt sei vör dei Döhr
 Un schnitt¹⁾ ehr Cumplementen vör;
 Dei Katt sitt up den Kanapeh
 Un nimmt dei Gäst doa in Enfang;
 Dei Kater präsentirt den Thee;
 Tanzmeister is dat flinke Reh,
 Un iernschaft an dei Wand entlang
 Sitt Ahnt un Gaus²⁾ as olle Tanten.
 Dei Voß spält Schapskopp mit den Ganten³⁾,
 Un Os un Esel Trudelduus;
 Dei lütten Vägel sünd Muskanten,
 Dei Lewark⁴⁾ bringt den Morgengruß,
 Un wenn wi 's Abends gahn tau Rauh,
 Denn singt dei Nachtigahl doatau.
 Dei Minsch hantiert as Herr von 't Huus,
 As Tafel- un as Kellermeister,
 Hei bringt up Brüjam⁵⁾ un up Brunt
 Mit helle Stimm dat Vivat ut,
 Un unse Herrgott is dei Preister. " —
 Un Pingsten is 't; mit gräune Rieser

1) schnitt = schneidet. 2) Ahnt un Gaus = Ente und Gans.
 3) Gant = Gänserich. 4) Lewark = Lerche.. 5) Brüjam = Bräutigam.

Sünd pußt dei lütten,dürft'gen Hüüser,
 Dei Frühling kückt mit siene Sünn
 In 't arme lütte Dörp herin,
 Un Mann un Wief sitt vör dei Döhren
 In Frieen unne gräune Mai'n
 Un seihn mit Lust, wo ehre Jöhren
 Sich ehres jungen Lebens freu'n.
 Dei Nahwer kümmt un set't sich dal
 Un hölt 'ne ollverstännig Rehr —
 Hüt nich von däglich Noth un Qual —
 Nee, wo 't vör Tieden wesen dehr:
 Wat hei von sienen Bahre hürt,
 Un wat Grotvahre doatau fähr,
 Wat in dei Kriegstied wier passirt,
 Un dat hei of Kusaken¹⁾ seihn,
 Un wenn dei grote Wind dehr weihn,
 Un wo dat doch so nahršchen wier,
 Dat em bei Piep güng ümmer ut —
 Un halt bei Tunnebüß²⁾ herut —
 Dei Tobak dög³⁾ jezt of nicks mihr.
 Ja, in dei ollen gauden Tieden,

1) Kusaken = Kosaken. 2) Tunnebüß = Zunderbüchse.

3) dög = taugte.

Dunn höll dei Tobak of noch Für' ;
 Indessen wull hei 't of nich strieden ,
 Dat 't noch in Ganzen gatlich wier ;
 Bör All'n in't Frühjoahr un üm Pingsten ,
 Hei sähr of up dat Ganze nicks ,
 Veracht't dei Welt nich in Geringsten ,
 Blot dei Tobak, dei dög nich mihr —
 Hahlt werre Tunne ut dei Bücks : —
 „Dat Teuwelstüg, dat höllt kein Für' !“ —

Un vör oll Toppeln siene Döhr,
 Doa sitt dat Allens, Jöhr bi Jöhr,
 Un krawweln 'rümme in den Sand
 Un wirken, spälen allerhand
 Un wöltern¹⁾ sich un lachen luut
 Un seihn so nüdlich dreckig ut,
 Un 't is 'ne Lust, un 't is en Larm,
 Backabens²⁾ buuen s', maaken Pütten³⁾,
 Un Liesch un Fieß, dei beiden sitten,
 Ein jede mit en Jöhr in Arm.
 Dat ein is Jöching. Ganz verdußt

1) wöltern = wälzen. 2) Backaben = Backofen. 3) Pütten = Pfützen.

Süht hei hüt in dei Welt herin,
 Oll Toppelsch hett em 'rute puȝt
 Un hett em weislich gegen Sünn
 Sien Vahrers Pudelmüs upset't,
 Un dat em dat recht nüdlich lett,
 Hett s' em en Uemischlagdauf ümbun'a —
 Recht warm! — Doch ut dei Pie¹⁾ nah un'n,
 Doa hammeln²⁾ 'rut dei roden Bein. —
 Dei Jung is prächtig antauseihn! —

Dei anne Lütt is man noch dümming,
 Mit den'n, doa spält un dröggt sich Fieß
 Un nimmt em hoch: „Süh so! Nu kümming³⁾!
 Nu gahn wi 'n Bäten üm den Dieß.“ —
 Un as sei nah dei Möll⁴⁾ 'rüm kamen,
 Dunn sitt 'ne Fruu doa up den Süll⁵⁾ —
 Oll Daniel sitt mit ehr tausamen —
 Dunn steiht lütt Fieken vör ehr still
 Un dreiht nah ehr herüm dat Lütting:

1) Pie = Kinderrock; auch wohl Unterrock der Frauen. 2) hammeln = baumeln. 3) kümming = dimin. von kumm, ungesähr zu übersezzen: Nun komm auch schön! 4) Bei uns spricht man „Möll“ und „Mähl“ = Mühle. 5) Süll = Schwelle.

1) straakt = streicheln.

Un mi 's so froh tau Sinn,
 As seet 'k nah Regen, Nacht un Wind
 Recht warm in Gottes Sünn.
 Wat hew if Zug tau Leden dahn?
 An mi geiht Allens vörbi,
 Un wenn sei Sünndags danzen gahn,
 Denn geiht woll Keine mit mi;
 Denn sitt 'k allein vör miene Döhr,
 In miene Hand dei Knütt,
 Denn kückt dei rode Mahn hervör,
 Denn röpt dei Uhl: „Kumm mit!
 „Kumm mit!“ un heidi! möt if gahn
 Woll äwe Stock un Stein,
 Hen nah den Diek, hen nah dei Mahn!
 Doa sitt if denn allein,
 Doa sitt if unner'n Fleereboom
 Un hür dei Bläder weihn,
 Doa dröm if männig ollen Droom,
 Doa hew if s' danzen seihn.“
 Un drückt sich dichter in sien Neeg¹⁾
 Un flüstert lies' den Ollen tau:

1) Neeg = Nähe.

„Un wer dat Danzen einmal seeg¹⁾
 Den'n lett dat keine Rauh. —
 Wenn lücht't bei Mahn
 Wied äwer 'n Plan,
 Wenn liggt bei Dak²⁾
 As wittes Lak³⁾)
 Up gräune Wisch un gräune Wieden,
 Wenn Mahn un Dak sich strieden,
 Denn kamen s' an,
 Ganz lies' heran,
 Denn trippeln s' äwer 't käuhle Musch,
 Denn russeln s' dörch den gräunen Busch,
 Denn spälen s' ierst mit mi Verstek,
 Den singen s' ut bei Mählenbäk,
 Denn flüstert lies' bei Boom mit mang,
 Denn danzen s' an den Diek entlang,
 Denn röpt bei Uhl: „Kumm mit, Mariek!“
 Denn gah ik 'ranne an den Diek
 Un wasch mi miene Dogen floar,
 Denn seih ik s' dörch dat Waater teihn,
 Denn sitt ik up den groten Stein

1) seeg = sah. 2) Dak = Thau. 3) Lak = Laken.

Un flecht mien langee, gehles Hoar,
Schmiet Strümpings un Schäukings¹⁾ in 'n
gräunen Busch

Un maak mi so lichting üm miene Fäut²⁾
Un danz mit dei Annern up't kühle Musch
Un hew denn an Danzen un Singen mien
Freud;

Denn singen s' un winken s' ut't Waater herut:
„Kumm 'runne, kumm 'runne, Du schmucke
Bruut!“

Oh, wo säuting! Wo säuting! Wo säut!
Un wenn so tau Mauth nah dat Waater mi is,
Denn kümmt dei oll Daniel doatau,
Dei fött mi denn üm un dei höllt mi denn wiß
Un söcht mi mien Strümp un mien Schauh.
„Leiw Daniel, oh, laat mi! Dit is jo dei Stell.
Ik bliew hier bi Bäk un bi Busch,
Ik sing' hier un danz, wenn dei Mahn schient hell
Mit dei annern All up dat Musch.
Will baden un duuken in deipen Tiefe,
Doa ward ik mit Einen vertruut,

1) diminutiva von Strümpfe und Schuhe. 2) Fäut = Füße.

Dat répt mi jo ümme: „Marief, Marief!
Kumm 'runne, Du leisliche Bruut!“ — —

Un einmal reep¹⁾) 't of goar tau säut,
Un Daniel was nich glied tau Stähr²⁾):
Dei Möllesruu löppt hen un her
Un frögt dei Lühd, ob keine weit,
Wo woll Marieken wesen kunn. —
Oll Daniel kümmt von 't Feld herin,
Un as hei hürt, wovon dei Rehr,
Dunn seggt hei still: „Ik weit ehr Stähr.“
Geiht nah den ollen Fleereboom
Un nah dat Schülp³⁾) an 'n Waatersoom,
Wies't mang dei Waaterlilgen⁴⁾ 'rin:
„Doa ward s' woll sijn,
Doa liggt sei unnen.“ —
Doa hebb'n s' denn of Marieken funnen. —

As s' unner'n Fleereboom was leggt,
Dunn stahn dei Minschen still un stumm,
Blot Teppelsch böhrt en Kind tau Höcht:

1) reep = rief. 2) Stähr = Stätte, Stelle. 3) Schülp = Schilf. 4) Lilgen = Lilien.

„Süh, dat 's Dien Mutting, leiwes Kind! —
Ach Gott, Du büst woll noch tau dum!“ —
Un Mahn un Stiern, dei lüchten haben,
Un Bläder flustern in den Wind,
Un ut dat Water süfzt dat Ruhr.
Drei Daag nahher, dunn was s' begraben —
Begraben? — Ja! — Doch an dei Muur.

12.

Dei Klag'.

Un männig Joahr is all vergahn;
 An 'n Heben steiht dei stille Mahn,
 Dei Nachtigahl kümmt äwer Nacht
 Un fläut¹⁾ so säut un singt so sacht,
 Un Waterlilg un Watermümmel
 Seih'n still tau Höcht tum floaren Himmel,

Un kieken ut dat Waater 'rut
 Un horken up den säuten Luut
 Un flustern mit den Fleereboom
 Un mit dat Schülp an'n Waterboom
 Von olle Tied un olle Saaken,
 Un dat en Minschenhart hier braken²⁾.

1) fläut¹⁾ = flötet. 2) braken = gebrochen.

Still schient dei Mahn up 't fuchte Graf,
 Dei Boom, dei streut sien Blaumen 'raf,
 Un in den Nachtigahlensang,
 Doa örgelt Lust un Waater mang,
 Un hebb'n dörch Nacht ehr Klagen sungen,
 Wo hier en Minschenhart hett rungen:

Minschenhart, so gaud, so fram,
 Bröf¹⁾ hier eins vör Noth un Gram;
 Köster lüdt²⁾ dei Klocken nich,
 Preister bedt nich sine Sprüch;
 Ahn Gebet un ahn Gelüd
 Drögen s' Di mal still bi Sied.

Barmt sich Dien kein Minschenkind,
 Barmt sich Jer un Well un Wind,
 Heben weint in stille Truun,
 Schülp, dat flagt, un 't süfzt dat Ruhr,
 Bagel singt dei Liek tau Rauh,
 Blaumen lüden Klocken tau.

Rauh in Freden, arme Diern!
 'Runne seihn dei goldnen Stiern,
 Sünn bi Dag un Mahn bi Nacht
 Hollen truue Liekenwacht
 Un vergoll'n dei Kloare Bäl,
 Wo Dien armes Hart eins bröf.

1) bröf = brach. 2) lüdt = läutet.

Beckt Di mal Posaunenton,
 Steihst Du mal vör Gottesthrон,
 Denn raup uns, denn raup uns Al:
 Boom un Blaum un Nachtigall,
 Raup dei ganze Creatur,
 Raup dei Sünn un raup dei Mahn;
 Wat doa lewt, dei ganz Natur
 Sall as Tügen¹⁾ tau Di stahn!"

Dei Nachtigahl, dat Waater singt,
 Dei Fer, dei ganze Heben klingt,
 Wat lewt un wewt, dat högt dei Knei
 Un stimmet in dei Melodei:
 „Un heilig, heilig is dei Stähr,
 Wo 'n Minschenhart eins breken dehr!"

1) Tügen = Zeugen.

13.

Dat En' u.

Un männig Joahr is all vergahn;
 Dei frame Fruu is lang' begraben,
 Un up ehr Postament, doa stahn
 In goldne Schrift dei schönsten Wür¹⁾;
 Dei ehre frame Dugend laben.
 Un üm ehr 'rüm in käuhle Ger
 Rauht männig Ein in stillen Freden
 Von Arbeit ut; sei von dat Beden. —
 Un meiht dei Dod den Aust of af
 Un führt em 'rin in 't säker Graf;
 Dei Tied hett Wrausen²⁾ di äwe deckt
 Un ut dei Gräwer Blaumen weckt,

1) Wür = Worte. 2) Wrausen = Nasen.

Dei bläuhn so still in Abendsünn,
 Dei Abendwind, dei flustert drin,
 Dei winken heimlich Di bi Sied
 Un reden von vergah'ne Tied
 So truuriig säut un so vull Leed
 Un fragen, ob Dien Hart vergeet,
 Wat Elend hier begraben is;
 Un flustern sacht: „Denk an Mariel!“ —

Dat lütte Dörp liggt so as süs
 In Armauth üm den Mählendiek:
 Doa liggt dei Hof, doa liggt dei Mähl,
 Doa stahn ümher dei lütten Rathen¹⁾;
 Dei Sünn hett schient, dei Regen feel,
 Teihnmal sünd riept²⁾ dei goldnen Saaten;
 En Stormwind bruus'te äwer 'e Fer
 Un dehr nich Hoch un Niedrig schonen,
 Hei sprak mit Gottes Dunnerwür
 Un rüttelt an dei höchsten Kronen.
 Un in dei Angst un in dei Noth
 Kam Hoffnung dunn un Tauversicht

1) Rathen = Tagelöhner-Wohnungen; verächtlich für Wohnung überhaupt. 2) riept = gereift.

Un schient as helles Morgenroth
 Dei Welt in 't bleike Angesicht.
 Dat Morgenroth is längst verblaßt,
 Kein Hoffnung schient mihr in dei Rathen;
 Dei sülwig¹⁾ Noth, dei sülwig Last! —
 Sei hebb'n 't bi 'n Ollen blieben laaten. — —

En oll lütt stiewes²⁾ Männing sitt
 In'n Kahn un tüht sien Angelsimm³⁾
 So matt un mäud an 't Ruhr herüm;
 Sien Rügg'⁴⁾ is krumm, sien Hoar is witt,
 Sien Hand en afnußt Stück Geschirr,
 Wat in den Winkel schmäten⁵⁾ würr;
 Sien Angesicht en oll Gemüür,
 In Noth un Tied un Storm verfollen,
 Dat 't äwerst antauseihen wier,
 Dat Festdag mal eins wier d'rin hollen;
 Sien Dog dei letzte Sünnenstrahl,
 Dei sich dörch Abendwolken stehlt
 Un truulich noch tum lezten Mal

1) sülwig = selbe. 2) stiewes = steifes. 3) Angelsimm = Angelschnur. 4) diese abgekürzte Form für Rüggen = Rücken, ist sehr gebräuchlich. 5) schmäten = geschmissen.

Uem dei versöllnen Muuren spält. —
 Sien Kahn drift sacht dat Nuhr entlanken;
 Hei sitt in Rauh, deip¹⁾ in Gedanken,
 Mäud kückt hei in dei stille Flauth,
 Em ward so floar un käuhl tau Mauth,
 Em is, as wenn sien Lebenstied
 Vörbi in ließe Wellen tüht. —
 Doa springt en Fisch. — Dei Ringel schlahn
 Ein achtern anner rasch tau Höcht,
 Un schwack un schwacker warden s' gahn,
 Je mihr sich Ring nah Ringel rögt.
 Bet s' liesing sich an 't Küwer²⁾ breken
 Un von ein Küwer tau em spreken,
 Wat dicht vör em in Freden liggt,
 Moran sien Hart woll breken müggt. —
 Dei Kahn drift sacht entlang den Soom
 Bet in dei dichte Mümmelwriet³⁾
 In'n Schatten unnern Fleereboom.
 Dei Oll hett ditmal naug⁴⁾, hei tüht
 Sien Angel in un windt dei Simm

1) deip = tief. 2) Küwer = Ufer. 3) Wriet wird von dem Gewebe verfilzter Wurzeln gebraucht. 4) naug = genug.

Vörsichtig üm den Schacht¹⁾) herüni,
 Un flöttert²⁾ sich an 't Auwer 'ran. —
 „Gün Abend!“ seggt 'ne veipe Stimm,
 Un vör den Ollen steiht en Mann
 In breiden Haut un buntet Hemd,
 In utländsch Dracht, so wild un frömd,
 Brun von Gesicht, hart, mager, fast;
 Deip ligg'n dei Dogen in't Gesicht
 Un gahn ümher ahn Rauh un Rast,
 Un üm sien knäpen³⁾ Lippen flüggt
 So'n bitterbösen, spöttischen Schien,
 As kunn 't nie werre mäglich sien,
 Dat em up Jeren wat geföll⁴⁾). —
 „Segg,“ frögzt hei, „kennst mi, Daniel?“ —
 Dei Oll führt blöd em in t' Gesicht:
 „„Nee,““ seggt hei, „„nee! — Mien Dog
 ward schlicht,
 Un mien Gedanken⁵⁾ warden schwack.““ —
 „Ik bün Jehann, bün Jehann Schütt.“ —

1) Schacht = Schaft, Stange, Nuthe. Hier die Angel.

2) flöttern = flößen; auch von austreibungsloser Bewegung der Nüder gebraucht. 3) knäpen = gekniffen. 4) geföll = gespiele. 5) Gedanken wird meistens für Gedächtniß gebraucht.

„„Jehann, Jehann?““ Un fött un ritt¹⁾
 Den Frömden 'rümme an dei Jack
 Un treckt²⁾ em ut den Schatten 'rut
 Un nimmt em af den breiden Haut
 Un munstert em von Kopp tau Faut:
 „„Nee, nee! — Jehann seeg³⁾ anners ut! —
 Dat 's nich sien frische, apne⁴⁾ Mien,
 Dat 's nich sien floares, blaages Dog,
 Dat 's nich dei fründlich helle Schien,
 Dei üm dei roden Lippen tog.
 Nee!““ seggt hei un sien Hän'n, dei leeten
 Den Frömden los. — Dei wendt sich af
 Un sprekt vör sich: „Of hier vergeten! —
 Nicks fünn ik, as en einsam Graf!“
 Un sett sich unnern Fleereboom,
 Wo hei so oft vör Joahren seten,
 Un in em waakt⁵⁾ en ollen Droom
 Von jene fierne, seel'ge Tied
 Un speigelt sich up sien Gesicht.
 Un as dei Droom doaräwe tüht
 Un in den Oll'n sien Ogen lücht,

1) fött un ritt = faßt und reift. 2) treckt = zieht. 3) seeg = sah. 4) open = offen. 5) waakt = wacht.

Dunn kennt hei of Gehannen werre
 Un set't sich bi den Frönden nerre
 Un fött sien Hand un kift em an:

„„Ja,““ seggt hei, „„ja! Du büst Gehann!
 Ach Gott, Gehann, hier's vähl passirt.““ —
 „Ja, ja! Woll vähl! — Mariek . . . —
 Wo wier 't?“ —

Dei Oll wiest in dat Waater 'rin:

„„Hier is dat Flach¹⁾, wo ik sei fünn²⁾).
 Un Du, Du weitst?““ — „Ik weit, ik weit!“
 Un rückt tau Höch un drückt den Haut
 Sich deipe in't Gesicht un steiht
 Un kift herinne in dei Flauth —
 Lang', lang', as fünn hei goar kein En'n.
 Dei Oll sitt still un folgt dei Hän'n.
 Un frögt tauleßt: „„Wer hett Di 't seggt?““ —
 „Wer mi dat seggt? Wer mi 't vertellt?“
 Un richt sich düster in dei Höch:
 „Glöwst Du, wat 'rup tum Heben schrigt³⁾),
 Dat dat blot flustert dörch dei Welt?
 Glöwst Du, oll Mann, so'n Dauhn, dat schwigt?

1) Flach = Fleck, Platz, Stelle. 2) fünn = fand. 3) schrigt, auch schriet = schreit.

Dat schallt nich blot tau Himmelshöh,
 So'n Tauhn, dat schallt dörch Land un See,
 Dat huhlt dörch Storm, dat bruus't dörch Meer,
 Dat floppt des Nachts von Döhr tau Döhr
 Un redt von Sün'n an dei Natur;
 Wo Du of wankst¹⁾), dat findet Dien Spur
 Un redt tau Di mit duusend Lungen,
 Sülwst Wülf²⁾ un Raben hebb'en 't sungen!" —
 „„Un sün'gn s' Di of nich von den Murd
 Un von den Fluch, den Du hest dah'n?" —
 Gehann, dei wendt sien Ogen furt,
 Un hastig seggt hei tau den Ollen:
 „Dat brukst Du mi nich vör tau hollen!
 If weit, if hew en Murd begahn,
 Un dei steiht hier, hier in dei Bost,
 Mit gläugnig brenn're Schrift inschräben.
 Doch fragst Du goar nich, wat mi dräben?
 Un fragst Du goar nich, wat hei kost? —
 If hew den Pries betahlt bet up dat Blaut
 Doasför, dat if mi einmal räkent³⁾:

1) wanken wird sehr häufig für wandeln und wandern gebraucht. 2) Plur. von Wulf. 3) räkent, nicht zu verwechseln mit „rekent = rechnet und gerechnet, ist das Partic. von räken = rächen.“

In wild Gewäuhl, in Weusten mi verstekend,
 Hew ik kein Stun'n in Freden rauht;
 Wo Minschenwahnung still un glücklich liggt
 Künn ik den Anblick nich verdragen,
 Dat müßt ahn Rauh mi dörch dei Männer jagen,
 Un ümme folgt sien bleik Gesicht.
 Un wenn ik Nachtens leeg tum Starben mäud,
 Un wenn dei Droom sich tau mi schleef¹⁾),
 Un mien Mariek mi in dei Ogen keek
 So vull von Leiw, so warm, so säut,
 Un ik vull Sehnsucht nah ehr reckt dei Armen,
 Bömt sich tau Höcht sien bleik Gesicht,
 Un stellt sich bläudig²⁾ twischen ahn Erbarmen
 Un reep: „Bergäws! Dat's Dien Gericht!“ —
 Un deckt vör Ogen sich dei Hand
 Un is so bleik as Kalk an Wand,
 As wenn dat werre vör em stünn;
 Un dörch sien Wesen flüggt en Schuu'r,
 Doch fütt hei sich un frett³⁾ dat 'rin,
 Un werre steiht hei steil un stuur⁴⁾:
 „Un glöwst Du, Mann, dat mi dat leed,

1) schleef = schlich. 2) bläudig = blutig. 3) frett = frisbt.

4) stuur = hochaufgerichtet.

Dat ik den Schuft sien Blaut vergöt? —
 Un stünn hei werre hier tau Stähd,
 Un wenn sien Hand hei an mi lähd¹⁾ ,
 Hei müht heran, hei müht d'ran glöben!
 Dei Pries is tahlt mit mienem Leben
 Un mit mien Mäten ehr doatau.
 Wi sünd nu quiet²⁾; ja mihr as quiet!
 Un lett sien Späuf mi keine Rauh,
 Denn treffst dat up en fastes Hart,
 Dat driest em in't Gesicht 'rin führt.
 Dit Hart is gläuht³⁾ in Sündenbrand,
 In gläugnig Füer von männig Land,
 Un Noth un Arbeit hett dat schmädt⁴⁾ ,
 Un in Gefoahren is 't verstahlt,
 Bertwieselung hett den Seegen bedt,
 Un mit mien Rauh is dat betahlt. —
 Un Du frögst mi noch nah dat Wurt,
 Wat ik in grunglich Ängsten spraken,
 As ik hier güng mit Fluchen furt? —
 Wat hahr ik arme Jung verbraken?

1) lähd = legte. 2) quiet = quitt; das „qu“ ist deutsch auszusprechen. 3) gläuht = geglühet 4) schmädt = geschmiedet.

Wat mien dunn¹⁾ was, dat hahr ik geben:
 Mien gauden Will'n, gesunne Knaken,
 Mien truues Hart, mien junges Leben;
 Un of Mariet hahr 't iehrlich dahm.
 Wi Beiden geben All'ns. — Wosör? —
 Dat hei kunn Geld up Gelder schlahn! —
 Un as ik leep von Döhr tau Döhr
 Un bittelt üm dei naakte Stähd,
 Wo ik mien Höwt²⁾ in Freden lähd;
 Un as mien armes, junges Hart
 Mit einen säuten Wunsch sich drög³⁾;
 Dei sülwst den schwarten Slawen ward:
 Dat ik tum Wiew mien Mäten kreeg,
 Dunn würr ik an bei Näs' 'rüm lerrt⁴⁾ —
 Kein Platz in mienem Vahrelan'n! —
 Mien Diern, dei kam in Schimp un Schan'n,
 Un up uns' Hart würr 'rümme perrt⁵⁾,
 As wier 't en Stein. — Dat was Gesetz! —
 Ja! As dat Elend mi tauleht

1) dunn, hier = damals. Außerdem hat es noch die Bedeutung von da, dann, darauf. 2) Höwt = Haupt.
 3) drög = trug. 4) lerren = leiten, führen. 5) perrt = getreten.

Tau wilden Murd un Dodschlor dräben,
 Dunn hew ik flucht. — Dei Fluch steiht schräben
 Bi all dei, dei in Höllennoth
 Sich ut dat Minschenhart mal rungen,
 Wotau bei Minsch den Minschen dwungen.
 Gott hett em hürt. — Up sien Gebot
 Leih'n Duusend nah Amerika,
 Un duusend Anner folgen nah;
 Nu is 'e Ruum, nu 's Platz in'n Lan'n!
 Dei Herren, bei hollen 't nich för Schan'n,
 Tau bidden dei, dei s' eins verschmahdten¹⁾.
 Is dat nich Fluch? — Sei will'n sich Lühd
 Ut arme Gegend kamen laaten. —
 Vermisquemt²⁾ Volk, wat 'rinne tüht,
 Hett dat en Hart för 't Bahreland?
 Rögt dat för Fürst un Volk dei Hand,
 Wenn los mal breckt dei wilde Storm,
 Wenn mal dei Kriegsflauth breckt den Damm,
 Un wenn dat stérmt von Thorm tau Thorm? —
 Is dat nich Fluch? — Dei olle Stamm;
 Dei hier Joahrduusend wahnt, dei fall

1) verschmäden = verschmähen. 2) vermisquemt = verkommen,
 schwächlich geworden.

Vör Schnurrers¹⁾ un vör Frönden wieken?
 Un denn worüm? Worüm dit All? —
 Blot dat noch rieker ward'n dei Nienken,
 Un dat dei Herrn von Kohl un Räuben²⁾
 Ok äwer Minschen Herrschaft äuben! —
 Is dat nich Fluch? — If was en Duhr,
 Dat if in Hast den Fluch utspraken;
 Dei Fluch möt kamen von Natur
 För dei, dei so'n Geseze maaken!"
 Un lacht hell up. — Oll Daniel ficht
 Em recht weihmäudig³⁾ an un frögt:
 „„Na, is Di 't doa denn beter glückt,
 Un kamst Du doa mit Hübung t'recht⁴⁾?"""
 „Wat? — Hübung? — If? — Doa bruukt
 if kein;
 Mien Leben kreeg 'ne an'nre Wiesung.
 If güng allein un bleew allein;
 Ahn Wief un Kind bruuk if kein Hübung." —
 „„Un büst Du doabi glücklich worrn?"""
 „If bruuk kein Hübung un kein Glück,
 Taumal kein Glück nah Jungen Schick,

1) Schnurrer = Bettler. 2) Räuben = Rüben, 3) weihmäudig = wehmüthig. 4) t'recht = zurecht.

Hüt bün ik hier, doa bün ik morrn;
 Ik gah tau See, ik gah tau Land,
 Nehm Rauder¹⁾ ore Aert tau Hand,
 Un ward mi dat doabi tau still,
 Un wenn 't tau eng mi warden will,
 Denn schmiet dei Büß²⁾ ik äwr'e Schulle
 Un säuf³⁾ in Jagd un Krieg Gefoahr,
 Doa ward mi werre licht un floar,
 Doa flütt dat Blaut mi lust'ge, vulle,
 Doa ward dat Hart mi werre fast." —
 „„Un wecke wilde Warbelwind
 Weiht Di hierher, unruhig Gast?"" —
 „Wat ik hier will? Ik will mien Kind." —
 Oll Daniel fickt em in 't Gesicht,
 Sien mäude, blöde Blick, dei süggt⁴⁾
 Sich fast an em, as wull hei fragen:
 Is 't würklich dat? Is 't Leiw allein,
 Ehr Gras, Dien einzigst Kind tau seihn,
 Wat Di nah uns hett werre tagen⁵⁾?
 Hett Di so heit doanah verlangt?
 Hest nich vör Rad un Galgen hangt?

1) Rauder = Ruder. 2) Büß = Büchse. 3) säuf = suche.

4) süggt = saugt. 5) tagen = gezogen.

Un as hei hett dei Antwort lesen,
 Seggt hei vör sich: „„So möt 't woll wesen.
 Ob Dag un Joahr vöräwertüht,
 Kein Schuld, kein Unglück lett vergeten,
 Wat mal ut 't bindelst¹⁾ Hart is reten;
 Dat lett 'ne Noar²⁾ för alle Tied.
 Unglück un Schuld ritt ut dat Leben,
 Wat mal in uns is leislich worrn,
 Un wenn wi nahseihn, wat uns bleben³⁾),
 Denn sin'n wi blot den naakten Born;
 Dei Born heit Leiw, wi dauhn em plegen,
 Wi laaten Thranen up em regen⁴⁾),
 Uns' heist'e Wunsch gläuh't up em nerre:
 Bergäws! Dat Frühjoahr is vörbi,
 Un Blaumen wassen uns nich werre!
 So is 't mit em, ik weit 't an mi.
 Nu drift em dat, nu drängt em dat
 Taurügg in 't olle Vahreland,
 Dat hei in 't naakte Feld wat plant⁵⁾). —
 Hew 'k nich of mal so'n Drängen hatt,

1) bindelst ist der Superlativ von binnen = innen; also innerste. 2) Noar = Narbe. 3) bleben = geblieben. 4) regen = regnen. 5) plant = pflanze.

Wenn 'k em in 't floare Dog hew seihn?
 Müßt 'k em nich an mi 'ranne teihn?
 Un 't was jo doch nich mal mien eigen!
 Em drift Natur, em drift dei Leiw,
 Dei dörben heid em nich bedreigen¹⁾ ,
 Sien Kind is sien! — Ja!"" seggt hei luut,
 „„Dien Kind is Dien! Mien Sähn, hier teuw!
 Jehann, ik hahl Dien Kind Di 'rut.""

Dei steiht nu doa. Wo ritt em dat
 Dörch Seel un Sinn mit ängstlich Bangen!
 Dat faste Hart ward schwack un matt
 Vör Seeligkeit un vör Verlangen.
 Sien Kind! Sien Kind! — Mariet ehr Kind!
 Em schient 't 'ne Ewigkeit tau duuren,
 Dat hei in 't Kind dat werre findet,
 Wat in dei Mutte hei verluren.
 Un as oll Daniel 'ranne kümmt
 Un tau em bringt den driesten Jungen,
 Dunn woahrt²⁾ dat lang', bet hei em nimmt,
 Bet sich sien Arm hett üm em schlungen;
 Hei hölt em von sich, starrt em an:

1) bedreigen = betrügen. 2) woahrt = währt.

„Wo heitst Du, Jung?“ — „„If heit Je-
hann.““ —

Hei leſt in ſienen Angesicht,
Hei frögt dat Dog, hei frögt dei Mien,
Bet 't hell ut ehr herute lücht:
Ja 't is ſien Kind, dei Jung is ſien!
Wo führt dat Kind ſien Mutte glied!
Ja 't is Mariek, ſien leiw Mariek! —
Un ritt den Jungen hell¹⁾) tau Höcht
Un drückt em an dei breide Schulle
Un ſet't den Haut ſich fast un föcht
Nah ſien Stock herüm, as wull 'e
Sien Eigendauhm in 't Säker²⁾ bringen,
As hahr hei All nu, wat hei wull,
As wenn kein Macht up Ferden full
Den Schatz em ut dei Fingern wringen. —
Oll Daniel rögt em an un ſeggt:
„„Mien Sähn, Jehann, dauh 'f of woll recht?

1) hell wird im Plattdeutschen als Verstärkung bei jeder nach oben gerichteten Bewegung gebraucht z. B. „hell dräwe weg; hell lacht hei up, hell ſprung hei up, hell be-gährte (gährte) hei up“ d. h. im Born. Es ſcheint mir diese Bezeichnung dem Bilde des Feuers entlehnt zu sein.

2) in't Säker = in Sicherheit.

Rümmt of dat Kind in wilde Gähr¹⁾?"" —
 „Laat man Dien Angst, ik sorg doasför!
 Glöwst Du, oll Mann, dat ik mien Kind
 Würr unne ruug²⁾ Gesellschaft stöten? —
 Dei Sorg, dei schlag Di in den Wind,
 Noch hew ik sülwst nich mang ehr seeten.
 Mien Hand is rein von unrecht Gant,
 Un bet up jenen Placken³⁾ Blaut
 Hew 'k mit Verbrefen nicks gemein,
 Mariel hett up mi 'runne seihn. —
 Hier äwerst fall mien Kind nich blieben,
 Dat fall hier nich in Schan'n verkamen,
 Ahn Bahrehuus sich 'rümme drieben,
 Hier 'rümme gahn ahn Vahrersnamen,
 In Schimp sien Mutte näumen⁴⁾ hüren
 Un mi as Müre schellen liehren.
 Dat fall nich mal eins hüt un morrn
 Haut in dei Hand vör Herren stahn,
 Un wenn 't en richt'gen Kierl is worrn,

1) Gähr = Gährung. Wilde Gähr wird von jedem aufgeregten, ungeregelten Zustande gebraucht. 2) rung = rauh und roh; hier das Letztere. 3) Placken = Flecken. 4) näumen = nennen.

Nich dahuhn, wat eins sien Bahre dahn.
 Hei soll nich! — Sall nich! — If bün Bahre;
 Mien Blaut flütt of in siene Ahre¹⁾. —
 Oll Daniel schürrt den Kopp un sprecht:
 „„Wat sähd oll Batte Brand in'n Starben?
 Höllt ut! Höllt ut! — Du höllst nich ut.
 Du störtst Di 'rinne in 't Verdarben,
 Büst äwer Land un Waater treckt,
 Un wat Du hier mal richtst tau Grun'n,
 Dat hest Du nahrends²⁾ werre fun'n.
 Dat Einzigst, wat Di bindt an 't Leben,
 Dien Kind — hett 't nich Dien Bahreland
 Mit truue Leiw Di werre geben?
 Du hest verflucht dei warme Hand;
 Schadt nich, mien Sähn! Dei Leiw, dei ward
 Troß Dienen Fluch bi uns doch blieben;
 Dei von uns gahn, drift nich ehr Hart,
 Dei deiht ehr Unverständ blot drieben,
 Ehr Unfred un ehr Äwermauth,
 Ehr gierig Sinn nah Geld un Gant.
 Un wenn sei gahn sünd, stahn s' allein,

1) Ahre = Äder. 2) nahrends = nirgends.

In ehre Hand staats Brod en Stein,
 Verdrusß un Gram in 't franke Hart,
 Kein Hoffnung, dat 't mal beter ward.
 Doa nich tau Huus — hier nich taurügg!
 Vertchren s' un vergrämen s' sich;
 Kein Nahwershülp¹⁾ kann sei doa rerrn.""
 „Ja“, seggt Iehann, „so segg'n Zug Herrn;
 So segg'n all Dei, dei jedenfalls
 In 't Fett 'rin sitten bet tum Hals,
 Dei in ehr vörnehm Wesen meinen,
 Dat unse Herrgott Arm un Beinen
 Von anner Lühd för sei hett schapen²⁾),
 Dat s' noch mihr Fett tausamen schrapen³⁾),
 Dei glöben, dat dei Meß⁴⁾ un Gabel
 För ehren Mund sünd wet't⁵⁾ allein,
 Dei äwer ehren gählen Schnabel
 Mendag nich hebbən 'räwe seihn. —
 Un doch is 't woahr. Sei hebbən Recht
 Up ehre Dart; 't is, as Du seggt. —
 If seeg sei dräben stahn tausamen,

1) Nahwershülp = Nachbarshülfe. 2) schapen = geschaffen.
 3) schrapen = schaben, krazen, raffen. 4) Meß = Mes-
 ser. 5) wet't = geweigt.

Dei Armen hungrig, bleik von Feewer¹⁾)
 Wo s' weesen äwer 't Waater 'räwer
 Hen nah den Urt, von wo sei kamen;
 Wo hast'ger ehre Harten schlogen,
 Wenn s' von dei fierne Heimath redten
 Un för dei ollen Öllern behdien;
 Wo Thranen bröken²⁾ ut dei Oogen,
 Wenn s' an dei ollen Tieden dachten,
 Wenn s' sich up't harte Lager schmeeten,
 Den Bast sich ut dei Fingern reeten;
 Ik hew sei elend seihn verschmachten,
 Ehr lezt Gedank, dei was an Zug,
 An ehr lütt Dörp, an Ehres Gieken.
 Dei Fluch dröpt³⁾ nich allein dei Nieken,
 Nee! Of dei Armen dröpt dei Fluch!" —
 „Un is dat Glück? — Is dat woll wierth
 Dat Ein sien Vahreland verliert?" —
 Frögzt Daniel. — Jehann, dei leggt
 Dei Hand em up den Arm un seggt:
 „So redst Du nu. Hahrst Du so spraken⁴⁾,
 As dunn Dien Herr dat Hart Di braken? —

1) Feewer = Fieber. 2) bröken = brachen. 3) dröpt = trifft. 4) spraken = gesprochen.

So wiet hebb'n Juge Herren recht,
 Un Männigein, dei güng tau Grun'n,
 Hei was en Knecht un blew en Knecht. —
 Doch, olle Mann, of seeg mien Dog,
 Wo s' starken Mauths dörch 't Waater tögen
 Un rüggwärts up dei Heimath seegen
 Un böhrten ehre Kinne hoch
 Un weesen nah den siernen Strand:
 Seiht! Seiht! Dat was uns' Vahreland!
 För Di, mien Sähn, för Di, lütt Diern,
 Gah ik un Mutte in dei Fiern,
 Wie laaten All'ns, wat leiw uns wier,
 Frie sält Ji sien up friee Ier! —
 Ik hew sei seihn mit Rieseneiken
 In starke Kraft gewaltig ringen,
 Dat wille Land tau Saatfeld dwingen,
 Dei fliet'gen Hän'n enanner reiken,
 Hüsing tau huun, wo 't ehr geföll,
 Up ehren Born, up friee Stell.
 Ik seeg s', wo s' stünnen up ehr Land,
 Wo s' dräwe reckten ehre Hand,
 Wo s' spröken frie un stolz un stark:
 Dit 's uns'! — Uns' eigen Hännenwerk,

Dei Arbeit is uns' Mark un Zeiken¹⁾).
 Hier sünd wi Herr; dit is uns' eigen! —
 Ik seeg den Oll'n up 't Lager rauhn,
 Up 't ležt; üm em herüm sien Kinne,
 Ehr frame Segen för sien Dauhn
 Folgt em in anner Welt herinne;
 Hei richt sich kräftig in dei Höcht
 Un kückt mit hellen Dog in 't Licht:
 Herr, seggt hei, dei hier vör Di liggt,
 Den'n settst Du up dei Welt as Knecht,
 Ik maakt ut em en frieen Mann;
 Geihst mit mien Sünden in 't Gericht,
 Denn reken²⁾ dat mi gnädig an!
 Un Du, oll Mann, treck of mit mi,
 Lewst of as Slaw, so starw³⁾ doch frie!"
 Un deiht dei Hand den Ollen reiken. —
 „„Ja woll, mien Sähn, ik wander ut,""
 Seggt dei, „„un will mi Hüsing säufen;
 Dien äwerst liggt mi doch tau siern.""
 Un kückt herup tum Abendstier,
 „„Mien liggt hier dicht in miene Näh,

1) Zeiken = Zeichen. 2) reken = rechne. 3) starw = stirb.

If bruuk nich äwer Land un See."'" —
 Jehann, dei bögt dat Kind em dal
 Zum letzten Kuß: „Na, denn noch mal:
 Lew woll! Uns' Weg', dei scheiden sich.
 If kiek nah vör¹⁾, Du kickst taurügg,
 Du geihst tau Rauh in still Geduld,
 If gah tau Arbeit in mien Schuld,
 Dien Hoffnung rauht in Gottes Rath,
 Mien in dei Taufkunst, in dei Dath;
 Du geihst ahn Dank in 't stille Graf,
 Uem Di drögt²⁾ Kein sich Thranen af,
 An mien fall dees' hier mal eins stahn,
 Un segen³⁾, wat if för em dahn." —
 „„Ja,"'" seggt dei Oll un folgt dei Hän'n,
 „„Un fallt so sien, denn mag 't so sien!"'" —
 Jehann böhrt hoch sien Kind in En'n⁴⁾:
 „Un is dei bläudig Dath of mien,
 Un brennt sei heit mi up dat Hart
 Un lett s' mi nahrends of kein Rauh,
 If weit doch, dauh 'k dei Ogen tau,

1) nah vör = nach vorne, vorwärts. 2) drögt = trocknet.

3) segen = segnen. 4) in En'n = in die Höhe.


Dat s' för mien Kind tum Segen ward.
 Dei Dath is mien! Dei Segen Dien!
 Frie fallst Du sien! Frie fallst Du sien!" —
 Drückt fast den Ollen sien Hand un geiht. — —

Dat stille Abendroth vergläuht,
 Von'n Heben sacht dei Sommernacht
 Un weigt in Rauh un Freden sacht
 Dei mäude Welt un flustert lind
 In Blaumenduft un Abendwind
 Dörch Busch un Boom un Wisch un Feld
 Von Wunner ut 'ne anner Welt.
 Dat Hart, dat hürt in Seeligkeit
 Den säuten Klang voll Freud' un Leid
 Un weit nich, is 't sien eigen Schlagen,
 Sien eigen Lust, sien eigen Klagen,
 Is 't anner Wurt ut annern Mund,
 Ward em en anner Leben kund. — —

Un as dei Oll in stille Truu'r
 So sitt, dunn klingt dat ut dat Ruhr,
 Dunn singt dat ut den Fleereboom
 Un ut dat Schülp an'n Waatersoom
 Mit säute Stimm: „Lew woll, lew well!"

Un ümmer liefer, liefer klingt 't:
„Lew woll, lew woll! If scheid, if scheid!“
Un ümmer säute, säute singt 't:
„Lew woll! If scheid in Freud un Leid
Mi nich von em un von mien Kind!“
Un flusternd bringt dei Abendwind
Den letzten Gruß: „Lew woll, lew woll!“

Druck der Königl. Universitäts-Buchdruckerei von F. W. Kunike
in Greifswald.



E. 659
W

H6045d

